

MATEOHUA ESOHUI QUEA PAME NEE TEHUE CANAJE JESOSA QUITOJA MATEO

*Jesosa Quitoja etiiquiana
(Noca 3.23-38)*

¹ Jiquio esohui etehue'yo Jesosa Quitoja etiiquiana. Yahuajo jama poa ba'a: Dabi Jesosaja etiiquiana poa, Amajama pea'ai. ² E'e, jamaya poa: Amajamaja bacua ejja Isaaca bajjani poa. Isaacaja bacua ejja Jacobo bajjani poa. Jacoboja bacua Joda bajjani poa; echahua mese cuana enequia poa pea'ai. ³ Jodaja bacua cuana Panesi bajjani, pea Sana bajjani poa, Tamaja mejo poa. Panesija bacua Esomo bajjani poa. Esomoja bacua Anami bajjani poa. ⁴ Anamija bacua Aminanami bajjani poa. Aminanamija bacua Nasoni bajjani poa. Nasonija bacua Sanamo bajjani poa. ⁵ Sanamoja bacua Bosi bajjani poa, Shajamija mejo poa. Bosija bacua Obeda bajjani poa, Shotija mejo poa. Obedaja bacua Isai' bajjani poa. ⁶ Isaija bacua emeshi mese Dabi poa. Dabija bacua Sanomoni bajjani poa. Sanomonija enaese e'ahuemano poa, Oniaja quijjojea, Dabija huana'yo poa. ⁷ Sanomonija bacua Shobiami bajjani poa. Shobiamija bacua Abiase bajjani poa. Abiaseja bacua Asa bajjani poa. ⁸ Asaja bacua Josapati bajjani poa. Josapatija bacua Jonami bajjani poa. Jonamija bacua Osia bajjani poa. ⁹ Osiaja

bacua Jotami bajjani poa. Jotamija bacua Acasi bajjani poa. Acasija bacua Esequia bajjani poa. ¹⁰ Esequiaja bacua Manase bajjani poa. Manaseja bacua Amoni bajjani poa. Amonija bacua Josia bajjani poa. ¹¹ Josiaja bacua Jeconia bajjani poa; echahua mese cuana enequia poa pea'ai. Jeconia nequinajejo, Babinonia dejja cuaa Isaeni cuana iña majje dojo ca poa oja meshi yasijje sosema' chaco meeya.

¹² Majoya Babinonia meshi yasijje dojo majje Jeconiaja bacua Sanati cuaya poa. Sanatija bacua Sonomame bajjani poa. ¹³ Sonomameja bacua Amioni bajjani poa. Amionija bacua Eniaqui bajjani poa. Eniaquija bacua Asoni bajjani poa. ¹⁴ Asonija bacua Sanoco bajjani poa. Sanocoja bacua Aquimi bajjani poa. Aquimija bacua Eniodi bajjani poa. ¹⁵ Eniodija bacua Eneasa bajjani poa. Eneasaja bacua Matani bajjani poa. Matanija bacua Jacobo bajjani poa. ¹⁶ Jacoboja bacua Jose bajjani poa. Oya Maniaja yahue poa. Maniaja bacua Jesosa bajjani aca poa, Quito bajjani pea'ai poa, Eyacuiñajjija huoojea'yo ojjaña cuana jaahuanaji.

¹⁷ Jamajjeya Amajamaja bacua ejja tii majje jea ca poa pea. Majoya tii majje ohuaya pea jea ca poa. Jamaya aca poquiapoquia poa. Quijje nei etiiquiana Dabi cuaya poa. Etiiquiana Amajamaja jeaja osecua cuana 14 poa Dabi cuaya jjimahuajo. Majoya oya jayojja Dabija bacua ejja tii majje jea ca poa pea. Tii majje ohuaya pea jea ca poa. Quijje nei Dabija osecuaja jeaja osecua cuana 14 po majje, dejja mase cuaa etiiquiana cuana Babinonia meshi yasijje dojo ca poa. Majoya Babi-

nonia meshi yasijje poqui majje oya jayojja aca poquiapoquia poa. Majoya quijje nei Jesosa Quito cuaya poa Joseja tii mee. Ma etiiquinaja jeaja os-ecua cuana 14 poa Jesosa Quito cuaya jjimahuajo. E'e, jamaya poa.

*Ebacua Jesosa Quito cuaya poa
(Noca 2.1-7)*

¹⁸ Jesosa Quitoja ecuaya'yo jama poa ba'a: Joseja Mania emese na poa. Mania bii ania poa; dejja cuana ba jjima poa. Jamatii o'ejji poa. Eyacuiñajjija Edojjoshahua Pameya ebacua ba'e mee ca poa, Maniaja ebacua. ¹⁹ Jose quea pame nee poa. Jamajjeya Mania o'ejji poajo jjahuanaqui sa po ajja poa. Jjashahuabaquia poa jama ba'a: —E'e pojja'a Mania pea cojjojji poanaje. Jamajjeya oya jjamejoquinaje. Eyaya oya cajaa aje. Quehuajje cajaa aje Mania, pea cuanaja ba jjima. Jamajjeya pea cuana Maniajo maimai ajja poaje.

²⁰ Jamaya jjashahuabaquianijo Joseya cahuiba ca poa. Oe Eyacuiñajjija esohuidojiji miminaje onijje. Jama poanaje ba'a: —Jose, ja'a Mania cajaa ajji! ¡Oya huanacue! Oja bacua Eyacuiñajjija Edojjoshahua Pameja ba'e mee. ²¹ Ojaya ebacua cuayaje. Jamajjeya jiquio ebacua tii majje ojaya epeejjí cuanaja mimishi cuijea'yojji poaje. Jamajjeya ojaya ebajjani poaje Jesosa.

²² E'e, Eyacuiñajjija esohui huohuijjija esohui yahuajo nei nei jayojjaya jjeya nei jamaya poani. Jamaya yahuajo poa ba'a:

²³ “Epona sho'i bii ani jamatii o'ejji poanaje. Cuayajo oja bacua bajjani acaje Emanuel. Ese Ejjaja esohuijo ca jama ba'a: Eyacuiñajji

ecuana nijje nequi". Jamaya Joseya cahuiba ca poa.

²⁴ Majoya shequi'yo majje Eyacuiñajjija esohuidojiji esohuijo Mania huana canaje, Joseya.

²⁵ Jamatii ebacua cuaya jjimajo, Joseja Mania napa jjima poa. Ebacua cuayajo Jesosa bajjani acanaje.

2

Dejja cuana majametajo jjashahuaba neineiquiani poeyanaje Jesosa baa

¹ Jesosa cuayanaje Jodea meshijo, Benena cuiñajijo. Cuayanajejo dejja Enode bajjani emeshi mese poa. Jamajjeya Jesosa Quito cuayanajejo, pea dejja cuana majametajo jjashahuaba neineiquiani, eshequi poeje mijijke meshijo ba'e quea huesha nee poeyanaje Jenosanena cuiñajji yasijje. ² Majoya oya cuanaa Enode huohui'ajja canaje jama ba'a: —Emeshi mese, ¿achejo jaa ebacua esho'i nei, ma Jodio cuanaja Emeshi Mese poaje'yo? Pea meshijo eshequi poeje mijijkejo nequi ojaya majameta ai quea jiji nee nee ecuaa banaje. Majoya ecuana poeyanaje o bihuiaa —poanaje.

³ Jama huohui'ajjame acajje emeshi mese Enode quea ajjajja nee nee poanaje. Ojjaña dejja cuana Jenosanenajo ba'e pea'ai quea ajjajja poanaje. ⁴ Jamajjeya Enodeya ojjaña Eyacuiñajjija nijje emimijji etii cuana, ojjaña Moisesija esohui etehue'yo huohuijji cuana pea'ai iyaa canaje o que. Jama huohui'ajjame acanaje ba'a: —¿Achejo shai cuayaje ebacua Quito? Oya Eyacuiñajjija huoojea'yo ese jaahuanajji poaje'yo —acanaje Enodeya.

5 Oya cuanaa huohui canaje jama ba'a: —Quito Benenajo cuayaje, Jodea meshijo. Yahuajo nei nei huohui canaje Eyacuiñajjija esohui huohuijjiya jama ba'a:

6 “Cuiñajji sisi Benena bajjani Jodea meshijo yani. Pea cuiñajji cuana quea quemo Jodea meshijo yani pea'ai. Benena cuiñajji quea biso. Jamatii jomajo cuayaje Isaeni dejja cuanaja Emeshi Mese quea pame nee. Ohuaya Eyacuiñajjija epeejji cuana jaahuana caje'yo”.

Jamaya aca poa esohui huohuijjiya yahuajo nei nei —oya cuana poanaje.

7 Emeshi mese Enodeya dejja cuana eshequi poeje mijije ba'e iyaa ca o'oyanaje o que. Quehuaije huohui'ajja canaje ebacuajo. Ma dejja cuaa huohui canajeache mecajje majameta ai quea jiji nee nee ba coo canaje, ebacua cuayajo pojja'a.

8 Ebacuajo huohui mee majje Enodeya oya cuana huoojea canaje Benena huasijje ebacua baa. Jama huohui canaje Enodeya: —¡Poquicue miya! ¡Ebacua sa'ajja neineiquicue! ¡Ba'yo majje poecue! ! Eya huohuihuacueachejo ebacua jaa! Jamajjeya eya poquije pea'ai ebacua bihuiia —Enode siajje poanaje.

9 Emeshi mese Enodeya huoojea cajje ma dejja cuana poquinaje ejiojjije. Ejiojjijo poquianijo majameta ai quea jiji nee eyajo ba ca o'oyanaje ehui dojorji, yahuajo jama. Majameta ai nequi cojja nei poqui'yonaje ebacua huasijje. Majameta jijinequinaje tii ebacua jaa cojja nei. **10** Majameta jijiqui ba majje quea bihui nee nee poanaje oya

cuana. ¹¹ Equi yasijje dobiquinaje. Ebacua Jesosa ba canaje enaese nijje, Mania nijje. Ba majje ebacua bihuia canaje ecui'oshajjajo nequiya. Bashosoco pichojea majje aquiana quea nahue quia canaje ebacuaja. Mei huo'o quia canaje, shiyeshiye quea nahue quia canaje, esei quea shiye nee quia canaje pea'ai. ¹² Majoya ma dejja cuana jjacahuibaquianijo, Eyacuiñajji onijje miminaje jama ba'a: —¡A'a poqui o'oyajji emeshe mese Enode yasijje!

Jamajjeya oya cuana poqui o'oyanaje oja meshi yasijje pea ejiojjije. Enode bana'yo jjima aca poa.

Ebacua Jesosa quehua dojo canaje Ejito meshi yasijje

¹³ Majameta eba neinei'yojji dejja cuana poqui'yo majje Eyacuiñajjija esohuidojiji poeyanaje Jose que, Jose ecahuijaajo. Miminaje Jose nijje jama ba'a: —¡Shequicue oe! ¡Nequisohuacue oe! ¡Ebacua, enaese pea'ai dojocuajicue jjeyahua nei Ejito meshi yasijje! ¡Jomajo nequicue! Quijje eyaya miya huohuije miquea meshi yasijje epoe o'oyajji. Jjeya emeshi mese quea maseya Enode bajjaniya ebacua sa'ajja neinei cani equecuajea'yojji.

¹⁴ Jose nequisohua majje ebacua, enaese pea'ai dojocuaji canaje ejiojjije Ejito meshi yasijje, mecashono. ¹⁵ Ejito meshijo nequi'yonaje emeshi mese Enode eshe nequijo. Enode mano'yajo Isaenija meshi yasijje poe o'oyanaje, Jose. Jamajjeya Eyacuiñajjija esohui huohuijija esohui yahuajo nei nei jayojja jama poa. Eyacuiñajjija esohui tehue ca poa yahuajo nei nei jama

ba'a: "Ecuea ebacua Ejito meshijo ba'e eyaya iyaa'yonaje".

16 Emeshi mese Enodeya ba canaje dejja majameta eba neinei'yojji cuanaa oya dasia ca poa. Jamajjeya oya quea quene nee nee poa. Oja sohuinano cuana huoojea ca'ya poa: —¡Ojjaña ebacua joya tonatona ai'ai quecuajeaquicue! ¡Benenajo ba'eja ebacua dejja sho'i cuana, Benena pejjejo ba'eja pea'ai oe quecuajeaquicue!

Jamajjeya mano'yonaje ojjaña ebacua dejja sho'i daqui she becamejjiji pea'ai epo tonatona ai'ai, esho'i nei pea'ai.

E'e, majameta eba neinei'yojji dejja cuanaja ehuohui'yojo, majameta ai quea jiji nee poanaje, ojjaña ebacua quecua sa poa Enode. **17** Eyacuiñajjija esohui huohuijji Jenemiaja esohui yahuajo nei nei jayojja jama aca poa Enodeya. Ebacua cuana quecua ca'ya poa jamaya. Jenemiaa aca poa jama ba'a:

18 "Shama cuiñajjijo eyiyo ao'ao cuiñajjijo quea shajjaquijjo. Ojjaña janobajjima nei nei pa titii'yani. Jodio enaese cuana pa'añani oja bacua cuana mano'yajo. Quea yeno nee nee. Papajea'yo aija".

Jamaya etehue'yo yahuajo nei nei poa.

Ebacua Jesosa Ejito meshijo ani poe o'oyanaje

19 Emeshi mese Enode mano'yajo Eyacuiñajjija esohuidojiji poeyanaje Jose que, Jose cahuijaajo, Ejito meshijo ba'ejo. **20** Huohui canaje jama ba'a: —¡Nequisohuacue, oe! ¡Ebacua, ojaya enaese pea'ai

dojo'yocue Jodio meshi yasijje! Emeshi mese Ende mano'yonaje, ma ebacua Jesosa quecua'yojji nisho poanaje.

²¹ Jamajjeya Joseya nequisohua majje ebacua Jesosa, enaese pea'ai dojo ca o'oyanaje oja meshi yasijje, Jodioja meshi yasijje. ²² Enodeja bacua ejja Aquenao bajjani Jodea meshi mese eyacua poanaje. Jose jama shajja'ajja majje quea mete poanaje ma meshijo eba'ejji. Eyacuiñajjiya huohui canaje Jose jjacahuibaquianijo: —¡Janinea meshi yasijje poquicue, Jose!

Jamajjeya Jose poquinaje Janinea meshi yasijje ba'e'yohua. ²³ Nasanena cuiñajjiyo Jose ba'enaje. Jamajjeya Eyacuiñajjiya esohui huohuijjiya esohui yahuajo nei nei jayojja jama poa ba'a: “Quijke pishana oya Nasanenajo ba'e dejja bajjani acaje”.

3

*Huaniya esohui huohui canaje quima huasijke
(Macoso 1.1-8; Noca 3.1-9, 15-17; Huani 1.19-28)*

¹ Jesosa Nasanenajo ba'yanijo, Huani, ona besameejji poani poeyanaje Jodea meshi yasijje. Dejja cuana meshi jabojo anica huasijke sohui-huohui huicha'a huicha'a canaje Huaniya. Jama acanaje ba'a: ² —¡Miquea mimishi cuanajo quea yeno pocue; miquea mimishi cuana pajea'yocue! Jjeya nei Eyacuiñajji poeje ojjañaja Emeshi Mese nei nei —acanaje.

³ Isaiaa Eyacuiñajjiya esohui huohuijjiya jama huohui ca poa yahuajo nei nei Huanijo ba'a:

“Oe dejja meshi jabojo nequi taaaanequije. Jama poaje ba'a: —Jiquio ecua Emeshi Cuiñajji

nei neija ejiojji shabo jea cani jama, quea pojje nee nee acani jayojja jamaya jmiquea ejjashahuabaquijji tai quea boejea nee nee a'yocue! Emeshi Mese nei nei poeje".

Jamaya Isaiaa yahuajo nei nei tehue ca poa.

⁴ Huaniya huo ña, cameno ña oja sipi huosho canaje. Ejjayica'aquijji ejee iya canaje. Shacui ijija canaje, huini pea'ai ishi canaje Huaniya. ⁵ Quea huiso dejja cuana Jodea meshijo ba'e, pea cuana Jenosanenajo ba'e pea'ai, pea cuana cuei Jodana sahuajo ba'e pea'ai Huani que poeyanaje o shajja'ajja. ⁶ Oya cuana quea mimishi poanijo quea yeno poani. Jamajjeya oja mimishi cuana huohui ca'yonaje. Mimishi cuana pajea sa poanijo, Huaniya oya cuana Eyacuiñajji nijje epo'yoji besa mee canaje Jodana cueijo.

⁷ Jodioja esohui huohujji Paniseo bajjani cuana, Sanoseo dejja cuana pea'ai poeyanaje Huani que; Eyacuiñajji nijje ejjapeequi'yoji nisho besa'yo sa poani pea'ai. Huaniya oya cuana ba majje tecuea canaje. Jama acanaje ba'a: —Miya peyo jama, jjadasiaquiani. ¿Aya acuae mi huohui canaje? Jama ba'a: "¡Eyacuiñajji besa meecue! Jamajjeya ojaya miquianaya enapa'yoji pojjeama". ⁸ Chojja. ¡Quea pame tii oe ba'e'yocue! ¡Mimishi cuana oe pajea'yocue; a'a quea jjashahuabaqui tai po o'oyajji! Jamajjeya miya Eyacuiñajji enapajji pojjeama. ⁹ A'a jjashahuabaquijji jama ba'a: "Amajama ecuanaja etiiquiana. Oya quea pame nee poanaje. Ecuana Amajamaja bacua poanijojo, Eyacuiñajji enapajji pojjeama". Chojja de. Miquiana Amajamaja bacua quea mimishi poanijo, Eyacuiñajjiya

cajaa mi acaje'yo. E'e de, ohuaya pea Amajamaja bacua jayojja epoji pana caje'yo pojja'a mei, meshi pojja'a —Huaniya acanaje.

¹⁰ —Jama ba'a: Acui tai sajja jajacajja caje'yo cuaqui cabojjiya. Ejjajja chamajo acui caja acaje'yo. Jajajea'yo majje dahuajea caje'yo. Dejja mimishi acui tai jayojja jama acaje'yo Eyacuiñajjiya; cuaqui yasijje jea caje'yo. ¹¹ Eyaya miquianaya Eyacuiñajjiyo besa meeje'yo enajo, ca mique mimishi cuana epajea'yojo. Quijje pishana poeje Quito. Ohuaya mi que Eyacuiñajjiya Edjjoshahua Pame dobiqui mee caje'yo. Jamajjeya miya quea pame poaje'yo. Mimishi cuana pajea sa po'yo ajjajo ca ca jeajea caje'yo cuaqui yasijje. Jamaya pea'ai ba'a: Quito oe nei quea ca'a nee nee nequi. Eya ca iña quea ca'a pishana nequi. Jamajjeya eya ca iña onijje nequi sa po ajja miquiana que cojja. Quea bicho. ¹² Dejja oja tepeya shaa dojo mee majje anoso iya ca'yani equijo; eshaa dahuajea cani. Jiquio ecua anoso shaa dojo mee cani jama eseaya acaje'yo Eyacuiñajjiya. Joya quea pame nee ba'yani jaahuana caje'yo tii. Mimishi cuana ca ca quiyojea canequije'yo tii tii.

*Huaniya Jesosa Eyacuiñajjiyo besa mee canaje
(Macoso 1.9-11; Noca 3.21-22)*

¹³ Majoya Jesosa Janinea meshi yobijo ani macua huasijje po'oquequinaje Jodana cuei yasijje Huani que. Jesosaa Huani ba majje jama acanaje ba'a: —Huani, jeya besa meecue Eyacuiñajjiyo, miyaya!

¹⁴ —Chojja, Emeshi Mese —Huani poanaje—. Miyaya eya besa meecue Eyacuiñajjiyo, miya quea

pame nee neejo! ¿Yajjajje miya e que poe'yonaje?
Eya ca ca iña quea pame pishana, de.

¹⁵ —¡Eyaya huohuaña jama miyaya a'yocue! ¡Ja-majjeya Eyacuiñajjija ehuohui'yo ejocue! —Jesosa poanaje.

Jamajjeya Huaniya Jesosa besa mee canaje Eyacuiñajjijo. ¹⁶ Huaniya Jesosa besa mee majje jjequicuaya ca'yajje, ba canaje eyatahuatahua ca'apejo canaje. Eyacuiñajjija Edojjoshahua Pame huia' jama o sapa biajje cuabesa ba'enaje. Ecapashinei ba'eoquenaje. ¹⁷ Eyacuiñajjija oja Bacua Ejja jama acanaje ba'a: —Miya ecue Bacua Ejja quea jea nee nee. Eya mijo queabihui nee nee poani.

4

*Jesosa quea mimishi po mee sa acanaje
Edosiquiaa*

(Macoso 1.12-13; Noca 4.1-13)

¹ Jjeyahua nei Edojjoshahua Pameya Jesosa quima huasijje meshi jabo huasijje huoojea canaje. Majoya Edosiquiaa Jesosa quea mimishi po mee sa acanaje. ² Jesosa jomajo nequinaje peaja ejiojji cahui huisome, 40 cahuime. Mahuiso epojja, mecajje pea'ai nequinaje quimajo bobima' nei nei. Majoya quea shoe poanaje. ³ Majoya aje Edosiquiana poeyanaje Jesosa que; miminequinaje jama ba'a: —Miya Eyacuiñajjija Bacua Ejja jjabaqui majje ¡miyaya jiquio mei cuana pahui jayojja acue, miquea e'ijjiajji!

⁴ —Chojja de. ¡Bacue Eyacuiñajjija esohui etehue'yo! Jama poani ba'a:

“Dejja cuana bobijo ca'a po majje pojjeama ba'e tiitije'yo. Ojjaña Eyacuiñajjiya esohui jayojja jama añajo ca se ca quea pame nee ba'e tiitije'yo”.

Jamaya aca poa —jamaya Jesosa poanaje.

⁵ Majoya Edosiquiaa Jesosa dojo canaje Jenosanena huasijje. Jomajo Eyacuiñajjiya equi quea ao nee nee yasijje nequisohuaqui mee canaje; equi jamacoo biajje nequi mee canaje. Jama acanaje ba'a: ⁶ —Miya Eyacuiñajjiya Bacua Ejja jjabaqui majje ¡tohuaacue meshi yasijje! Jamajjeya Eyacuiñajjiya esohui jama etehue'yo jaa ba'a:

“Eyacuiñajjiya esohuidojoji cuana huoojea caje mi yasijje, mi jaahuanaa. Oquequiajo ojaya emeya miya iñajjequisohua caje'yo, ohuaya. Jamajjeya miya ejjajiojji quecuasa-jaqui jjima poaje meijo”.

⁷ Jesosa onijke miminaje jama ba'a: —Chojja. Yahuajo jama Eyacuiñajjiya esohui etehue'yo pea'ai ba'a:

“A'a jama ajji ba'a: —¿A'a e'e jojo nei Eyacuiñajjiya oja sohui acaje'yo pojja'a? ¿A'a eya Eyacuiñajjiya jaahuana nei caje'yo? ¡Caba'ajjasahua! —a'a pojji”.

Jamaya yahuajo nei Moisesiya tehue ca poa —Jesosaa acanaje.

⁸ Majoya Edosiquiaa Jesosa dojosohuaqui canaje eyiyo ao huasijje. O shajja'ajjajji nisho jamaya Edosiquiaa Jesosa huohui canaje: —¡Bacue ojjaña meshi cuana, emeshi mese cuana pea'ai, cuiñajji cuana, aquiana quea nahue cuana pea'ai! Ojjaña quea pame nee nee. ⁹ Ojjaña jiquio aquiana cuana, dejja cuana pea'ai miquea poaje'yo; miya

Emeshi Mese nei nei eyaya po meeje'yo jjeya nei ca miyaya eya bihuia'yajo ecui'oshajjajo nequi majje —jama siajje ameya acanaje Edosiquiaa Jesosa.

10 Jamajjeya Jesosaa jama huoojeajeame acanaje ba'a: —¡Chojja Edosiquiana! Eyaya miya bihuia ajja, de. ¡Poquicue miya! Jamaya Eyacuiñajjija esohui etehue'yo yahuajo pea'ai ba'a:

“¡Eyacuiñajji oe nei bihuiacue! Oya oe nei ojjañaja Emeshi Mese nei nequi. ¡Ojaya esohui jama oe acue!”

11 Jamajjeya Jesosaa huoojea cajje Edosiquiana, Satanasa poqui'yonaje. Majoya Eyacuiñajjija esohuidojojji cuana quea huiso poeyanaje Jesosa jaahuanaa, bobiaa pea'ai.

*Jesosaa esohui huohui canaje Janinea meshijo
(Macoso 1.14-15; Noca 4.14-15)*

12 Quijje pea cuaa Huani, ma ona besameejji poa jeanobiajea canaje. Shajja'ajja majje Jesosa posohuaqui o'oyanaje oja meshi yasijke, Janinea meshi yasijke. **13** Oya nequiñaqui jjima Nasanenajo. Pea cuiñajji yasijke, Capenaoma huasijke poquinaje ba'eya. Janinea bae sahuajo, Samononi meshi, Netani meshi pea'ai pejjejo ba'enaje. **14** Yahuajo nei nei Eyacuiñajjija esohui huohuijjiya Isaiaa huohui ca poa jama ba'a:

15-16 “Ojjaña cuana quea mimishijo, esohui ba jjimajo quea apo ba'yani. Eyacuiñajji ba majje oya cuana quea ja'a nee ba'e mee caje'yo. Eyacuiñajji ojaya ba jjimajo quea yeno nee ba'yani. Jjeya ca ca quea jaji nee ba'e mee caje'yo. E'e, Samononi meshijo,

Netani meshi pea'aijo, Janinea bae sahuajo ba'eca cuana, Cueji Pashi ma Jodana cuei bajjani sahuajo, ojje ba'eca cuana, Janinea meshijo, pea bajjani Ese Ejja sohuijo ba'a: Eyacuiñajji ba po jjimaja meshijo ba'eca cuana pea'ai quea mimishi poanaje. Jjeya ca ca quea ja'a nee ba'e mee caje'yo".

Jamaya Isaiaa huohui ca poa yahuajo nei nei Jessosaja epoejjijo.

¹⁷ Majoya Jesosaa esohui huohui canaje jama ba'a: —Jjeyahua nei Eyacuiñajji miquea Emeshi Mese nei poeje. Jamajjeya jmiquea mimishijo quea yeno pocue! jmimishi cuana pajea'yocue miquiaaya! —acanaje.

Jesosaa nahuoo cuiashajajji iyaa canaje onijje epo'yojji

(*Macoso 1.16-20; Noca 5.1-11*)

¹⁸ Majoya Jesosa poquinaje Janinea bae sahua huasijje. Jomajo ohuaya Anesi, Anesija o'i Peno bajjani, ma Simohui pea'ai bajjani ba canaje. Oya cuana nahuoo cuiashajajji nei nei bajio. Nahuoo cuiashaja cani. ¹⁹ Jesosaa oya cuana iyaa canaje: —¡Enijke po'yocue! Eyaya miya dejja cuana jjequi meesahua'yojji aje'yo e que.

²⁰ Jjeyahua nei nei oya cuana ojaya eshajajji cuana jeana'yo majje onijje poqui'yonaje.

²¹ Majoya Jesosaa poqui pishana majje pea cuana ba canaje. Semeneoja bacua ejja Jacobo ba canaje ojaya echahua mese nijje, Huani nijje. Bishe aijo eshajajji je'e'yo po'ani ba canaje. Jjeyahua nei Jesosaa oya cuana iyaa canaje. ²² Jamajjeya Jesosaa iyaa cajje oja chii Semeneo

bishejo ani tii jiña ca'ya poa cuaa Jesosa nijje epoqui'yojji.

*Jesosaa pea esohui huohui canaje emanoja
cuana huaquia mee ca'yonaje*

(Noca 6.17-19)

²³ Jesosa poquinaje ojjaña cuiñajji cuana huasi-jje Janinea meshijo. Jodio dejja cuanaja equi ojee ejjachichaquijji yasijje dobiquinaje esohui huohuiya. Jama poanaje ba'a: —Eya ojjañaja Emeshi Mese poaje'yo.

Ohuaya quea huiso emanoja cuana jjaajaqui mee ca'yonaje, huaquia mee ca'yonaje pea'ai.

²⁴ Quea huiso Sinia meshijo ba'eca cuaa Jesosaa huaquia mee ca'yoqui shajja'ajja canaje pea'ai. Jamajjeya o que jjequi canaje quea huiso emanoja cuana. E'e, ojjaña cuana quea nee poani, pea cuana niñepoqui cuana, jjequi'ihuicajaa cuana pea'ai, jiojijjjajja cuana pea'ai o que jjequi canaje. Ojjaña cuana huaquia mee ca'yonaje, jjaaja mee-qui ca'yonaje, Jesosaa. ²⁵ Jamajjeya Jesosa poquianijo, quea huiso nee nee cuana ojee poquinaje onijje. E'e, dejja cuana quea huiso nee, ponaponaña pea'ai Janinea meshijo ba'e cuana, Jenosanenajo ba'e cuana, Jodea meshijo ba'e cuana, pea Ome miji pea'ai Cuiñajjijo ba'e cuana, Cuei Cueji Pashijo Jodana cuei ojje mijijje ba'e cuana pea'ai; quea huiso nee nee Jesosa nijje poquinaje.

5

*Jesosa eyiyojo aniya esohui huohui canaje
(Noca 6.20-23)*

¹ Dejja quea huiso cuana ba majje Jesosa eyiyo huasijje jaasohua pishanaquinaje. ² Jomajo anioque majje ojjaña cuana sohuihuohui canaje jama ba'a: ³ —¡Bacue! Beca cuana jjashahuabaquiani jama ba'a: “E'e, de, eya quea mimishi nee. ¡Eyacuiñajjiya ecuea mimishi cacuijea ca'yahua!” Jamaya jjashahuabaquianijo Eyacuiñajjiya oya ba'e tiitii mee caje'yo onijke eyajo. ¡Oya cuana queabihui nee capo'yahua!
⁴ Oja epreejji cuana mimishijo quea yeno poanijo, Eyacuiñajjiya quea bihui nee po mee caje'yo mimishi cuijea ca'yajje. ⁵ Ojaya epreejji cuana quea bei poani Eyacuiñajjiya quea jea nee; onijke ba'e tiitii mee caje'yo. ¡Quea bihui nee capo'yahua oya cuana!

⁶ —Ojaya epreejji cuana Eyacuiñajjiya esohui jayojja jama a sa neinei poanijo, Eyacuiñajjiya oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

⁷ —Ojaya epreejji cuana pea cuanajo jjashahuabaquiani pea jaahuanajji. Jamaya poanijo pea cuaa, Eyacuiñajjiya pea'ai oya cuana jaahuanajji caje'yo. Tecue'ama poaje'yo ona nijke. ¡E'e jojo nei quea bihui nee capo'yahua ojaya epreejji cuana! ⁸ Ojaya epreejji cuana mimishi cuana a'ajjajo Eyacuiñajji nijke ba'e tiitiije'yo. ¡Quea bihui nee capo'yahua oya cuana! ⁹ Ojaya epreejji cuaa pea cuana quea bei po meesahua canijo, ojjañaja eba oya cuana Eyacuiñajjiya bacua cuana e'e jojo nei; quea pame nee. ¹⁰ Ojaya epreejji cuana quea ja'a nee ba'yanijo, onaaya oya cuana cuia caje'yo. ¡Jamatii oya cuana quea bihui nee capo'yahua! E'e, quijje eyajo oya cuana ojjaña

huoojea'yojji enijje poaje'yo —Jesosaa huohui canaje.

¹¹ Majoya Jesosa Quitohua ojaya epeeiji cuana huohui canaje jama ba'a: —Miquianaya ecuea epeeiji poanijo, pea cuana minijje mimijajije; miya napa caje pea'ai, siajje poaje mijo pea'ai. Jamatii Eyacuiñajjiya miquianaya quea bihui nee po mee caje'yo. Eyajo onijje ba'e tiitii mee caje'yo.

¹² E'e, Eyacuiñajjiya esohui huohuijji yahuajo nei nei ba'yá poa cuana jamaya aca poa mimishi cuaa; napa ca poa pea'ai. Jamajjeya ̄ona jayojja jama pocue, quea bei! Eyacuiñajjiya miquianaya ojee ba'e mee caje'yo tiitii eyajo quea bihui nee nee — Jesosaa huohui canaje.

*Ae jayojja Eyacuiñajjiya epeeiji
(Macoso 9.50; Noca 14.34-35)*

¹³ —Ecuea esohui jayojja jama añajo, pea cuana mi jayojja jama ba'eje quea pame nee pea'ai. Jamajjeya miya sane jama, mei sese jama. Mei seseaya shicui cajje bobo ihui'yo ajja poani. Jamatii mei sese sese'ama poa jojjemo ̄a'a quea sese po meeje o'oya? Chojja. Sese'ama quea huesha jeajea'aña seya. Jiquio ecua sane sese'ama jeajea'aña seya jama miya ecuea esohui jama po aijajo, cajaa achana' eyaya.

¹⁴ —Enijje jjapeequianijo miquianaya cuaquijiji jama. Cuiñajji emaco ao'aojo nequi ba caje cuaa quea huesha nee mecajje pea'ai. Jiquio ecua emacojo nequia jama ecuea epeeijiya pea cuana Eyacuiñajji ba meesahua caje'yo enijje jjapeequianiya jjejojo. ¹⁵ Cuaquijiji sisi capaca ajja. Chojja. Cuaquijiji sisi nequia cajji acui biajje, ojjaña

equijo ani cuana jeaja'ajji. ¹⁶ ¡Jiquio ecua cuaquiji-jiya ojjaña equijo ani jeaja'a cani jayojja jama quea pame nee ba'ecue! Jamajjeya miquianaya quea pame ba majje pea cuanaa Eyacuiñajji, esejaya Chii eyajo bihuia caje'yo —Jesosa poanaje.

Moisesija esohui etehue'yo quea pame nee

¹⁷ Jesosaa pea esohui huohui canaje jama ba'a: —Eyaya Moisesija esohui yahuajo etehue'yo cajaa a'ajja. Eyacuiñajji esohui huohuijji cuanaja esohui yahuajo nei eyaya cajaa a'ajja pea'ai. Cho. Eya poeyanaje onajaya esohui jama a'yohua. E'e, oya cuaa yahuajo nei nei ejo huohui ca poa. Jjeya eyaya onajaya esohui jayojja jama aje'yo. ¹⁸ E'e jojo nei ojjaña Moisesija esohui cuana cajaa pojjeama poaje'yo. Ojaya esohui biso nei pea'ai cajaa pojjeama poaje'yo. Quea pame nee ani tiitiije'yo. Jamajjeya ojjaña ojaya esohui yahuajo nei nei etehue'yo jama aje'yo. Ojjaña apoa ajeyo'yo majje ecuea echacojji jiquio meshijo apoa poaje'yo. ¹⁹ Jamajjeya joya Moisesija esohui etehue'yo jama ba'e sa po ajjajo, oja sohui jama pojjeama huohui cajo, enijke ba'e meemee ajja quijje eya ojjañaja Emeshi Mese nei poajo. Joya Moisesija etehue'yo jama acani, oja sohui jama huohui cani pea'ai ca ca enijke ba'eje'yo quijje eya ojjañaja Emeshi Mese oe nei poajo. ²⁰ ¡Bacue! Moisesija etehue'yo huohuijji poani, Jodioja esohui huohuijji Paniseo bajjani cuana pea'aiya quea pame nee huohui ajja; quea pame ba'e ajja pea'ai. Jamajjeya miquiana ona jama ba'yajo, ona jama huohuijji pea'ai miquianaya ba'e ajja enijke quijje eya ojjañaja Emeshi Mese nei poajo —Jesosa poanaje.

*Moisesija etehue'yo yahuajo nei quea pame pishana Jesosaja ehuohui'yo quea pame nee nee
(Noca 12.57-59)*

²¹ —Miqaea eba Moisesija etehue'yo yahuajo jama ba'a: “¡A'a pea quecuajji!” Jamajjeya pea quecuajji epo dojo caje'yo cuaa emeshi meseja dejja huoojeajji yasijje. ²² ¡Jjeya ecuea esohui eyacua shajja'ajjacue oe! Ojjaña joya pea nijje quea quene nee nee poani aje oe emeshi mese yasijje poquije. Quea tecue poaje emeshi mese onijje. Joya pea nijje mimijajiajo, “miya cajaa” acajo, cadojo cahua emeshi meseja esohui huohuijji cuana huasijje jjabahuejjaqui meeya. Joya pea nijje panajaji neineiyajo, cajaa nei nei acajo pea'ai cu aqui yasijje huoojea ca chana' pea'ai —Jesosa poanaje.

²³ —E'e pojja'a miya Eyacuiñajji equi yasijje poquiani aquiana quia'yohua Eyacuiñajji bihuiajji. Ma aquiana quia'yo jjimahuajo ijashahuabaquicue miquea epeejjijo! ¿A'a miquea epeejji quea yeno poani minijje miya quea tai añajo? ²⁴ ¡Jamajjeya miquea epeejji yasijje poquicue! ¡Onijje mimiquicue! ¡Quea bei minijje po mee o'oyacue! ¡Majoya miquea aquiana quiaquicue Eyacuiñajji bihuiajji! —Jesosa poanaje.

²⁵ —¡Pea cuana quea quene minijje poajo o que poquicuajicue! ¡Quea bei po mee o'oyacue jjeya nei! Ohuaya miya dojo ca chana' emeshi mese yasijje, napa meeya. Emeshi meseya miya huoojea ca chana' sohuinano huasijje. Sohuinanohua miya equi ejjajeanobiaquijji yasijje jeanobia ca chana'. ²⁶ Jomajo nequi tiitii mee caje. Ma minijje quea quene nee poanaje sosequiajeyo'yo ma jje miya ejeanobianequi jeacuaya caje'yo, de —

Jesosa poanaje—. ¡Jiquio jayojjaya oe pocue! ¡Jama-jjeya Eyacuiñaggi nijje jjapeequicuajicue mano'yo jjimahua, cuaqui yasijje jeajea jjimahua!

¡A'a jjashahuabaquiji pea eponajo!

²⁷ —Cuanaya miquea eba Moisesija etehue'yo jama ba'a: “¡A'a pea cojjojji pojji!” ²⁸ Jjeya ecuea esohui eyacua shajja'ajjacue jama ba'a: Dejja pea eponajo jjashahuabaquianijo oya pea cojjojji epoji jayojja jama poani, ojaya ejjashahuabaqui'yojjijo; quea mimishi poani. ²⁹ Jamajjeya ja'a quea mimishi pojji! Miya quea mimishi poani epona, aquiana pojja'a baqui majje ¡maya bapajea'yocue! Jea ba majje mimishi po majamajañajo cuaqui yasijje dobiqije'yo tii. Jamajjeya ja'a jea bajji! ³⁰ Pea'ai miya quea mimishi poani aquiana emeya napañajo ja'a aquiana napajji! Quea mimishi po chana'; cuaqui yasijje dobiqui'yo chana'. Jamajjeya ja'a onaja aquiana napajji! Sii chanaya —Jesosa poanaje.

Esuhui ehuanase huei canijo

(Mateo 19.9; Macoso 10.11-12; Noca 16.18)

³¹ —Moisesija etehue'yo jama poa pea'ai ba'a: “Dejjaa ojaya ehuanase cajaa acajo, huei canijo jesohui catehue cahua ehueijji!” ³² ¡Ecuea esohui eyacua shajja'ajjacue! ¡A'a miquea ehuanase pea dejjaja sii jjima hueijji! Epona quea pame ba'e huei'yo majje pea dejja nijje jjahuequiajo, yahue ebionei eshe nequijo, quea mimishi po mee cani ebionei yahueya. Oya eshe enequijojo oja yahue eyacua quea mimishi poani pea'ai —Jesosa poanaje.

³³ —Moisesija etehue'yo jama poa pea'ai ba'a:

“Miyaya huohuaña jama ba'a: —Eyacuiñajjiya
 eya shajja'ajja canijo, e'e jojo nei eyaya
 ecuea esohui jama aje'yo. ¡Jamaya mimi
 majje miquea esohui jama acue; a'a pa-
 jea'yojji!”³⁴ ijjeya ecuea esohui eyacua
 shajja'ajjacue! Jama ba'a: ¡A'a oe siajje
 pojji! ¡Pea nijje mimi majje miquea eso-
 hui jayojja jama acue! Jamajjeya pea ni-
 jje mimianijo a'a huohuijji jama ba'a: “Ey-
 acuiñajji eshe eyajo yanijo, ecuea esohui
 jama eyaya aje'yo. Ecuea esohui e'e nei
 pojjeama jojjemo eya quea nee po mee
 ca'yome”. Cho. Eyajo Eyacuiñajji ejjahuo-
 jeaquijji tii tii.³⁵ Jamaya a'a mimijji pe'a'i
 ba'a: “Meshi yanijo, oe po jjimajo ecuea
 esohui jama eyaya aje'yo. Ecuea esohui
 e'e nei pojjeama jojjemo meshi jjani yasijje
 eya mojea ca'yome”. Cho. Meshi cuana
 miquea pojjeama; Eyacuiñajji Emeshi Mese
 oe nei poani. Jamaya a'a mimijji pe'a'i
 ba'a: “Jenosanena yanijo, oe po jjimajo
 ecuea esohui jama eyaya aje'yo. Ecuea es-
 ohui e'e nei pojjeama jojjemo Jenosanena
 cuiñajji esecue yasijje mo huoojeacuaya
 ca'yome”. Cho, Jenosanena miquea poj-
 jeama; Eyacuiñajji Jenosanena Meshi Mese
 poani.³⁶ Jamajjeya a'a huohuijji miyaya:
 “Ecuea esohui e'e nei pojjeama jojjemo ca-
 mano mee ca'yome”. Chojja.³⁷ Jamajjeya
 huohuicue jama ba'a: “E'e, eyaya jama
 aje'yo”. “Chojja eyaya jama a'ajja” acue —
 Jesosa poanaje.

*Esohui dejja quea quenejo
(Noca 6.29-30)*

³⁸ —Miquea eba Moisesija etehue'yo jama pea'ai ba'a: “¡Peaa cojja cuiasejjajea cajje jjasosequiaquicue; cojja cuiasejjajea pea'aicue! ¡Peaa se' cuiasajajea cajo se' cuiasajajea pea'aicue!” ³⁹ Ecuea esohui eyacua ca ca jama ba'a: Onaaya miya napa cajje ja'a jjashahuabaquijji onijje ejjasoseaquiijji! ¡Mique shemo ebianei mijijje cuia cajje shemo shani mijijje cuia mee o'oyacue! ⁴⁰ Peaa miquea daqui sa poanijo miya dojo cani dejja etii bajjani yasijje huohuiya; miquea daqui dojo cajo, jamatii ¡miquea daqui moo quiacue pea'ai! ⁴¹ Dejja maseya miya iña cajje ojaya aquiana quea huesha pishana dojo mee cajo, ¡quea huesha nee dojocue, jamatii! ⁴² Pea Ese Ejja miquea aquiana sa neinei poanijo ja'a quea dejja tai pojji! ¡A'a quea nishehui pojji! ¡Oya quiacue! Pea cuana miquea aquiana dojo sa poanijo ¡oe pojji cahuime dojo meecue! Minijje mimiajo: “¡Che iña jiquio dojo meecue; quijje aje jje jeahuaje'yo!” acajje; “¡E'e, dojocue!” saja'ame acue. Jamajjeya ¡ojjaña cuana nijje quea bei ba'ecue! ¡A'a o jayojjaya quea mimishi, quea tai pojji! —Jesosa poanaje.

*Joya minijje quea quene nee poani quea jea acue
(Noca 6.27-28, 32-36)*

⁴³ —Miquea eba etehue'yo yahuajo nei jama ba'a: “¡Miquea epeeiji quea jea nee acue! Miquea epeeiji pojjeama, cho. ¡Onijje quea quene pocue epeeiji pojjeama jjejojo!” ⁴⁴ Ecuea esohui eyacua ca ca jama ba'a —Jesosa poanaje—: ¡Miquea

epeejji pojjeama quea jea nee acue pea'ai! Miya Eyacuiñajji epeejji poanijo, miya napa cajje ¡Eyacuiñajji nijje mimicue maa mi napajji poanijo! Jamajjeya e'e pojja'a oya cuana Eyacuiñajji nijje jjapeequije'yo pea'ai. ⁴⁵ Jamaya poanijo miquianaya Eyacuiñajji eseja Chii eyajo anija bacua cuana poani. E'e, Eyacuiñajjiya eshequi quea ja'a nee jiji mee cani dejja quea pamejo, dejja quea mimishijo pea'ai. Ohuaya ena huoojea cani dejja quea pame neeja que shepajji, dejja quea mimishija que shepajji pea'ai —Jesosa poanaje.

⁴⁶ —Joya mi quea jea nee ajji poani miquea quea jea nee pea'ai; minijje quea mase ca ca miquea boti'ama. Eyacuiñajji epeejji pojjeama cuana aje oe jamaya poani pea'ai, de. Jamajjeya miya jamaya poanijo ¿a'a Eyacuiñajjiya miya bihuia caje? Cho. ⁴⁷ Miquianaya aje jja oe miquea epeejji cuana nijje quea bei nee mimiani, pea cuana nijje mimi aija. ¿A'a jamaya poani ojjaña dejja cuana? E'e. Eyacuiñajji epeejji pojjeama cuana aje oe jamaya poani pea'ai, de. ⁴⁸ Jamajjeya esejaya Chii eyajo quea pame nee ani. Ojjaña cuana Eyacuiñajji quea jea nee nee. ¡Eyacuiñajji jayojjaya jama pocue quea bei nee nee! —Jesosa poanaje.

6

¡Quea ja'a nee jjapeequicue Eyacuiñajji nijje!

¹ Jesosa poanaje pea'ai: —¿Apiojji miya Eyacuiñajji chacochoano pea cuaa ba canijo? E'e pojja'a jjashahuabaquiani miya bihuia caje cuaa ba majje. Onaja ebajji chacochoanijo, quijke

eyajo miquea echaco ojo Eyacuiñajjiya miya bi-huia ajja, esosequiajji pojjeama —Jesosa poanaje.

² —Aquiana aema huasijje quia'yo majje a'a mimijji jama ba'a: “¡Bacue, eya quea pame nee poani!” Chojo. Jamaya poani Eyacuiñajjiya epeejji nisho cuana Eyacuiñajjiya equijo, ejiojji cuanajo pea'ai. Onaaya Eyacuiñajjiyo chaco cani pea cuanaja ebajji. Jamajjeya quijje eyajo Eyacuiñajjiya oya ebihuiajji pojjeama; ojaya echaco esosequiajji pojjeama pea'ai. ³ ¡Miyaya aema huasijje aquiana cuana quehuajje quiacue! Jamajjeya ¡miquea epee-jji neineija ba jjima quiacue! ⁴ Miquea Chiiya eyajo aniya ca ca oe ba caje; ohuaya miya quijje sosequia caje'yo —Jesosa poanaje.

*Eyacuiñajji nijje jama mimime pocue ba'a
(Noca 11.2-4)*

⁵ Jesosaa o shajja'ajjajji cuana huohui canaje pea jama ba'a: —Eyacuiñajji nijje mimianijo ja'a joya ecua Eyacuiñajji nijje jjapee nishoquiani jay-ojja jama mimijji! Oya cuana aje oe Jodioja ojee ejjachichaquijji equijo nequiani, ojjañaja eba-jji miminequiani. Esecuejo ojjaña anica cojja nei pea'ai miminequiani. Eyaya miya e'e jojo nei huohuiaña oya cuana miminishonequiani —Jesosa poanaje—. Jamajjeya Eyacuiñajjiya epee-jji nei poso ojjaña oya ba cani. Jamajjeya on-aaya bihuia canaje sosejje Eyacuiajji nijje minisho'aninajejo quijje eyajo oya cuana enijje enequi'yojji pojjeama, Eyacuiñajjiya epeejji nisho jjejojo. ⁶ ¡Miquianaya ca ca miquea equi quecuaijjijo mee nei mimi'anicue Eyacuiñajji nijje, pea cuaa eba ca poani jjejojo! ¡Eseja Chii nijje jomajo

mimicue! Ohuaya miya ba cani, shajja'ajja cani; mi pejjejo nequiani oya. Esejaya emimi bame bame jayojja jama acaje'yō, eseja Chiiya —Jesosa poanaje.

⁷ —Pea cuana Eyacuiñajji ba jjimajo eyacuiñajji nisho nijje mimianini. Oya esohui majamaja acani. Mimi majamajani eyacuiñajji nishohua eshajja'ajja caje poso. ⁸ ¡A'a o jayojja jama pojji! Eyacuiñajji nijje mimi sa po jjimahuajo, ojaya esejaya ejjashahuabaquijji eba, de, eseja Chiija eyajo anija —Jesosa poanaje.

⁹ —Jamajjeya Eyacuiñajji nijje mimianijo mimicue jama ba'a:

Eyacuiñajji, miya ecuanaja Chii quea bame nee.
Miya eyajo quea ca'a nee ani.

¡Ojjaña cuaa miya cabihuia cahua, oe nei quea ja'a nee!

¹⁰ Miya ojjaña cuanaja Emeshi Mese poani tii tii.
Eyajo miquea ejjashahuabaqui'yojji jayojja jama poani ojjaña.

¡Jamaya oe pocue ojjaña meshijo pea'ai!

¹¹ ¡Jjeya eya ba'e meesahuacue!

¹² Eya quene'ama pea cuana nijje, joya enijje quea mimishi poani nijje.

Jamajjeya jecuea mimishi cuanajo a'a quea quene pojji pea'ai!

¹³ ¡A'a eya quea mimishi po meeiji!

¡Nahue neineicue mo, Eyacuiñajji!

¡Edosiquianaja epeejijo eya jaahuanacue!

E'e Eyacuiñajji, miya ojjañaja Emeshi Mese poani tii tii.

Miya oe nei quea ca'a nee enequi tii tii, quea pame nee.

¡Ojjañaa miya cabihuia cahua tii tii!
 E'e, jamaya apoa ecuea emimi.
 ¡Jamaya Eyacuiñajji nijje mimicue! —Jesosa
 poanaje.

¹⁴—E'e, jjiquio ecua eya jama jjashahuabaquime oe pocue! Pea cuana nijje mimicue jama ba'a: “Miya enijke mimijajinaje quea tai. Jamatii eya miquea mimishijo quene'ama” jamaya pocue. Jamaya pea nijje mimianijo Eyacuiñajji miquea mimishijo quene'ama poaje'yo pea'ai. ¹⁵Pea nijje quea quene tii tii poanijo ca ca Eyacuiñajji eseja Chii miquea mimishijo quea quene tii tii poaje'yo pea'ai; miquea mimishi ecuijea'yojji pojjeama — Jesosa poanaje.

*Eyacuiñajji nijje eseya bobima' mimi cajji
 ijja'ijja jjima ani majje*

¹⁶—Eyacuiñajji epeeiji nisho ijja'ijja jjima mimianijo quea yeno jayojja poani, ecojja topo jjima ojjaña cuanaja ebajji. Jamajjeya ojo jama poani ba'a: “E'e, oya Eyacuiñajji epeeiji nei nei; ijja'ijja jjima mimiani Eyacuiñajji nijje, de” poani —Jesosa poanaje—. Chojja, edasia'yojji poani. Eyacuiñajji epeeiji nei poso pea cuaa acani. Jamajjeya ojjañaja ebajji oya mimiani. Quijke oya cuana enijke enequi'yojji pojjeama eyajo Eyacuiñajji epeeiji nisho jjejojo —Jesosa poanaje—.

¹⁷ Miquianaya ca ca ecuea epeeiji nei. Ijjial'ijja jjima Eyacuiñajji nijje mimianijo ja'a quea yeno jayojja pojji! ¡A'a jjadasiaquijji jayojja jama pojji! Chojja —Jesosa poanaje—. Ijjial'ijja jjima Eyacuiñajji nijje mimi huicha'a huicha'anijo ijamatii eme', ecojja pea'ai shacuacue; ehuojjaña

shiyeshiyejo shacue! ¹⁸ ¡Jamajjeya onaja ba jjima Eyacuiñajji nijje mimicue ijjia'ijjia jjima ani! Jamajjeya eseja Chiiya ohuaye nei miya ba caje, mi pejjejo nequiya. Miquea emimi bame bame jayojja jama acaje, ohuaya —Jesosa poanaje.

Jesosaa eseya quijke eyajo quea huiso sosequia caje'yo, ojo chacochacoani sosejje
(Noca 12.32-34)

¹⁹ —Jiquio meshijo ba'yanijo ¡aquiana echicha'yo quea huisojo a'a quea nahue bajji! —Jesosa poanaje—. Siipojjiya miquea aquiana sii ca chana'. Mojo ca chana'. See'yo chana' pea'ai.

²⁰ Cho. ¡jjeya Eyacuiñajjijo chacochaco neineicue! E'e jojo nei ohuaya quijke miya sosequia caje'yo quea huiso nee nee eyajo. Esii'yojji pojjeama; miquianajaya poaje'yo tii, miquea eba'e'yojji eyajo. ²¹ E'e, jamaya jjashahuabaquijao miquianaya quea ja'a ba'eje'yo, ecuea ehuohui'yo jayojja jjashahuabaquije eyajo eba'e'yojji; aquiana quea huiso yanijo ca ca miquianaya jjashahuabaquije meshijo eba'ejjijo —Jesosa poanaje.

¡Quea ja'a nee ba'ecue!
(Noca 11.34-36)

²²⁻²³ —Miquea ecojja quea pame nee neejo miya quea ja'a nee baje'yo echacojji; quea ja'a nee ba'eje'yo pea'ai. Cojja jamajama ca ca quea ja'a eba'ejjijo pojjeama. Quea apo nee nee, de, cojjama' —Jesosa poanaje—. Jiquio ecua quea cojja pame nee jayojja jama miya quea jjashahuabaqui pame nee neejo quea ja'a nee ba'eje'yo Eyacuiñajjija ej-jashahuabaqui'yojji jayojja. Quea jjashahuabaqui

tai poanijo onaja aquiana cuana quea jea ba maje ca ca quea dejja tai ba'eje'yo, quea nishehui. Jamajjeya Eyacuiñajjiya miya tecuea caje'yo jama ba'a: “Miya ca mi ca oe quea tai nee nee ba'yani, ejo jjashahuubaqui ajja” acaje'yo Eyacuiñajjiya — Jesosa poanaje.

¡A'a quea nahue, quea nishehui ba'eiji!
(Noca 16.13)

²⁴ —Cuanaya ¿a'a acuae chacochaco cajji beca dejja mee'ajja cajje? Chojja. Oe echacomjeejji shajja'ajja caje, quea boti acaje pea'ai. Pea echacomjeejji shajja'ajja jjima acaje, boti'ama acaje pea'ai. Jamaya miquianaya aquiana cuanajo jjashahuaba tiitiiquianijo Eyacuiñajjiyo echacojji pojjeama —Jesosa poanaje.

Eyacuiñajjiya oja epeejji cuana jaahuana cani
(Noca 12.22-31)

²⁵ Jamajjeya Jesosaa huohui canaje pea jama ba'a:

—E'e jojo nei eyaya miya huohuiaña: ¡A'a quea yeno jjashahuaba tiitiiquijji miquea eba'ejjijo! “E'e pojja'a eya bobimajo manoje'yo, bobi yasijje poaje'yo; e'ishijji pojja'a chama' poaje'yo, quea naba taja; ecuea daqui huiñaje pojja'a, daquima' nei nei eya poaje'yo”. ¡A'a jamaya jjashahuubaquijji! Eyacuiñajjiya miya eshe pana canaje, yamijji. Jamajjeya ohuaya miya bobi quia meesahua caje, daqui quia meesahua caje pea'ai. ²⁶ E'e de, ¡bacue cuichojji cuana! Quea jaji ba'yani. Oya cuanaa que chaco ajja, bobi chicha ajja, equi yasijje iya ajja quijje e'ijjia'yojji. Eseja Chiiya oya cuana jaahuana cani. Cuichojji ojaya

nahue'ama; miya ca ca oe ojaya quea nahue nee nee. ²⁷ ¡Jashahuabaquicue! ¿A'a miya quea ao nee epoaje poso jjashahuaba neineiquianijo miya tii ajoje'yo? Chojja. Jamatii. Jamajjeya oya jayojja aquiana chama' epoaje poso ja'a quea mete pojji! —Jesosa poanaje.

²⁸ —¿Apiojji miya jjashahuabaquiani quea yeno daquijo? ¡Bacue eshasha ebiojo tiiani! Shasha cuana chaco ajja, oja daqui cuana soco ajja. ²⁹ Jamatii quea bame nee nee nequiani. Jodioja emeshi mese yahuajo nei nequiya Sanomo bajjaniya daqui quea nahue nee nee huosho ca poa; jamatii oja daqui quea bame pishana. Shasha ca ca quea bame nee nee. ³⁰ E'e — Jesosa poanaje—, Eyacuiñajjiya shasha cuana tii mee cani quea bame nee. Jjeya shasha cuana enequi; mecahuajje yaa'yani, joca'yani; dahua-jea cani cuaa pojja'a, chama'yo tii poani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miya ba'e meesahua caje'yo. Miya ojaya quea boti nee nee. Miquianaya jjashahuaba taiquiani jama ba'a: "E'e pojja'a Eyacuiñajjiya eseaya jaahuana jjima" jamaya miquianaya poani —Jesosa poanaje.

³¹ —A'a jjashahuaba taiquijji jama ba'a: "¿A'ya cuee che ijjiaje, de? ¿A'ya cuee ishije, de, chama' ena? ¿A'ya cuee che huoshoje?" ³² Eyacuiñajjiya epeejji pojjeama cuana ojjaña aquianajo jjashahuabaquiani tii tii. Eyacuiñajjiyo jjashahuabaquii ajja. E'e jojo nei esejaya Chii eyajo ani miquea aquiana eba'e meejjijo jjashahuabaquiani. Ohuaya miya jaahuana caje'yo —Jesosa poanaje—. ³³ Jamajjeya

jjashahuabaquicue tii tii jama ba'a: “Quijje Eyacuiñajji ojjañaja Emeshi Mese po majje onijjeya eyaya pea cuana huoojeaje'yo eyajo. ¡Ojaya esohui quea ja'a jayojja jama ca'a'yahua!” acue —Jesosa poanaje—. Jamaya jjashahuabaquianijo ohuaya miquiana huasijke aquiana eba'e meeiji quia meesahua caje'yo pea'ai —Jesosa poanaje.

³⁴ —Jamajjeya a'a quea yeno jjashahuabaquijji jama ba'a: “¿Aya shai ecuana jaahuana caje mecahuajje?” Miya Eyacuiñajjiya jaahuana caje'yo. Quijje quea camaja eba'ejji poaje pojja'a. Jamati-iya ohuaya miya ba'e meesahua caje'yo —Jesosa poanaje.

7

¡A'a pea cuana niñebajji!
(Noca 6.37-38, 41-42)

¹ —¡A'a pea niñebajji! —Jesosa poanaje pea'ai—. Jamaya Eyacuiñajjiya botí'ama. ² Miya pea cuana niñebajji poanijo Éyacuiñajjiya miya tecuea caje'yo pea'ai. Miquiana pea nijje jjabeiqui'yajo Eyacuiñajjiya miquianajaya mimishi cuijea caje'yo. Ma ecua miyaya onaya aña, jamaya miya acaje'yo Eyacuiñajjiya.

³ —¿Apiojji acuae jja oe miquea epeejji tecueaña so'o ca mimijajijiya? ¿A'a miquianaaya mimishi pajea'yonaje pea tecuea jjimahuajo ojaya mimishijo? Chojja, miya ca mi ca oe mimijajipajea'yo jjima pea'ai. Jamaya miya poani ba'a: Miyaya baña huenihueni shabo biso nei nei miquea epeejjiya ecojjajo nequi. ¿A'a cuae jja oe miyaya miquea ecojja dojjojo nequi huenihueni shabo quea quemo baña so'o? ¡Miquea ecojjajo

nequi huenihueni shabo quea quemo jja oe huijjeajea meecue! ⁴⁻⁵ A'a jiquio jama mimijji ba'a: "Epeeiji, huenihueni shabo biso neiya mi cojja dobi canaje. Ache ba'ajja cahuijjea'ajja'yo sahua, de shabo biso nei". Chojja. Shabo quea quemo nee miquea ecojjajo nequi, miya quea cojja shojo poanijo ca jje ca ebajji pojjeama. Miya ca mi ca oe ma shabo miquea ecojjajo nequi jebionei huijjeajea mee'yo socue! ¡Majoya shabo biso nei nei miquea epeejji ja ecojjajo nequi huijjeajea'yocue! —Jesosa poanaje.

⁶ —Miquea aquiana quea nahue nee nee ¿a'a quiaña iñahuehua huasijke, cuichi yasijke pea'ai? Aquiana nahue quishipasha caje'yo, de. Oya cuana quea mase; ijija ca chana' mi. Jamaya poani dejja jjashajja'ajja qui ajja nei nei; quea mase iñahuehua jama, cuichi jama. Jamajjeya iona huasijke Eyacuiñajji esohui quea pame nee a'a huohui tiitijiji! —Jesosaa acanaje.

¡Eyacuiñajji nijje mimi neineicue! Ohuaya miya shajja'ajja caje
(Noca 11.9-13; 6.31)

⁷ Jesosa jama poanaje pea'ai ba'a: —Jama acue ba'a: ¡Mimi neineicue Eyacuiñajji nijje! Onijje mimianijo ohuaya miya jaahuana caje'yo. Cuanaya aquiana chama' ba majje sa'ajja neineiaña ijama mimi neineimeya pocue Eyacuiñajji nijje! Ohuaya miya shajja'ajja caje'yo. Cuanaya ese-
cuelo nequiya miyaya taaaña miquea epeejji nijje emimijji. Esecuelo nequi taaa tiitii nequiani jayoj-
jaya ¡Eyacuiñajji nijje mimi majamajacue! Ohuaya miquea esohui jayojja jama acaje'yo. ⁸ E'e jojo nei

onijje mimianijo Eyacuiñajjiya jaahuana caje'yo; o sa neinei poanijo ohuaya miya saja'a caje'yo. Esecuejo taaa nequi jayojja jama pocue; ohuaya miya saja'a caje'yo —Jesosa poanaje.

⁹ —Ebacua ejja oja chii nijje jama mimime poajo ba'a: “Ecue chii, ¡che mo oe pahui quiacue e'iji'i'ajji!” acajo, ¿a'a oja chiiya mei quia caje? Chojja. ¹⁰ “Ecue chii, ¡che mo oe jai quiacue e'iji'i'ajji!” acajo, ¿a'a oja chiiya peyo quia caje'yo? Chojja. ¹¹ Jamajjeya miquianaaya, jamatii quea mimishi jjashahuabaquianiya miquianajaya bacua cuana jaahuanaña. Jamajjeya esejaya Chii eyajo aniya miya jaahuana caje'yo e'e jojo nei onijje mimianijo. Oya ca ca oe quea pame nee nee enequi tii tii —Jesosa poanaje.

¹² —Miya mimiani pea nijje jama ba'a: “¡Enijke quea pame nee po tiitii'yocue!” Jamajjeya ¡pea cuana nijje quea pame nee po tiitii'yocue! E'e, jamaya yahuajo Moisesija esohui etehue'yo poa. Jamaya Eyacuiñajjiya esohui huohuijji yahuajo nei ba'ya poa pea'ai —Jesosa poanaje.

*Beca ejiojji
(Noca 13.24)*

¹³⁻¹⁴ Jesosaa huohui canaje pea jama ba'a: — ¡Esecue biso neijje dobicue! ¡Ejiojji biso neijje poquicue, ma eyahuasijje epoquijji ejiojjije! Jomajo ba'e tiitiije'yo eseya. Eyacuiñajjiya esohui ejiojji pame jayojja. Eya ejiojji esecue jayojja pea'ai poani —Jesosa poanaje—. Oe pojji cuana Eyacuiñajjiya ejiojjije poquiani, de. Pea esecue ejiojji ai'ajje epoquijji. Ma ejiojji ai'ajje poqui

majje cuaqui yasijje poquije'yo. Jamajje quea huiso poquiani ejiojji ai'aijje, de –Jesosa poanaje.

*Esohui huohuijji nisho, siajjepojji
(Noca 6.43-44)*

¹⁵ Jesosa jama poanaje pea'ai ba'a: —¡Esohui huohuijji nishoja esohui a'a shajja'ajjajji! Dasia ca chana' mi. Mi que poeje jjapee nishoquiya. Oya cuana quea bei jayojja poe'ani. Cho, quea bei pojjeama. Aquiana quea mase jama poani oya cuana. ¹⁶ ¡Quea mimishi poanijo bahuejjacue oya cuana esohui huohuijji nisho! ¿A'a acuae acuishsha jjonojo acuijjajja quea pame ba'yani? Cho. ¿A'a shaponajo acuijjajja quea pame chicha cani? Cho. ¹⁷ Jamaya esejaya eba ba'a: Acui quea pamejo acuijjajja quea bame. Acui quea taijo ejjajja quea tai poaje. ¹⁸ Acui quea pamejo acuijjajja quea tai pojjeama ba'yani. Acui quea taijo ejjajja quea bame pojjeama ba'yani. ¹⁹ Acui taijo ejjajja quea tai poani. Jamajjeya jajajeaña seya, dahuajea'yaña seya. ²⁰ Acui eseaya baje ejjajja ba majje. Acui quea tai ba majje esejaya eba acui quea tai. Jama jayojja esohui huohuijji quea mimishi ba majje eseyaya oya esohui huohuijji nisho bahuejjajje –Jesosa poanaje.

*Jesosa shajja'ajjajji e'e jojo nei
(Noca 13.25-27)*

²¹ —Quea huiso dejja cuana huohui cani jama ba'a: “Jesosa Quito, miya ecuanaja Emeshi Mese e'e jojo nei”. Chojja, beca cuana siajje poani. Ecue Chii eyajo anija ejjashahuabaqui'yojji jayojja jama po ajja. Jamajjeya oya cuana ecue Chii eyajo ani yasijje poqui'yo ajja. Pea cuana e'e jojo

nei ecue Chija ejjashahuabaqui'yojji jama poani. Oya cuana poquije'yo ecue Chii eyajo ani yasijje, ojaya Emeshi Mese nei yasijje. ²² Quijje e poe o'oyajo quea huiso cuana siajje poaje enijje jama ba'a: "Ecuea Emeshi Mese, Eyacuiñajjiya eya huoo-jea canaje miquea esohui huohuiya. Ohuaya eya eshahua huoojeacuayaja meesahua ca'yonaje. Ohuaya eya ameesahua canaje ma dejaa ajjima acani". Quijje jiquio jayojja jama acaje'yo siajjepojiya. ²³ Majoya eyaya oya cuana tecuea neineije'yo jama ba'a: "Chojja. Miquianaya enijje jjapeequi'yo jjima. ¡Miña ca oe poquicue quea huesha nee! Quea mimishi, quea mimijjequijea ca miña" aje'yo —Jesosa poanaje.

Equi iyajji jama Jesosaja epeejji cuana quea jjashahuabaqui ja'a nee

(Macoso 1.22; Noca 6.47-49)

²⁴ —Joya beca cuaa ecuea esohui shajja'ajja maje jamaya acaje'yo. Ojaya ejjashahuabaqui'yojji quea pame nee. Jamajjeya jiquio ecua equi quea ca'a emacojo iyaña jayojja jama jjashahuabaquime oya poani. ²⁵ Ena quea quemo poajo, jjayehuequiyajo beni quea quemohua equi jeaquena cani. Jamatii equi quea ca'a emacojo ani; jaabicha jjima acani. ²⁶ Pea cuaa ecuea esohui shajja'ajja ajja. Ecuea esohui jayojja jama a'ajja pea'ai. Oya cuana quea jjashahuabaqui quehua jayojja jama poani, equi quea quemo iya cani meshijajijo jama. ²⁷ Ena quea quemo poajo ohua caje. Beni quea quemohua po majje equi janobajjima nei jeabichajea caje'yo —Jesosa poanaje.

²⁸ Jesosaa eyiyo quibojo esohui huohui ca poa. Apoa po majje dejja quea huiso cuana shajja'ajja majje jama poanaje ba'a: —E'e de, Jesosaa esohui quea ja'a nee nee huohui cani. ²⁹ Ohuaya huohui cani emeshi mese jayojja jamaa, Moisesija esohui etehue'yo huohuijji jayojja jama pojjeama, de — poanaje ojjaña cuana.

8

*Dejja batata epo'yo, ma dejja shicui jjima acani
jjajea meequi ca'yonaje Jesosaa*
(Macoso 1.40-45; Noca 5.12-16)

¹ Majoya Jesosa eyiyo biajje ani esohui huohuipajea majje jaaoque'yonaje. Quea huiso dejja cuana poquinaje onijje. ² Oe dejja quea mano nee, batata epo'yo poeyanaje Jesosa que. Ecui'oshajjajo nequinaje o bihuiajji. Jama poanaje ba'a: —Jesosa, ecuea eba miya ona jjajeaqui mee'yojji nei nei poani. Jamajjeya miyaya eya jjajeaqui mee'yo sa amajje ¡mo che jjajeaqui mee'yocue!

³ Jesosaa ma dejja napa'ajja canaje emeya. Jama miminaje onijje ba'a: —E'e, eyaya miya jjajeaqui mee'yo sa aña. ¡JJajeaqui'yocue miya!

Jjajequinana'yonaje jjeya nei. ⁴ Jamajjeya Jesosaa oya huohui canaje: —¡Shajja'ajjacue mo! Eyaya miya jjajeaqui mee'yonaje. Jamatii ja'a jjeya pea cuana huohuijji! ¡Poquicuajcued Jenosanena huasijje, Eyacuiñajjija equi yasijje, Eyacuiñajji nijje mimiani yasijje! Oya huohuicue miyaya: “Eya huaquia'yonaje, jjajeaqui'yonaje mo” acue. ¡Moisesija esohui jayojja jama oe pocue

pea'ai! Miya ehuaquia'yohua jjejojoya ¡Eyacuiñajji nijje mimiani yasijke beca huia' quiaquicue Eyacuiñajji bihuiajji! Jamajjeya ojjaña ba caje miya e'e jojo nei ejjajeaqui'yo –oya acanaje Jesosaa.

*Jesosaa sohuinano huoojeajji poanija echacojji huaquia mee ca'yonaje
(Noca 7.1-10)*

⁵ Quijje Jesosa Capenaoma huasijke poqui'yonaje. Jomajo oe dejja sohuinano quea huiso nee, 100 huoojeajji poani Jesosa que poeyanaje. Oya pea, Jodio dejja pojjeama. ⁶ Ohuaya Jesosa huohui neinei canaje jama ba'a: –Jesosa, ecuea epeeiji, ¡shajja'ajjacue mo che! Ecuea echacojji poani quea mano nee nee ecuea equijo jaa. Jeo'yo ajja poanaje. Quea yami nee nee jaa –poanaje.

⁷ Jesosaa oya saja'a canaje jama ba'a: –E'e, eya poquije miquea equi yasijke miquea echacojji poani huaquia mee'yohua.

⁸ –Chojja, Jesosa –sohuinano huoojeajji poanaje-. Miya Jodio dejja quea pame nee nee poanijo ¿apiojji ecuea equi yasijke dobiquije? Eya Jodio pojjeama; quea pame pojjeama. Miya jjahuaquiameequi'yojji nei nei. Jamajjeya ecuea echacojji quea huesha jaa. ¡Miyaya jiquiojo tii nequiya huohuicue! ¡Huaquia mee'yocue!

⁹ E'e, jamaya poani ba'a: Pea emeshi mese cuaa eya huoojea cani. Ojaya esohui jama eyaya aña. Pea'ai eyaya sohuinano cuana huoojeaña. Eya huoojeajje poquije. Eya iyaajje pea sohuinano poeje. Eya huohuajje ecuea

echacojji chacochacoje ej. Jamajjeya miya huohuiajje ecuea echacojji jjaajaquije'yo, de.

¹⁰ Shajja'ajja majje Jesosa quea bihui nee nee poanaje. Oijaña cuana huohui canaje: — ¡Shajja'ajjacue! Jiquio dejja Jodio pojjeama. Jamatii Eyacuiñajji nijje jjapeequiani e'e jojo nei. Miya ca mi ca oe, oe pojji jjashahuabaquiani Eyacuiñajjijo. ¹¹ E'e de, quea huiso dejja cuana Jodio pojjeama ojjaña meshijo ba'e enijje jjapeequije'yo. Eyajo eya Emeshi Mese oe nei poaje, oya cuana ojee ijija'ijjiaje Jodio etiiquiana cuana nijje, Amajama nijje, Isaaca nijje, Jacobo pea'ai nijje. ¹² Beca Jodio cuana ca ca jjashajja'ajjaqui ajja jjejojo enijje eba'eiji pojjeama. Eyacuiñajjiya oya cuana jeacuayajea caje'yo quea misi nee yasijke. Jomajo pa neineije'yo. Quea yenohua jjejojo ese' ijjiayaijea caje'yo —Jesosa poanaje.

¹³ Jamajjeya sohuinano huoojeajji acanaje: — ¡Poquicue miya miquea equi yasijke! Miquea eba eya ejjaajaquimee'yojji nei nei. Jamajjeya eyaya miquea echacojji jjaajaqui meeje'yo.

Jesosa mimianijo tii sohuinanoja echacojji jjaajcuaqui'yonaje.

Quea huiso cuana huaquia mee ca'yonaje Jesosaa

(Macoso 1.29-34; Noca 4.38-41)

¹⁴ Majoya Jesosa poquinaje Penoja equi yasijke. Penoja ano ba canaje quea quiyo nee nee jaa. ¹⁵ Emanojaa me' napa cajje jjaajaqui'yonaje. Boe canana'yonaje. Jamajjeya anisohua'yo maje Jesosa, pea cuana pea'ai bobia canaje, Penoja anohua.

16 Majoya aje oe sinecua dejja cuaa quea huiso niñepoqui cuana Jesosa que ye canaje. Jesosaa eshahua cuana huoojeacuayajea ca'yonaje: — ¡Cuayaqui'yocue, oe! —poanaje.

Jesosa mimi jeahuajo, o niñepoqui po meeiji poani cuayaquinananaje. Ojjaña emanojaa cuana jjaajaqui mee ca'yonaje, huaquia mee ca'yonaje pea'ai, Jesosaa. **17** Jamaya poanijo Jesosa Isaiaja esohui yahuajo nei jayojja jama aca'yonaje. Isaiia Eyacuiñajija esohui huohuijji yahuajo nei nei Jesosa Quitojo jama poa ba'a:

“Ohuaya ecuana quea mano poanijo, quea nee pea'ai poanijo, quea jaji nee po mee ca'yonaje; huaquia mee ca'yonaje”.

Isaiaa jamaya aca poa yahuajo nei nei Jesosa Quitojo.

*Beca cuana Jesosa nijje poqui sa poani
(Noca 9.57-62)*

18 Pea pojargo quea huiso dejja cuana Jesosa que jjachichaquinaje. Poqui sa poanijo Jesosaa ojaya epreejji cuana huohui canaje: —Cua'a ¡bae ojje miji yasijje besapoquicue!

19 Poqui jjimahuajo oe dejja Jesosa que poeyanaje, Moisesija etehue'yo huohuijji poani. Ohuaya Jesosa huohui neinei canaje: —Miya esohui huohuijji quea pame nee. Eya miquea epreejji nei poaje'yo. Minijje tii eya po'ayequi sa poani —poanaje.

20 Jesosaa oya saja'a canaje jama ba'a: —E'e pojja'a, de. Eya ojjaña cuanaja Edoe Mese poani. Jamatii ecuea equi chama' ejomishocajji, de. Samao

ca ca oja jjanijo cahuijaa. Cuichoiji cuana pea'ai oja ejajo cahuiani. Jiquiojo ecuea equi chama'!

²¹ Majoya Jesosaja pea epeejji poeyanaje o que. Ohuaya Jesosa huohui canaje: —Ecuea esohui huohuijji, eya ecue chii cuiña poaje so'o. Oya etii nei nei. Quije oya mano'yajo ohuajeaje'yo. Majoya aje mo oe minijje poquije'yo chacochacohua.

²² —Chojja —Jesosaa oya saja'a canaje—. Pea cuaa, Eyacuiñajjija epeejji pojjeama cuaa mique chii cacuiña cahua; ohuaya camojea cahua mano'yajo. ¡Jjeyahua nei enijje po'yocue!

Beni pajiji

(*Macoso 4.35-41; Noca 8.22-25*)

²³ Majoya Jesosa bishe ai yasijke nequisohuaqui majje ojje besapoquinaje. O shajja'ajjajji cuana nijje besapoquinaje. ²⁴ O besapoquianijo beni quea quemo nee nee poeyanaje. Enashajohua bishe nanejea canaje. Jeasohuajea canaje. Bishe ai iyedojjojo Jesosa cahuijaanaje. ²⁵ O shajja'ajjajji cuaa Jesosa ishe acanaje. Jama poanaje ba'a: —Emeshi Mese Jesosa, ¡shequicue oe! ¡Coya aje se hui'i'ya! —taaanaje.

²⁶ Shequi'yo majje Jesosaa oya cuana saja'a canaje: —¿Apiojji acuae nequiana quea mete nee nee poani? ¿A'a mi ejo e'e nei pojjeama poani?

Jamaya mimi majje Jesosa nequisohuanaje. Beni tecuea canaje: —¡Beni, jamaya, nequioquequicue oe!

Majoya bae ena nijje jama poanaje ba'a: —¡A'a enashajo pojji! ¡Enashajo popajea'yocue!

O jama mimime poajo, enashajo popajea'yonaje. Beni popajea'yonaje. ²⁷ Jamajjeya

bishe aijo anica Jesosajo quea bihui nee nee poanaje. Ojee mimimiminaje jama ba'a: —¡Ache dejja shai jiquio quea sohui poja nee nee! Beniya, enashajo cuaa pea'ai oja sohui shajja'ajja cani, de.

*Eshahua ojo nequiajо, dejja quea mase nee Jesusaa niñe poquipajea mee ca'yonaje
(Macoso 5.1-20; Noca 8.26-39)*

²⁸ Jesosa bae ojje miji yasijje ba'eñaquinaje, Jjanana meshi yasijje. Majoya beca dejja Jesosa que poeyanaje. Oya cuana ba'enaje mei jjanijo, ma emano'yo cuana sajaajo. Eshahuua oja eyami yasijje dobiquinajejo, quea mase nee nee, niñepoqui poanaje. O ani chipi nei jjayejjequi ca ajja pea cuana. ²⁹ Niñepoqui cuana Jesosa ba majje taaanaje jama ba'a: —Miya Eyacuiñajjiya Bacua Ejja. ¿Apiojji miya ecuana que poeyanaje? ¿A'a jjeyahua nei ecuana cuaqui yasijje jeajeaje'yo? Eyacuiñajjiya eshahua cuana cuaqui yasijje huoojea caje'yo quijje, jjeya nei pojjeama, de —taaame poanaje niñepoqui.

³⁰ Quea chipi nee cuichi cuana quea huioso ijija'ijija nequi. ³¹ Eshahua cuaa Jesosa jama huohuime acanaje ba'a: —Miyaya ecuana dejjajo nequi cuayaqui mee'yo majje ¡cuichi cuana huasi-jje ecuana huoojea'yocue!

³² —E'e, ¡poquicue cuichi cuana huasijje! ¡Dobiquicue! —Jesosa poanaje.

Jamajjeya dejja cuana jeanana'yo majje eshahua cuana cuichi cuana huasijje dobiquinaje, ojjaña. Dobiqui majje cuichi cuana cuajicuaji jaaoquequinanananje. Bae quea sahua doe nee nee yasijje cuichi cuana hui'i'yonaje, ojjaña.

33 Ba majje cuichi jaahuanajji cuana jjajja-soaquinaje. Cuajicuajipoquinaje cuiñajji yasisjje. Ojjaña cuana ma cuiñajjijo ba'e huohui capoquinaje. Eshahua cuanajo, cuichi cuanajo, dejja cuana niñepoqui jjima' po mee canaje pea'ai huohui canaje. **34** Jamajjeya ojjaña cuana ma cuiñajjijo ba'e quea mete poeyanaje Jesosa que. Jesosa quea sohui poja nee nee jojoya ojjaña onijje quea mete miminaje jama ba'a: —¡Poquicue miya pea meshi yasijje!

Ojjaña ojo quea mete poanijo Jesosa ojje besapoqui o'oyanaje.

9

*Jesosaa pea emanojaa jjaajaqui mee ca'yonaje,
quibojjisha*

(*Macoso 2.1-12; Noca 5.17-26*)

1 Jamajjeya Jesosa bishejje besapoqui o'oyanaje ojje miji yasijje, Capenaoma huasijje. **2** Jomajo pea dejja cuaa quibojjisha quea mano nee jaa ye canaje Jesosa que, equipajaajjijo. Ma ba majje Jesosa jjashahuabaquinaje jama ba'a: —E'e, jiquio dejja cuana jjashahuabaquiani eya ejjaajaqui mee'yojji nei nei.

Jamajjeya Jesosaa emanojaa huohui canaje: —E'e ecuea epeejji, ¡quea bihui nee pocue! Eyaya miquea mimishi cuana cuijea'yonaje.

3 Jesosaja esohui shajja'ajja majje Moisesija etehue'yo huohuijji poani cuana quenequenenaje. Jjashahuaba taiquinaje jama ba'a: —¡De! Jiquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi.

⁴ Jamajjeya Jesosa ojaya ejjashahuaba taiquijji ba majje jama poanaje: —¿Yajjajje acuae qui ana quea quene enijje poani so'o? ⁵ ¿Ache shai quibojjishajo quea camaja eyaya anaje? ¿A'a ojaya mimishi cuijea'yoiji quea camaja? ¿A'a jja oya nequisohua meeje'yo eyaya? Ba'ajja —Jesosa poanaje—. ⁶ Jamajjeya eyaya ojjañaja Edoe Meseya miquianaya ba meeña eya ca ca iña Emeshi Cuiñacoojji quea ca'a nee nee nequi. Jamajjeya eyaya mimishi cuijeaje'yo nequianaja.

Majoya Jesosaa quibojjisha acanaje: —¡Nequisohuacue! ¡Miquea equipajaajji bebo majje miquea equi yasijje poquicue!

⁷ Jjeya nei quibojjisha nequisohua majje jeo'yonaje. Jeojeopoquinaje ojaya equi yasijje. ⁸ Ba majje ojjaña cuana quea bihui nee nee poanaje: —¡E'e nei, joya quibojjisha jeo'yonaje jjeya nei! ¡E'e e, Eyacuiñajji nijjeya Jesosaa emanojaa cuana huaquia mee ca'yani! ¡Mimishi cuijea mee ca'yani pea'ai! —poanaje ojjaña.

*Jesosaa dejja Mateo bajjani iyaa canaje
(Macoso 2.13-17; Noca 5.27-32)*

⁹ Majoya Jesosa poquinaje pea cuiñajji cuana huasijje. Poquijeya Mateo ba canaje equi ejjeshejjji jaahuanajji jo ani. Mateo ona sose jjeshejji poani, eba'ejji sosejje. Ojjañaja emeshi meseja esohuijo jjeshe mee cani, dejja cuana eba'ejji sosejje. Ba majje Jesosaa Mateo iyaa canaje: —Mateo, ¡enijje po'yocue!

Jamajjeya Mateo nequisohua majje Jesosa nijje poqui'yonaje.

10 Majoya Mateohua ojaya epeejji cuana iyaa canaje ojaya equi yasijje e'ijjia'ijjiajji Jesosa nijje. Jamajjeya Jesosa o shajja'ajjajji cuana nijje Mateoja equi yasijje poquinaje ijjia'ijjiaa. Quea huiso dejja cuana Mateo jama ona sose jjeshejji poani, dejja mimishi cuana pea'ai poquinaje. Ojee ijjia'ijjia'aninaje Jesosa nijje, Jesosa shajja'ajjajji cuana nijje pea'ai. **11** Ba majje Jodio esohui huohuijji Paniseo cuana Jesosa shajja'ajjajji cuana nijje mimijajinaje jama ba'a: —¿Apiojji miquea esohui huohuijji ijjia'ijjiani dejja mimishi nijje, ejjeshejji chichajji cuana nijje pea'ai? ¿Apiojji, de?

12 Jesosaa oya cuana shajja'ajja canaje. Huohui canaje: —¿A'a dejja cuana quea mano pojjeama eshicuijji quiqajji sa poani? Quea mano poanijo ca ca eshicuijji quia cajji. Jamaya miquianaya joya mimishi'ama poso jjabaquiani ecuea esohui shajja'ajja sa po ajja. Mimishi cuaa ca ca shajja'ajja cani. Jamajjeya eya dejja quea mimishi nijje jjapeequiani quea ja'a nee epo meeiji. **13** ¡Bacue oe! Siajjepojji jama poani ba'a: “Eya ca ca iña quea pame nee, mimishi'ama nei nei”. Jamajjeya joya quea pame poso jjabaquiani ecuea e'iyaa'yoyjji pojjeama enijje ejjapeequijji. Chojja. Eya poeyanaje dejja joya quea mimishi nee nee iyaaa, mimishi pajea mee'yoyjji. Jamajjeya esohui etehue'yojo jjabahuejjaquicue jama ba'a: Yahuajo nei nei Eyacuifajjiya Osea tehue mee ca poa jama ba'a:

“Huo cuana cuia cani. Cuia majje na sho cani e bihuajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue mee ca poa yahuajo —jamaya Jesosaa Paniseo cuana acanaje.

*Bobi ijja jjima yajjijo huohui'ajja canaje cuaa
(Macoso 2.18-22; Noca 5.33-39)*

¹⁴ Majoya Huani, ma ona besameejji poa ejeanobiajea jaa. Ojaya eshajja'ajjajji cuana poeyanaje Jesosa que. Jama huohui'ajjame acanaje ba'a: —Ecuana, Paniseo cuana pea'ai Jodio etiiquianaja esohui jama poanijo bobi ijja'ijja jjima ani Eyacuiñajjijo jjashahuaba neineiquianijo, onijke mimi neineianijo. Jesosa, ¿apiojji acuae mi mi shajja'ajjajji cuana jama po ajja? —oya cuana poanaje beshahua nei quea tecue.

¹⁵ Jesosaa oya cuana saja'a canaje: —Chojja, eya ecuea epeejji cuana nijje yanijo ca'ijja cahua. Ejjuhuanaquijjijo yahueja epeejji cuana onijke yanijo ca'ijja'ijjiaquiahua. ¿A'a yahueja epeejji cuana onijke yanijo quea yeno? Chojja. Quea bihui nee. Yahue poqui'yajo ca ca oe ojaya epeejji cuana ijja'ijja sa po ajja poaje, quea yeno jjejojo jjashahuaba neineiquiani. Eya jiquio ecua yahue poquiani jayojjaya jama poaje: Quijje eya poqui'yo majje ecuea epeejji cuana Eyacuiñajjijo jjashahuaba neineiquianijo ijja'ijja ajja poaje.

¹⁶ Majoya Jesosaa huohui canaje pea esohui ejjashahuabaqui meejjji: —Eseyaya baacojja esee'yohua caca ajja bishe eyacuajo. Cho. Baacojja etii enajo nequi see'yani, ca'a'ama. Jjasajajeaquije'yo. Bishe ihuicuajicuajije. Bishe eyacuajo ca ca baacojja eyacuua cacaña.

¹⁷ —Pea'ai ena sese cuatatanijo iya ajja meshimisi etiijo. Ena sese cuatata neineianijo,

meshimisi ca'a'ama jjaajajeaqui majje ena sese jjashojeajeaquiye'yo. Cho, ena sese cuatatanijo meshimisi eyacua quea ca'ajo iya cajji.

Jamaya Jesosaa huohui canaje o jjabahuejjaquiji ba'a: Ojaya esohui eyacua quea ja'a jama ca'a cahua. Jamajjeya Eyacuiñajjiya oya cuana quea boejea nee ba caje'yo.

Epona sho'i emano'yo jaa Pea epona najji poani tii tii

(Macoso 5.21-43; Noca 8.40-56)

¹⁸ Jesosa jamaya dejja cuana nijje mimianijo, pea Jodio dejja o que poeyanaje, ma Jodioja ojee ejjachichaquijji equi jaahuanajji poani. Ecui'oshajjajo nequinaje o bihuiajji. Jama poanaje ba'a: —Esohui huohuijji, ecuea ebacua piona mano'yonaje jjeya nei. ¡Poecuajicue o napa'ajja emeya! Jamajjeya oya shequije o'oya, de.

¹⁹ Nequisohua majje Jesosa epona sho'ija chii nijje poquinaje. Jesosa shajja'ajjajji cuana onijje poquinaje pea'ai. ²⁰ Jesosa poquije oe eponaa ba canaje. Oya quea mano, najji popajea'yo ajja. Ome miji pea beca, 12 eshequiajame na cuayapajeaqui'yo ajja poa. Jesosa que quehuajje poeyanaje. Ohuaya oja daqui cuema iña canaje, emeya. ²¹ Jjashahuabaquinaje jama ba'a: —Eya Jesosaja daqui cuema iña majje najji popajeaje'yo.

Ohua daqui cuema iña cajje Jesosa jjabajeaquinaje. ²² Epona nama'yo ba canaje. Jama poanaje onijje ba'a: —She, ¡quea bihui nee pocue! Miya quea ja'a jjashahuabaquinaje ejo jama ba'a: “E'e jojo nei Jesosaa eya najji popajea

mee caje'yo". Jamajjeya eyaya miya najji popajea mee'yonaje.

Jamajjeya ma epona najji popajea'yonaje.

²³ Majoya Jesosa equi jaahuanajjija equi yasijke poquinaje. Dobiquinaje. Ba cañaquinaje quea huiso dejja cuana, ponaña pea'ai equijo nequi. Epona sho'i emano'yojo ojee pa'ani. Ojjaña quea shajjaquijjo poani. Dehue mia cani emojea'yojjijo pea'ai. ²⁴ Jesosaa ojjaña cuana huoojeacuayajea canaje: —¡Cuayaquicue nequiana esecue yasijke! Jiquio epona sho'i cahuijaa; epoquijeyo'yo pojjeama —poanaje.

—Chojja de. Oya mano'yonaje, de; shequi'yo aija —poanaje cuana.

²⁵ Ojjaña cuana esecue yasijke cuayaqui'yajo, Jesosa epona sho'i jaa huasijke dobiquinaje, pea equecuayiji yasijke. Me' iña majje epona sho'i shequi mee ca'yonaje. ²⁶ Jamajjeya ojjaña ma meshijo ba'e yasijke huohuiqui canaje cuaa: —¡Jesosa jjashequi meequi'yojji, de! ¡Jiquio epona sho'i ma emano'yo poanaje shequi'yonaje! —poanaje.

Jesosaa beca dejja cojjama' quea cojja ja'a po mee ca'yonaje

²⁷ Quijje pishana Jesosa ma equijo ani cuayaqui'yonaje. Ejiojjije poquianijo beca dejja o quiquipishiji poquinaje, cojjama' cuana. Taaanaje jama ba'a: —Jesosa, miya emeshi mese Dabija bacua. ¡Ecuanojo jjashahuabaquicue! ¡Cojjajji mo po mee'yocue!

²⁸ Jesosa pea equi yasijke dobiquiajo cojjama' cuana o que poeyanaje. Jesosaa oya

cuana huohui'ajja canaje: —Miquianaya ejo jjashahuabiquiani jama ba'a: “E'e, Jesosa ca ca quea cojja ja'a jjapo meequi'yojji, de”.

—E'e, Jesosa, miya quea cojja ja'a jjapo mee-qui'yojji —poanaje cojjama'!

29 Jamajjeya Jesosaa ojaya ecojja napa'ajja canaje emeya. Huohui canaje jama ba'a: —E'e, miquianajaya ejjashahuabiquiji ejo quea ja'a nee nee. Jamajjeya eyaya cojjajji po meeje'yo nequiana.

30 Jjeya nei quea cojja ja'a nee nee po'yonaje. Jesosaa huohui neinei canaje pea'ai: —E'e, eyaya miquianaya quea cojja ja'a po mee'yonaje. Jamatii ja'a jihuohuijji so'o! —acanaje.

31 Jamatii poqui majje huohui poanaje ojjaña huasijje: —¡Jesosaa ecuana quea cojja ja'a nee nee po mee ca'yonaje, de! —jamaya poanaje.

Dejja mimi'ajja mimi mee ca'yonaje Jesosaa

32 Majoya ma cojama' poanaje cuana poqui'yajo, pea cuaa dejja mimi'ajja jjequi canaje Jesosa que. Eshahuaa oja yami yasijje dobiQUI majje mimi'ajja po mee canaje. **33** Jesosaa eshahua huoojeacuayajea'yo majje dejja mimi'ajja quea ja'a nee mimi o'yanaje. Ba majje ojjaña cuana quea bihui nee nee poanaje. Miminaje jama ba'a: —¡Chama' beca dejja Jesosa jama, de! Ohuaye nei eshahua huoojeacuayajea ca'yani, mimi'ajja mimi mee ca'yonaje, de —poanaje.

34 Jamatii Paniseo cuanaa Jesosa quehua niñeba canaje. Jama acanaje ba'a: —Chojja de, Jesosa

eyamiquecua poja'a. Pea eshahua huoojeacuaya-
jea mee cani Edosiquiana nijjeya –siajje pome
poanaje.

*Jesosa Quito ojjaña cuanajo jjashahuabaquinaje
quea yeno*

³⁵ Jamajojoya Jesosa poquinaje ojjaña cuiñajji
quea quemo huasijje, ojjaña cuiñajji sisi cuana
huasijje pea'ai. Jodioja equi ojee ejjachichaquijji
cuana huasijje dobiquinaje esohui huohuiya.

—Eya quijje eyajo ojjañaja Emeshi Mese oe nei
poaje'yo —Jesosaa acanaje.

Ojjaña quea mano jaa jjaajaqui mee ca'yonaje,
huaquia mee ca'yonaje pea'ai. ³⁶ Dejja cuana quea
huiso nee nee jjachichaquinaje o que. Jesosaa
oya cuana ba canaje ñajjajja jama. Ejaahuanajji
quea pame chamajo ñajjajja nequi mee ajja quea
pame nee. Jamaya ojjaña cuana quea yeno poani;
eba'ejji quea camaja ba'yani, ejaahuanajji quea
pame chama' pea'ai, de. Jamajjeya Jesosa ojjañajo
quea yeno poanaje. ³⁷ O shajja'ajjajji cuana nijje
miminaje dejja cuanajo. Jama poanaje Jesosa
ba'a: —Anoso quejo jahua majje echacojji cuanaa
cachicha cahua. Dejja cuana anoso jahuajahua
jayojja jama, quea huiso nee nee. E'e de, jjeya
ojjaña cuana jjashahuabaquiani e'e jojo nei epojji;
shajja'ajja caje eya Emeshi Mese nei poeyanaje
o jaahuanaa. Jamatii oe pojji Eyacuiñajjijo chaco
sa poani. ¿Aya acuae oya cuana jjabahuejjaqui
mee caje'yo Eyacuiñajjijo? ³⁸ Jamajjeya ¡Eyacuiñajjijo
nijje mimicue! Jama acue ba'a: “Eyacuiñajjijo,

¡huoojeacue oe miquea echacojji cuana esohui huohuiya, pea cuana minijje ejjapeequi mee'yojji!" — Jesosa poanaje.

10

Jesosaa iyaa canaje o shajja'ajjajji cuana 12 hui-some

(*Macoso 3.13-19; Noca 6.12-16*)

¹ Jamajjeya Jesosaa o que iyaa canaje o shajja'ajjajji cuana. Oya cuana quea ca'a po mee canaje eshahua cuana huoojeacuayajea mee'yojji, ojjaña emanoja cuana huaquia mee'yojji, ejjaajqui mee'yojji pea'ai.

² Jesosa shajja'ajjajji nei 12 poa, yohua bajjani ba'a: Simohui ojaya pea bajjani Peno, oja chahua Anesi; Semeneoja bacua ejja Jacobo, oja chahua Huani; ³ Penipe, Matonome, Tomasi, Mateo ma bejjio chichajji emeshi mesejo poa; Apeoja bacua ejja Satiaco; ⁴ Simoni Senote; Nemeo ojaya pea bajjani Taneo; Jodasa Isicaniote, ma Jesosa iña meesahua-jji poanaje dejja mimishija quecua'yojji. Mahuiso Jesosaa babaca ca'yonaje ojaya esohui huohuijji epojji.

Jesosaa o shajja'ajjajji huoojea canaje esohui huohuiya

(*Macoso 6.7-13; Noca 9.1-6*)

⁵ Jamajjeya Jesosaa jiquio 12 huoojea canaje onijje chacohua. Jamaya huohui canaje: — ¡A'a poquijji Jodio dejja pojjeama cuanaja meshi yasijje! ¡Dejja cuana Samania meshijo ba'e cuana huasijje pea'ai a'a poquijji jjeya!

⁶ Chojja, ijjeya poquicue Jodio cuana huasijje!

Oya cuana poquiquehuana; Eyacuiñajji nijje jjapeepajequinaje ñajjaja epoquiquehua jayojja jama, de. ⁷ Ojjaña cuana huohuicue jama ba'a: “Jjeya Jesosa ojjaña huoojeajji poani” acue. ⁸ ¡Emanojaa cuana jjaajaqui mee'yocue! ¡Emano'yo cuana shequi mee o'oyacue! ¡Dejja batata epo'yo cuana jjajeaqui mee'yocue pea'ai! ¡Eshahua cuana dejja cuana huasijke dobiquiajo huoojeacuaya'jea'yocue pea'ai! Eyaya miquianaya huaquia meesahuaña pea dejja cuana sosema!. Jamajjeya ¡pea cuana quea bihui nee oe huaquia mee'yocue sosema!! ⁹ Jjeya jejjeshejji, mei huo'o pea'ai, bejjo pea'ai a'a dojodzi! ¹⁰ ¡Bashosoco bobi dojodzi a'a dojodzi! ¡A'a beca daqui dojodzi! Miquea ejiojjijo nequi ejiojjiji shejee dojocue! ¡Oe acui ejjaquecuaca'aquijji dojocue, beca pojjeama! Miquea esohui shajja'ajja majje pea cuaa miya cabobia cahua. E'e, miyaya esohui huohuiañajo, bobi caquia cahua. ¹¹ Miquianaaya pea cuiñajji yasijke poqui majje ¡sa'ajjacue oe dejja miquea epeejjii epojji, joya bei bei! ¡Ojaya equijo anicue ma cuiñajjijo ani majje! ¹² Ojaya equi yasijke dobiqui majje huohuicue jama ba'a: “¡Eyacuiñajjiya miquianaya cajaahuana cahual!” ¹³ Ojjaña ma equijo ba'eya miya quea pame nee acajo, Eyacuiñajjiya miquea esohui jayojja jama oya cuana jaahuana caje. Miya quea pame nee mi ba'e mee cajo, cho; Eyacuiñajjiya oya cuana ejaaahanajji pojjeama. ¹⁴ E'e pojja'a beca equijo, beca cuiñajjijo miquea esohui shajja'ajja sa po'yo ajjajo, niñeba cani pea'aijo, joya cuana jeajeana'yocue! Poquije'yohua jama acue ba'a:

“Eyaya miquianaya cajaa aje'yo, ¡quea mimishi mi coma. Eyacuiñajjiya miya ba cani quea mimishi nee nee. Ohuaya miya quea nee nee po mee caje'yo” acue —Jesosa poanaje—. ¹⁵ Eyaya miya e'e jojo nei huohuaña jama ba'a: Quijje Emeshi Mese nei poeje o'oya, ojjaña quea mimishi poani quea nee nee po meeje'yo. Yahuajo nei nei dejja cuana Sonomajo ba'e, Jomoshajo ba'e pea'ai quea mimishi nee ba'yanijo, Eyacuiñajjiya quea nee po mee ca'ya poa, yahuajo. Ma dejja shajjama' cuana ca ca Eyacuiñajjiya quea nee nee po tiitii mee caje'yo, de. Sonomajo ba'e cuana ca ca quea nee pishana po tiitii mee caje'yo.

Quijje dejja cuana quea mase nee poaje

¹⁶ Jesosaa o shajja'ajjajji cuana huohui canaje pea'ai: —Eyaya miya huoojeaña dejja quea mase ibia jama huasijke. Miquianaya quea beiyo ohuaya mi napa ca chana'. Jamajjeya ¡quea jjashahuabaqui ja'a pocue! ¡Quea bei pocue; mimishi'ama pea'ai! ¹⁷ ¡A'a pajea'yojji dejja cuana quea mase poaje'yo minijje! Miya iña majje doyo caje Jodio etii ani yasijke jeanobiaa. Janobajjima nei cuia caje Jodioja equi ojee ejjachichaquijjijo. ¹⁸ Miya cuana enijke jjapeequianijo doyo caje cuaa pea emeshi mese cuana huasijke, ona huoojeajji nei nei yasijke pea'ai. ¡Jamajjeya miquianaaya esohui quea pame nee ejo huohuicue ona huasijke, Jodio pojjeama cuanaja ejjhahuoojeaquijji nei nei yasijke pea'ai! ¹⁹ Doyo majje huohui'ajja caje jama ba'a: “¿Ae poani miquianaya?” Jamaya acajje ja'a quea mete pojji! A'a jjashahuabaquijji jama ba'a: “¿Ae shai eyaya huohuije?” ²⁰ E'e nei Eyacuiñajjiya

miya mimi meesahua caje. Ohuaya huoojea caje Edojjoshahua Pame mi que. Edojjoshahua Pameya miquianaya huohui meesahua caje – Jesosa poanaje.

²¹ –E'e, quijje pishana dejja cuana, ponaaña pea'ai quea mase nee poaje ecuea epeejji cuana ni-jje. Jamajjeya e'o'i mese oja chahua iña meesahua caje'yo onajaya equecua'yojji. Ejeajji cuaa jamaaya acaje'yo oja bacua. Ebacua cuana shajjama' poaje. Dejja mase oja chii, oja enaese pojja'a iña mee caje'yo equecua'yojji. ²² Miquiana enijje jjapeequianijo, quea huiso cuana quea quene nee nee poaje'yo minijje. Jamatii enijje jjapeequi pajea'yo ajjajo nequi tiitii meeje'yo enijje eyajo, eya ojjañaja Emeshi Mese oe nei, ejjahuoojeaquijji nei nei poaje. ²³ Dejja cuaa oe cuiñajjijo ba'eya miquianaya janobajjima napa cajo, ipoquicue pea cuiñajji yasijje! Eyaya miya e'e jojo nei huohuiaña: Ojjaña Jodio dejja cuanaja cuiñajji cuana huasijje poqui jjimahuajo, ojjaña cuana huasijje ecue so-hui huohui jjimahuajo pea'ai eya, ojjañaja Edoe Mese poeje o'oya –Jesosa poanaje.

²⁴ –Ojjaña cuana enijje quea mase poani. Jamajjeya minijje quea mase poaje pea'ai e shajja'ajjajji poani jojoya. ²⁵ Echacojji poani o chacomeejji ni-jje chacochoanijo, pea cuaa echacomeejji napa cajo, echacojji poani pea'ai napa caje cuaa. ¿A'a e'e? Dejja mimishi cuana ejo siajje poanaje jama ba'a: “Miya Edosiquiana Meesemo bajjani”. Jamaaya enijje quea tai mimijajianijo quijje quea tai nee nee mimijajije minijje ecuea epeejji poani jojoya. Jamajjeya miya e jayojjaya acaje'yo; jjamatii quea bihui nee pocue! –Jesosa poanaje.

¡A'a quea mete pojji dejja cuanajo!
(Noca 12.2-7)

²⁶ —Jamajjeya dejja mimishi cuanajo ¡a'a quea mete pojji! Ojjaña esohui quehuajje acani, pea cuanaja shajja'ajja jjima, quijje shajja'ajja caje. Ojjaña quehuajje amajje quijje ojjaña ba mee caje'yo.

²⁷ —Jjeya eyaya esohui huohuiaña miquiana huasijje, ma pea cuanaja shajja'ajja jjima. Quijje pishana miquianaaya ojjaña huasijje huohuiquije ecuea esohui. ¡Quea ja'a nee huohuicue! ²⁸ Ojjaña cuanajo, eshahua cuanajo pea'ai ¡a'a quea mete pojji! Oya cuanaa miya quecua caje'yo pojja'a. Jamatii, miquea edojjosahua mano meemee ajja. ¡Eyacuiñajji oe neijo jjashahuabaquicue! Shajjama' poajo ohuaya miya mano mee'yo majje cuaquí yasijje jea caje'yo miquea edojjosahua —Jesosa poanaje.

²⁹ —E'e —Jesosa poanaje—, beca anohuii jjeshe cajji beshahua nei sosema'. Nahue'ama nei cui-chojji cuana. Jamatii Eyacuiñajjiya, esejaya Chii-ya cuichojji cuana ba cani, bobo ijzia mee cani. ³⁰ Pea'ai ¿ache huiso ehuojoña miquea esapajo ba'e? Eyacuiñajjiya eba. Ojjaña ojaya ehuojoña esico, de. ³¹ Jamajjeya ¡a'a quea mete pojji! Cuichojji cuana Eyacuiñajjiya nahue'ama; miya ca ca ojaya quea nahue nee nee —Jesosa poanaje.

¡A'a quea bicho pojji Jesosa nijke jjapeequiani!
(Noca 12.8-9)

³² —Beca cuaa bicho'ama huohui cani: “E'e, eya ca iña bicho'ama Jesosaja epeejji e'e jojo nei”. Jamajjeya eyaya ecue Chii eyajo ani huohuije bicho'ama jama ba'a: “E'e, oya cuana ecuea epeejji

e'e jojo nei". ³³ Pea cuana quea bicho poani: "Cho, eya Jesosa Quitoja epeejji pojjeama". Jamajjeya eyaya ecue Chii eyajo ani huohuije jama ba'a: "Cho, oya cuana ecuea epeejji pojjeama. Cajaa" eyaya aje –Jesosa poanaje.

Ojjaña dejja Jesosajo ojee ba'e meemee ajja quea bei
(Noca 12.51-53; 14.26-27)

³⁴ –¡A'a jjashahuabaquijji eya poeyanaje ojjaña cuana ojjaña meshijo ojee quea bei ba'e meeya! Chojja, de. Pea cuana quea mase poaje ecuea epeejji cuana nijje. ³⁵ E'e, ecuea esohui ohua shajja'ajja canijo, oja chii nijje oja bacua ejja cuana quea quene poaje. Ecuea esohui jayojja jama ohua acanijo, oja enaese nijje ojaya ebacua piona quea quene poaje pea'ai. Enijke jjapeequianijo, oja ano nijje oja bacua ejjaja huanase quea quene poaje pea'ai. ³⁶ Jamajjeya ecuea epeejji ja huapa pojjeama cuana quea quene poaje onijje ecuea epeejji pojjeama jjejojo; pea cuana quea quene pishana poaje onijje –Jesosa poanaje.

³⁷ –Ojjañaa joya oja chii, ojaya enaese pojja'a quea jea nee nee acanijo eya quea jea pishana acani ecuea epeejji pojjeama, de. Pea'ai ojjañaa joya oja bacua ejja, oja bacua piona pojja'a quea jea nee nee acanijo eya quea jea pishana acani enijke jjapeequi meemee ajja. Cajaa. ³⁸ Eyaya Eyacuiñajji esohui huohuiña, pea cuana enijke quea quene poaje'yo. Dejja mimishiya enapa ca poani jjejojo enijke mi jjapeequiani. Ojjaña joya e jayojjaya ba'e sa po ajja ecuea epeejji pojjeama. E'e, jiquio ecua acui ecueata'apee quea

camaja e'abojji jama jayojja enijje jjapeequiyajo quea camaja poaje. ³⁹ Dejja mimishi cuaa ecuea epeejji quecuia ca chana'. Jamajjeya quea mete nee neejo enijje jjapeequi sa po ajja. Cuaqui yasijje dobiquije'yo tiitii. Joya enijje jjapeequiani ca ca dejja mimishi cuaa quecuia caje'yo pojja'a. Jamatii. Mano'yo majje enijje ba'e tiitiije'yo quea pame nee eyajo —Jesosa poanaje.

*Ojjaña joya quea pame poani sosequia caje'yo
quijje Eyacuiñajjiya*
(Macoso 9.41)

⁴⁰ —E'e —Jesosa poanaje pea'ai—, beca cuana minijje jjapeequije'yo miya ecue sohui huohuiañajo. Jamajjeya oya ecuea epeejji poani pea'ai. Eyacuiñajji e huoojeajji poani; ojjaña joya enijje jjapeequiani Eyacuiñajjiya epeejji poani pea'ai. ⁴¹ Quijje Eyacuiñajjiya ojaya esohui huohuiji sosequia caje'yo ojaya esohui huohui cani sosejje. Pea cuana ojaya esohui huohuiji nijje jjapee neineiquianijo, sosequia caje'yo esohui huohuiji jayojja jama. Ojjaña joya Eyacuiñajjiya epeejji nijje e'e jojo nei jjapeequiani Eyacuiñajjiya sosequia caje'yo quea pame nee oya quea pame nee poanijo. ⁴² E'e jojo nei ojjaña joya ecuea eshajja'ajjajji poani ba'e meesahua cani, ena e'ishijji quia cani pojja'a eya ojaya quea boti neejo, Eyacuiñajjiya oya quijje sosequia caje'yo oya quea pame nee poanijo —Jesosaa o shajja'ajjajji cuana huohui canaje mahuiso huoojea jjimahuajo.

11

*Huaniya Jesosa que huoojea canaje o
shajja'ajjajji cuana
(Noca 7.18-35)*

¹ Majoya Jesosaa ojaya ome miji becanejjiji pea'ai, 12 eshajja'ajjajji cuana huasijje esohui huohui majje pea cuiñajji quea chipi nee yasijje poquinaje esohui huohuiya.

² Yahuajo pea dejja cuaa Huani iña ca poa, ma ona besameejji poa. Dejja maseja equi ej-jajeanobiaquijji yasijje jeanobiajea ca poa, eme' jeyo'yo. Ejeanobiajaaa Huaniya shajja'ajja canaje onaja ehuohui'yo Jesosajo. Jamajjeya o shajja'ajjajji cuana huoojea canaje Jesosa que. ³ Oya cuana Jesosa huohui'ajjaña meequi canaje jama ba'a: —Jesosa, yahuajo Huaniya huohui canaje jama ba'a: “Eyacuiñajjiya Emeshi Mese nei ojjaña jaahuanajji huoojea caje'yo ecuana huasijje”. ¿A'a miya ma Emeshi Mese nei? E'e pojja'a ecuaa pea ishoaje. ¡Jamajjeya huohuicue miyaya! ¿Yajja shai ecuaa Huani aje'yo so'o? —Huanija eshajja'ajjajji cuana poanaje.

⁴ Jesosaa oya cuana saja'a canaje: —¡Poqui o'oyacue Huani que! ¡Ecuea esohui miquianaaya shajja'ajjaña, jiquio miya eya banajeya pea'ai oe Huani huohuiquicue! Jama acue ba'a: ⁵ “Huani, Jesosaa cojjama' cuana quea cojja ja'a po mee ca'yani. Jiojjijjajja jeo mee ca'yani. Dejja batata epo'yo cuana jjajeaqui mee ca'yani. Shajjaqueba pea'ai quea shajja ja'a po mee ca'yani. Emano'yo cuana shequi mee ca'yani pea'ai. Esohui quea pame nee huohui ca'yani ojjaña dejja quea yeno

huasijje". ⁶ E'e, eya Eyacuiñajjija huoojea'yo ojjaña jaahuanajji. Quea bihui nee capo'yahua ojjaña joya ejo jjashahuabaquiani jama ba'a: "E'e jojo nei Jesosa Eyacuiñajjija huoojea'yo ojjaña jaahuanajji". ¡A'a jjashahuuba quehuaquijji! —Jesosa poanaje.

⁷ Jamajjeya Huanija epeejji cuana poqui o'oyanaje Huani que. Majoya poqui'yajo Jesosa miminaje pea cuana nijje: —Yahuajo Huani meshi jabojo, quimajo aninaje. Miquianaya o que poquinaje. ¿Ae shai banaje miyaya? ¿Ae jjashahuabaquinaje Huanijo? ¿A'a jjashahuabaquinaje Huani esohui huohuijji quea ja'a pojjeama? Chojja. ⁸ Miquianaya Huani que poquinaje ¿ae baa? ¿A'a dejjaja daqui quea nahue nee ehuosho ba'e banaje? Chojja. Dejjaa daqui quea nahue nee huosho cani equi quea quemodo ba'eya. ⁹ ¿Achajja Huani ba'ya poa? ¿A'a miya jjashahuabaquinaje Huani Eyacuiñajjija esohui huohuijji nei nei? E'e, de. Jamatii Eyacuiñajjija esohui huohuijjiya ba cani oe pojji. Huanija eba quea huiso nee. ¹⁰ Yahuajo nei Eyacuiñajjija esohui etehue'yo Huanijo jama poa ba'a:

"Jiquio dejja ecuea esohui huohuijji nei poani. Jamaya eya sa poani. Eyaya oya huoojeaje ebionei, mi hui dojoriji. Ohuaya dejja cuana huasijje huohui caje miquea epoejjijo".

Jamaya yahuajo nei nei Eyacuiñajjija ojjaña ba mee ca poa Huaniya poe majje ejo jjabahuejjaqui mee caje cuana. ¹¹ Ecuea pea esohui a'a pajea'yojji jama ba'a: Ojjaña pea cuana quea pame. Huani ma ona besameejji poa quea pame nee nee. Jjeya pea chama' Huani jayojja jama. Jamatii

quijje eya Emeshi Mese nei poaje, ojjaña ecuea epeejji cuana Huani jayojja jama poaje'yo, quea pame nee nee. ¹² Eya poeyanajejo Huaniya ojjaña pojjajo ejo huohui canaje jama ba'a: "Jjeya nei Emeshi Mese nei Quito poeje". Jamatii dejja mase cuaa Huani napa cani ojjaña pojjajo. Eya, Emeshi Mese nei jeabichajea sa acani cuaa pea'ai. Oya cuana emeshi mese jayojja jama huohui sa poani –Jesosa poanaje.

¹³ —Yahuajo nei Eyacuiñajjija esohui huohuijji cuaa huohui ca poa, Moisesija esohui etehue'yojo jama poa pea'ai ba'a: "Quijje Eyacuiñajjija huoojea'yo ojjaña jaahuanajji Emeshi Mese oe nei poeje". Jamaya Huani miminaje. Jamaya pea cuana miminaje Huani poe jjimahuajo pea'ai. ¹⁴ E'e, yahuajo nei Eyacuiñajjija esohui huohuijjiya tehue ca poa jama ba'a:

"Ecuea ehuoojea'yo ojjaña jaahuanajji poe jjimahuajo, eyaya Enia huoojeaje ebionei, ehui dojodzi".

—Huaniya Enia jayojja jama huohui canaje, ma Eyacuiñajjija esohui huohuijji yahuajo nei nequia poa jama. ¹⁵ Jamajjeya ɬbacue; a'a shajjama' pojji, ca miquiana ba sa poanijo!

¹⁶ Ojjaña cuana jjeya nei ba'e ecuea eba. Oya cuana esho'i quiana quebanei poani jayojja jama. Quebanei poanijo jama poani: Esho'i cuaa pea esho'i taaa cani. ¹⁷ Jjamimihue'equiani jama ba'a: "Ecuaa dehue miaña epona ejjahueaquijjijo jama. Jamatii miquianaya majamaja ajja. Pea'ai e pa nishoanijo, emano'yojo pa'ani jayojjayajo, miquianaya pa nisho ajja. Jamajjeya miquianaya quebanei po ajja ecuana nijje" poani esho'i quiana

—Jesosa poanaje—. Jamaya miquianaya jjeya poani, de. ¹⁸ E'e, yahuajo pishana Huani poeyanaje. Eyacuiñajji nijje mimi tiitilianijo bobi ij{jia'ij{jia ajja. Ecahuishi ishi jjima pea'ai. Jamajjeya ojjaña cuaa huohui canaje ojo jama ba'a: “Huani jja ca niñepoqui jama”. ¹⁹ Eya ojjaña cuanaja Edoe Mese poeyanaje. Eya ca jja ca ij{jia'ij{jiani; ojjaña nijje mimimimiani. Jamajjeya miquianaya ejo siajje poani jama ba'a: “¡Bacue jiquio dejja Jesosa! Oya jejje ajja tii. Dejja mimishi nijje jjapeequiani, bejjo chichajji cuana nijje pea'ai, de”. Jiquio ecua esho'iquiana pea nijje jjapeequi sa po ajja jama jayojja miquianaya ecuana nijje jjapeequi sa po ajja. Miquianaya jjashahuaba quehuaquiani Huanijo, ejo pea'ai. Jamatii ecuanaa Eyacuiñajji ejjashahuabaquijjijo quea ja'a nee jayojja jama añajo ecuanaa quea pame nee aña —Jesosa poanaje.

*Beca cuiñajjijo ba'e cuana shajjama' poanaje
(Noca 10.13-15)*

²⁰ Quea huiso cuiñajjijo Jesosaa ma dejja cuaa ajjima acani ahuicha'a huicha'a canaje. Jamatii quea huiso cuana mimishi pajea sa po'yo ajja. Jamajjeya Jesosaa oya cuana tecuea canaje. ²¹ Jama poanaje ba'a: —Miquianaya quea mimishi nee nee. ¡Quea yeno nee nee miquianaya poaje Conasijo ba'e, Betesainajo ba'e pea'ai! Ma dejja ajjima acani eyaya ahuicha'a huicha'anaje miquianaja cuiñajji cuanajo miquea ebajji nisho. Yahuajo nei nei pea dejja cuana Tinojo, Sinonojo pea'ai ba'eja ojaya ba jjima eyaya ma dejja cuaa

ajjima aña. Eba jojjemo oya cuanaa mimishi cuana pajea ca'yo queaye mimishijo quea yeno po majje. ²² ¡Bacue oe! Quijje Eyacuiñajjiya ojjaña cuana sosequia caje'yo ojaya eba'e'yojji sosejji. Ohuaya yahuajo nei nei Tinojo ba'e cuana, Simonojo ba'e cuana pea'ai quea nee po mee caje'yo mimishijo. Miquianaya Conasiño ba'e, Betesainajo ba'e pea'ai ca ca quea nee nee po mee caje'yo ecuea esohui miquiaaya mi shajja'ajjajo. ²³ Miquianaya Capenaomajo ba'e quea pame poso jjabaquiani, jjashahuabaquiani jama ba'a: “Ecuna quea pame nee nee; pea meshijo ba'e cuana quea pame pishana”. Chojja, de. Siajje miya poani. Quijje Eyacuiñajjiya janobajjima nei napa cajje miquianaya quea yeno poaje. Eyaya ma dejjaajjima acani aña miquianajaya cuiñajjijo quea huiso. Jamatii miquea mimishi cuana pajea sa po'yo ajja. Yahuajo nei nei pea cuiñajji Sodoma bajjani yania poa. Eyacuiñajjiya ma dejjaja ba jjima acani eba jojjemo oya cuana quiyo jeyojeyo'yo jjima poqueaye. Jamatii jjeya Sodoma chama'yo tii. ²⁴ ¡Bacue oe! Quijje aje Eyacuiñajjiya ojjaña cuana sosequia caje'yo ma ecua oya po nequia poa jama. Ma pojajao ohuaya dejja cuana yahuajo nei Sodomajo ba'e quea nee po mee caje'yo quea mimishijo. Miquianaya Capenaomajo ba'e ca ca quea nee nee po mee caje'yo ecuea esohui miquiaaya mi shajja'ajjajo —Jesosa poanaje.

*Jesosa Quitohua eseya jomishoca mee caje
(Noca 10.21-22)*

25 Jamaya dejja cuana tecuea majje Jesosa es-eja Chii ai nijje miminaje jama ba'a: —Ecuea Chii, miya eyajo Emeshi Mese nei poani. Ojjaña meshi cuana miquea poani pea'ai. Eyaya miya bi-huiaña. E'e, beca cuana jjashahuabaquiani jama ba'a: “Ecuea eba quea huiso esohui, quea huiso aquiana pea'ai”. Jamajjeya miyaya oya cuana ba meesahua ajja. Jamajjeya oya cuanaja ba jjima eya Emeshi Mese oe nei poani. Pea cuana esho'i cuana jama ca ca miyaya jjashahuabaqui meesahuaña quea ja'a nee eya Emeshi Mese nei poani. Jamajjeya eyaya miya bihuiaña.

26 E'e ecue Chii, jamaya miyaya aña miquea ej-jashahuabaquijji. Apoa —jamaya Jesosa miminaje eseja Chii ai nijje.

27 Majoya Jesosa jama poanaje ba'a: —Eyacuiñaggi ecue Chii e huoojeajji epo. Eya ojaya esohui huohuijji poani. Ecue Chiija eyajo anija ecuea ejjashahuabaquijji ojaya eba nei nei, ojaye nei. Ecue Chiija ejjashahuabaquijji ecuea eba nei nei pea'ai, ecuee nei. Eyaya ecuea epeeiji ba meesahuaña quea ja'a nee ecue Chiija ejjashahuabaquijji —Jesosa poanaje.

28 —¡Enijke jjapeequicue quea bei! Mique mimishi cuanajo miya quea yeno. Miquea echaco quea camajajo miya quea yeno poani pea'ai. ¡Enijke jjapeequicue! Eyaya miya jomishoca meeje'yo camaja'ama eba'e'yojji. **29** Eyaya quiana ca ca oe miquianaya jama pojjeamaa jjejojo quea jea aña; tecue'ama; quea bei pea'ai. Ecuea epeeiji po majje miquianaya quea bei poaje'yo. Ba'e tiitii meeje'yo enijke eyajo pea'ai. Jamajjeya ¡ecuea esohui jayojja jama acue! ¡jjashajja'a'jjaquicue

quea ja'a nee ecuea esohuijo! ³⁰ Camaja'ama ecuea esohui jama eba'e'yojji. Ecuea esohui aquiana pejapeja e'abojji jayojja poani –Jesosa poanaje.

12

Esohui epojja ejomishocajjijo (Macoso 2.23-28; Noca 6.1-5)

¹ Majoya epojja ejomishocajjijo Jesosa o shajja'ajjajji cuana nijje ejiojjije poquinaje. Que yiyejje poquije quea shoe poanaje; quejo nequi anoso ai sejja canananaje eshe tii e'ijjiajji, o shajja'ajjajjiya. ² Maya Paniseo cuaa ba canaje. Jamajjeya Jesosa nijje mimijajinaje jama ba'a: – ¡Bacue oe! Mi shajja'ajjajji poani cuaa chaco cani. Anoso ai sejja cani epojja ejomishocajjijo. Moisesija etehue'yo jama poani ba'a: “¡A'a chacojji epojja ejomishocajjijo!”

³ Jesosaa oya cuana saja'a canaje jama ba'a: –¿A'a miquea ba jjima esohui etehue'yo emeshi mese Dabija? ⁴ Yahuajo nei nei ojaya epeejji cuana quea shoe po majje ojee Eyacuiñajji equi yasijje dobiquinananae. Ijjia ca poa ejji ecabeje, maya Eyacuiñajji yasijje quia ca poa cuaa ojaya ebajji. Jiquio ca oe Eyacuiñajji nijje mimianiya ca'ijjia cahua; pea cuanaja e'ijjiajji pojjeama. ⁵ ¿A'a miquea ba jjima Moisesija esohui etehue'yo? Jama poa ba'a: Ojjaña epojja ejomishocajjijo Eyacuiñajji nijje mimiani cuaa ca oe Eyacuiñajji equijo cachaco cahua. Jamatii mimishi'ama, mimijaji ajja, de; ojaya yajjijo cachaco cahua.

6 —E'e, eyaya miya e'e jojo nei huohuaña jama ba'a: Moisesija esohui Eyacuiñajjija equijo quea ja'a pishana yahuajo nei poa. Ecuea esohui ca ca quea ja'a nee nee —Jesosaa acanaje—.

7 E'e, miquianajaya Eyacuiñajjija esohui etehue'yo eba neinei'yo jojjemo dejja cuana mimishi'ama jjaniñebaqui ajja pome. Jamaya quea tai. Yahuajo Eyacuiñajjija esohui etehue'yo jama poa ba'a:

“Huo cuana cuia cani. Cuia majje na sho cani e bihuajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue ca poa yahuajo.

8 —Jamajjeya eya ojjañaja Edoe Mese Emeshi Mese nei poani. Eyaye nei huohuije epojja ejomishocajjijo; ¡quea pame nee nee acue! ¡Pea cuana quea jea nee acue! —Jesosa poanaje.

Meshahuama'yo epo jjameshahuanequi mee ca'yonaje

(*Macoso 3.1-6; Noca 6.6-11*)

9 Majoya Jesosa poquinaje pea huasijke. Equi ojee ejjachichaquijji yasijke dobiquinaje.

10 Jomajo dejja meshahuama'yo epo aninaje. Jamajjeya Jesosa ba majje Paniseo cuana jama jjashahuabaquinaje ba'a: —E'e pojja'a Jesosaa chaco caje epojja ejomishocajjijo; e'e pojja'aeme' jeapisa mee caje'yo epojja ejomishocajjijo. Caba'ajja sahua —poanaje Paniseo.

Jesosa nijje mimijaji sa poanaje. Jamajjeya oya huohui'ajja canaje Paniseo cuaa: —Jesosa, ¿a'a dejja quea mano jaa miyaya huaquia mee'yome epojja ejomishocajjijo?

11 —Epeejji cuana, e'e pojja'a miquea ñajjajja jjani quea doe yasijje oquequije epojja ejomishocajjiyo. ¿A'a miyaya ñajjajja iña majje ma pojjajo jjequisohuaje'yo? E'e, de. **12** ¡Bacue oe! —Jesosa poanaje—, dejja Eyacuiñajjiya quea boti nee; ñajjajja ca ca quea boti pishana. Jamajjeya e'e, pea cuana ca'a meesahua'yahua epojja ejomishocajjiyo. Jamaya Moisesija esohui etehue'yojo poani pea'ai —Jesosa poanaje.

13 Ma mimi majje Jesosaa meshahuama'yo epo jama acanaje ba'a: —Epeejji, ¡miquea eme' jeapisa'ajja'yo socue!

Jamajjeya eme' jeapiihui majje eme' jeapisa ca'yonaje; pea mijijke jayojjaya po'yonaje. **14** Majoya Paniseo cuana esecue yasijje cuayaqui majje ojee miminaje: —¿Yajja amajje Jesosa quecuca ca'yojji so'o, de? —jamaya poanaje Paniseo cuana.

Jesosa Eyacuiñajjiya echacojji ojaya yajjijo

15 E'e, Paniseo cuaa oya quecuapana canaje. Ma shajja'ajja majje Jesosa poquinaje pea meshi yasijje. Quea huiso dejja cuana onijje poquinaje. Ojjaña cuana huaquia mee ca'yonaje, jjaajaqui mee ca'yonaje, Jesosaa. **16** Jama poanaje ba'a: —E'e, eyaya miya huaquia mee'yonaje. ¡Jamatii a'a jihuohuijji so'o!

17 E'e, Jesosaa ojjaña cuana huaquia mee ca'yonaje, sohuihuohui canaje pea'ai. Jamaya Isaiaja esohui etehue'yo ojo yahuajo nei nei jayojja jama poa. Eyacuiñajjiya Isaia yahuajo nei nei tehue mee ca poa Jesosajo jama ba'a:

18 “¡Bacue! Jiquio dejja ecuea echacojji ecuea yajjijo. Eyaya oya huoojeaje'yo. Oya ecuea quea jea nee nee. Ojo eya quea bihui nee nee. Ecuea Edojjoshahua Pame o que eyaya huoojeaje'yo; ohuaya ojjaña Jodio pojjeama cuana huasijje huohui caje jama ba'a: — ¡Ojjaña cuana ecuea esohui e'e jojo neijo jjabahuejjaqui'yajo Eyacuiñajjiya quea boejea po mee caje'yo! ¹⁹ Oya ecuea echacojji jjamimicuiajea nobiajeaqui ajja. Quea bei nee mimije'yo. Ejiojjijje poquiani quea shajjaquijjo po'yo ajja. ²⁰ Joya quea mimishi nee nee aje jja oe ohua mimishi cuana cuijea ca'yajje quea boejea poaje'yo. Cuanaya jiquio ecua cuaquijji quijjo'yo jjimahuajo esei sho o'oyaña jama jayojja ecuea epeeiji quea mimishi po o'oya chanajo ohuaya quea ja'a nee nee po mee caje o'oya, de. E'e, ohuaya ejo chaco tiitii caje'yo; quea huiso nee nee ba'e mee caje'yo quea ja'a nee nee. ²¹ Jodio pojjeama quea huiso nee nee ojjaña meshijo ba'e cuanaya e'e jojo nei onijke jjapeequije'yo pea'ai”.

Jamaya Eyacuiñajjiya Isaia tehue mee ca poa yahuajo nei nei Jesosa Quitojo.

*Jesosa niñeba canaje cuaa
(Macoso 3.20-30; Noca 11.14-23; 12.10)*

²² Majoya Jesosa que jjequi canaje cuaa dejja niñepoqui. Oya cojjama', mimi'ajja pea'ai. Jesosaa eshahua huoojeacuayajea ca'yonaje. Jamajjeya oya quea cojja ja'a poanaje, emimiji pea'ai. ²³ Ba majje ojjaña cuana quea bihui nee poanaje. Jama

acanaje ba'a: —E'e de, a'ya shai de, ¿a'a pojja'a Jesosa Eyacuiñajjija huoojea'yo Quito?

²⁴ Ma shajja'ajja majje Paniseo cuaa Jesosa niñeba canaje. Jama poanaje ba'a: —Chojja, de. Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

²⁵ Paniseo cuanaja ejjashahuabaqui'yojji quea tai Jesosaja eba poanaje. Jamajjeya oya cuana tecuea canaje jama ba'a: —¡Shajja'ajjacue oe! Joya emeshi mese shajja'ajja sa po ajjajo ojee jjaquecuaqui majje jjaquecua iyaiyaquije'yo; dejja cuana ma meshijo ba'e chama'yo tii poaje'yo. Cuiñajjijo ba'e cuana jamaya po pea'aije, chama'yo tii poaje emeshi meseje echacojji cuana. Huapa pojjeama cuana jjacuiaquiajo chama' epreejji cuana poaje'yo pea'ai. ²⁶ Jamaya pea'ai Edosiquianaa, Satanasaa pea eshahua ehhuoojeacuaya'yo jojjemo dejja huoojea'yojji pojjeama po'yoqueaye —Jesosa poanaje. ²⁷ —¿A'a ya eya Edosiquiana nijjeya niñe, pea eshahua cuana pea'ai huoojeacuayajeaña poso aña? Jamajjeya miquea epreejji cuanaa ¿ae nijje eshahua huoojeacuayajea cani? Eyacuiñajjija asahua canijo. Jamajjeya ojaya eba miquianaya ejo siajje poani. ²⁸ E'e, Eyacuiñajji nijjeya eyaya eshahua huoojeacuayajea'yaña. Jamajjeya bacue eya e'e jojo nei Eyacuiñajji, Emeshi Mese oe nei jjeya poani tii. ²⁹ Cuanaya ¡bacue! ¿A'a dejja quea ca'a neeja equi yasijje dobiquiani oja aquiana siiya o jeyo jjima nequijo? Chojja. O jeyo majje

ojaya aquiana cuana sii caje cuaa. Jiquio ecua e' aquiana mese ebionei jeyo cani jama amajje eyaya eshahua cuana jeacuayajeaña —Jesosa poanaje pea'ai.

³⁰ —Cuanaya ojjaña joya enijje jjapeequi ajja aje oe e quecuapanajji poani, ojjaña enijje chaco ajja ecuea epeejji pojjeama aje oe e ejeabichajeajji nisho poani —poanaje.

³¹ —Jamajjeya eyaya miya e'e jojo nei huohuiaña: Eyacuiñajjiya ojjaña mimishi cuana, siajje-poiji cuana pea'ai cuijea caje'yo. Jamatii joya Edojjoshahua Pame niñeba cani tii ca ca Eyacuiñajjiya maya emimishi cuijea'yojji pojjeama tii tii. ³² E'e —Jesosa poanaje—, eya niñeba cajo Eyacuiñajjiya ma mimishi cuijea caje'yo. Joya Edojjoshahua Pame niñeba cani tii ca ca Eyacuiñajjiya maya emimishi cuijea'yojji pojjeama tii tii. Jjeya ecuijea'yojji pojjeama; quijje ecuijea'yojji pojjeama tii tii poaje'yo, eya ecue Chii nijje eyajo ojjaña huoojea'yojji poaje —Jesosa poanaje.

*Dejja mimishi acui tai jjajja ajja jayojja
(Noca 6.43-45)*

³³ Jesosaa Paniseo tecuea canaje pea'ai jama ba'a: —Acui quea pame jjajjani. Acui quea tai jjajja ajja, quea jjajja biso. Jamajjeya miyaya baña dejja mimishi acui tai jayojjaya; ohuaya quea tai acani. ¿A'a miyaya eya baña quea pame nee? Jamajjeya eya quea pame acui quea pame jayojja. ³⁴ Miquianaya aje oe peyo quea se nee nee jama, quea mase. Miquianaya quea tai poanijo quea pame mimi ajja. E'e, quea jjashahuabaqui tai po tiitiianijo quea tai mimiani

—Paniseo cuana acanaje Jesosaa—. ³⁵ E'e, joya quea jjashahuabaqui ja'a nee poanijo quea ja'a nee ba'yani. Quea jjashahuabaqui taijo ca ca quea tai ba'yani. ³⁶ Jamajjeya eyaya miya huohuije e epoe o'oyajjijo ojjaña mimishi tecueaa, ojjaña joya jjaniñebaquiani, mimijajiani, siajje poani pea'ai quea nee nee po tiitii meeje'yo. ³⁷ E'e, miquea esohui quea ja'a nee poanijo, Eyacuiñajjiya miya etecueajji pojjeama. Quea sho'i taijo ca mi ca Eyacuiñajjiya quea nee nee po tiitii mee caje'yo — Jesosa poanaje.

Paniseo cuana Jesosaa acani ba o'oya sa poanaje

(*Macoso 8.12; Noca 11.29-32*)

³⁸ Majoya beca Paniseo cuaa, Moisesija tehue huohuijjiya pea'ai Jesosa huohui canaje jama ba'a: —Esohui huohuijji Jesosa, ¡quea pame acue! ¡Ma dejjaajjima acani a'o'oyacue so'o, Eyacuiñajjiya miya huoojea canaje ecuanaja ebajji! —poanaje.

³⁹ —Chojja. Miquianaaya Eyacuiñajjiya esohui cajaa anaje. Jamajjeya miya peapea ba sa poani. Jamatii Eyacuiñajjiya yahuajo nei Jjonajo aca poa jayojja jama ohuaya jjeya acaje o'oya miquianaja ebajji. ⁴⁰ Ma ecua yahuajo Eyacuiñajjiya esohui huohuijji Jjona jai ai'ajja seejo ba'ya poa pea beca peejjima cahuime jama jayojjaya aje eya ojjañaja Edoe Mese bajjani quijje pishana mano'yo majje mei jjanijo ehuananobia jaa shequije o'oya — Jesosa poanaje.

⁴¹ —Yahuajo nei nei dejja cuana Ninebejo ba'eya Jjonaja esohui shajja'ajja majje mimishi cuana

pajea ca'ya poa. Jjona quea ca'a pishana poa; eya ca iña quea ca'a nee nee. Jamatii miquianaya ecuea esohui shajja'ajja sa po ajja. Jamajjeya quijje eya poe o'oya majje mimishi cuana tecueaje. Ninebe dejja cuaa miya tecuea caje jama ba'a: "Miquianaya ca ca oe quea mimishi nee nee poanaje". ⁴² Jama pe'a'i poaje ba'a: Yahuajo nei nei Sama mese epona quea huesha nee poeya poa Jodioja emeshi mese Sanomoja esohui shajja'ajja. Sanomo quea jjashahuabaqui ja'a pishana poa; eya ca quea jjashahuabaqui ja'a nee nee. Jamatii miquianaya ecuea esohui shajja'ajja sa po'yo ajja. Jamajjeya quijje eya poe o'oya je mimishi cuana tecuejeaa, eeno poejjije emeshi mese ponaa, Sama meseya jama miquianaya tecueame acaje pea'a'i ba'a: "Miquianaya ca ca oe quea mimishi nee nee poanaje" acaje nequiana — Jesosa poanaje.

*Eshahua dejjaja yami yasijje poe o'oyanaje
(Noca 11.24-26)*

⁴³ Jesosaa esohui ejjabahuejjaqui meeiji huo-hui canaje pea'a'i jama ba'a: —Eshahua dejjaja yamijo nequi cuayaqui'yo majje quea huesha poquinaje. Sa'ajja canaje pea huasijje enequiji. Jamatii ba'yo jjima. Oya po'ayequequi tii. ⁴⁴ Jamajjeya oya jjashahuabaquiani jama ba'a: "Eya poquije o'oya huacuaya oya' dejja huasijjeya, ma e cuayaquinaje yasijjeya, ma ecuea equi jayojja huasijjeya". Jamajjeya oya' dejja huasijje poe o'oya majje ba cañaqui'yani chama' enahuejji Eyacuñajjija epeejji nei pojjeama jje-jojo. Ojaya eyami equi ecuiashaba jayojja jama,

ehuana bame bame jayojja, equi se ejjama' jayojja. ⁴⁵ Jamajjeya oya poquije pea eshahua cuana sa'ajja. Ba caje quea huiiso, me mijijje beca onijje enequijji. Oya cuana quea mase nee nee; pea quea mase pishana. Majoya ojjaña dobiquiajo ma dejja quea yeno nee nee poani. Yahuajo oe eshahua nequia huajo quea yeno pishana poanaje.

Jamaya poanaje Jesosa shajjama' cuana nijke, oya cuana onijje jjapeequi sa po ajjajo.

—Ma dejja jayojjaya miya poaje, quea mimishi nee nee tii tii poaje —Jesosa poanaje.

Jesosaja huapa pojjeama poeyanaje
(Macoso 3.31-35; Noca 8.19-21)

⁴⁶ Jesosa mimianijo ojaya enaese, oja chahua cuana pea'ai o que poeyanaje. Esecuejo nequinaje. ⁴⁷ Majoya Jesosa huohui canaje cuaa: —Miquea enaese, mique chahua cuana esecuejo nequi. Minijje mimi sa poani.

⁴⁸⁻⁴⁹ Jesosaa saja'a canaje: —¿Ache shai ecuea huapa pojjeama cuana? ¡Bacue! Jiquio ecuea shajja'ajjajji cuana ecuea huapa pojjeama cuana, ecuea quea jea nee nee ecuea ecue nae quea jea aña jayojja jama. ⁵⁰ E'e, ecue Chii eyajo ani; ojjaña jjashajja'ajjaquiani ojaya esohuijo ecuea huapa pojjeama, ecue chahua, ecue jjo'i, ecuea enaese pea'ai —Jesosaa acanaje.

13

Eso'jeaajajji
(Macoso 4.1-9; Noca 8.4-8)

¹ Majoya Jesosa equijo ani cuayaquinaje. Bae sahua huasijje poqui majje anioquenaje. ² Majoya

o que jjachichaquinaje dejja cuana quea huiso
nee nee. Jamajje bishe yasijje nequisohuaqui
majje anioquenaje esohui huohuiya. Dejja cuana
meshijajijo aninaje. ³ Bishe quecuayijeja cajo,
Jesosaa oya sohuihuohui canaje quea huiso nee
nee. Pea esohui ona jjashahuabaquijji huohui
canaje o ba meesahuajji. Jama acanaje ba'a:
⁴ —Ebanajji cuana poquinaje banaa. Eso' jeaaja
canijo, oe pojji eso' oquequinaje ejiojji yasijje.
Poeyanaje cuichojji cuana; ijzia ca'yonaje eso'.
⁵ Pea eso' oquequinaje mei biajje. Meshi chamajo
eso' pohua'ajja'yonaje. ⁶ Quijje cuayanaje
eshequi. Quiyo'yonaje, esajja joca'yonaje,
mano'yonaje. ⁷ Pea eso' oquequinaje acuishha
huasijje. Pohua'yo majje jjonohua bebo ca'yonaje.
Tatajo nequi jjajja ajja poanaje. Mano'yonaje.
⁸ Pea eso' oquequinaje meshi quea pame yasijje.
Pohua'yonaje eso' cuana. Ejjajja quea pame nee
nee poanaje. Oe esajo ejjajja iye huiso aninaje;
pea esajo ejjajja quea huiso, pea esajo quea huiso
nee nee aninaje. Sejja canaje quea huiso nee.
⁹ ¡Miya jjashajja'ajjaquicue! ¡A'a shajjama' pojji!
—Jesosa poanaje.

*Esohui eba meesahuajji Jesosaa sohuihuohui
canaje ona jjashahabaqui meeiji
(Macoso 4.10-12; Noca 8.9-10)*

¹⁰ Quijje o shajja'ajjajji cuana poeyanaje Jesosa
que. Huohui'ajja canaje: —Jesosa, ¿apiojji miyaya
esohui eba meesahuajji quea quehua huohuiaña
jiquio dejja cuana huasijje?

¹¹ Oya cuana saja'a canaje Jesosaa: —Miya ca
ca oe Eyacuiñajjiya ba meesahua cani eya ojjañaja

Emeshi Mese nei poaje'yo. Yahuajo ba mee jjima poa. Pea cuana ca ca eba meesahuajji pojjeama. ¹² Jamajjeya joya Eyacuiñajjiya esohui ba cani quea huiso pishana quijje quea huiso ba mee caje'yo. Joya ojaya esohui ba sa po ajja ca ca pajea caje'yo. ¹³ Jamajjeya eyaya peapea esohui eba meesahuajji huohuinaje o ba meesahuajji. Jamatii ecuea esohui shajja'ajja majje oya cuana jjashahuabaqui aija, de, shajja'ajja jjima jama acani, de. ¹⁴ E'e, oya cuana quea sapa ca'a nee poani. Jamajjeya Eyacuiñajjiya Isaia tehue mee ca poa yahuajo nei nei jama ba'a:

"Shajja'ajja huicha'a huicha'a majje jamatii jjashajja'ajjaqui aija poaje. Eyacuiñajjiya acani ba huicha'a huicha'a majje jamatii jjashahuabaqui aija poaje. ¹⁵ Quea sapa ca'a nee nee poani, shajja dojjoma' jama, cojjama' jama pea'ai. Ecuea esohui eba jojjemo, eshajja'ajja jojjemo jjabahuejjaqui'yome. Pea'ai enijke ejjapeequi'yo jjemo eyaya mimishi cuijea'yome".

Jamaya yahuajo nei nei tehue ca poa etiiquiana Isaiaa —Jesosaa acanaje.

¹⁶ Jamajjeya Jesosaa o shajja'ajjajji cuana jama acanaje pea'ai ba'a: —Miquianaya ca ca quea cojja ja'a, quea shajja ja'a pea'ai. ¹⁷ Jamajjeya quea bihui nee pocue! ¹⁷ E'e jojo nei eyaya miya huohuiaña jama ba'a: Quea huiso Eyacuiñajjiya esohui huohuijji yahuajo, ojaya epeeiji nei yahuajo ba'e pea'ai e ba sa neinei poa. Ecue huohui shajja'ajja sa neinei poa pea'ai. Jamatii ojaya eya ba jjima poa. Ecue huohui shajja'ajja jjima pea'ai poa. E'e

jojo nei eya Eyacuiñajjija huoojea'yo ojjaña jaahuanaji. Ma ba sa poa Eyacuiñajjija esohui huohuijji yahuajo nei nei.

*Jesosaa esohui ebanajjijo ba mee canaje
(Macoso 4.13-20; Noca 8.11-15)*

¹⁸ Majoya ojjaña cuana acanaje Jesosaa: — Jamajjeya eyaya miquianaya ba meesahuaje ecuea esohui ebanajjijo. ¹⁹ Maya: Beca cuana ejiojji yasijje oquequi eso' cuana cuichojjiya ijijajjeyo ca'yonaje. Jamaya beca cuana ecuea esohui eya ojjañaja Emeshi Mese oe nei poaje shajja'ajja majje jamatii jjashahuabaqui ajja. Jamajjeya Edosiquiaa o que poe majje ecuea esohui pajea mee cani. ²⁰ Beca cuana eso' mei biajje oquequinaje jayojja jama ecuea esohui shajja'ajja majje queabihui nee enijje jjapeecuajjajquiani. Jamatii ecuea esohui jayojja jama ba'e tiitii ajja. ²¹ Eso' mei biajje pohua esajja joca'yajo mano'yani jayojja jama poani; pea cuaa oya napa cajje Eyacuiñajji nijje jjapeequipajjeani. ²² Beca cuana eso' acuishaa nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjapee nishoquiani. Jamatii oya cuana quea bejjo nahue poanijo, aquianajo quea huiso jjashahuabaquianijo, quea mete pea'ai poanijo Eyacuiñajjijo chaco ajja. ²³ Eso' meshi quea pame neejo pohua majje quea jjajja huiso poanaje jayojja jama beca cuana; ecuea esohui shajja'ajja majje jjabahuejjaquiani; ecuea epeejji quea ja'a nee nee poani, pea cuana ejo jjabahuejjaqui meesahua cani iye huiso pojja'a, quea huiso

pojja'a, quea huiso nee nee pojja'a —Jesosaa mahuisoya oya cuana acanaje.

Esohui acuishsha cuanajo

²⁴ Majoya Jesosaa oya cuana huohui canaje pea esohui eba meesahuajji. Jama poanaje ba'a: —Eyacuiñajji esohui ejo ebanajjiya eso' bana canaje jama. Eso' ache bame nei quecua canaje quejo, anoso. ²⁵ Majoya ojjaña echacojjii cuana ecahuijaajo, dejja quea mimishi, o jeabichajeajji epo poeyanaje. Sipone so' quea huiso quehuajje nei jeaajaqui canaje quejo. ²⁶ Anoso pohua'yo majje jjajjanaje. Sipone pohuanaje anoso tejjee, jjajjanaje pea'ai. ²⁷ Quijje pishana eque meseja echacojjii cuana o que poeyanaje. Jama poanaje ba'a: “Emeshi mese, ¿a'a miquea anoso sipone tejjee quecua pojjeama poanaje?” huohui'ajja canaje.

²⁸ —Echacojjii meseya saja'a canaje: “E'e, quea pame poanaje. Dejja quea mimishiya quehuajje jeaajaqui canaje sipone so' ecuea quejo, de” poanaje.

—Echacojjii cuaa huohui'ajja canaje: “¿A'a sipone chiyojeaje'yo?”

²⁹ —“Chojja” poanaje eque mese. “Anosoya miyaya chiyojea chana’. Jamatii. ³⁰ Ojee sipone ni-jje catiiquiahua. E'e, majoya anoso jahua jo eyaya huoojeaje anoso sejja'yojji cuana anoso sejjaa. Sejjajeyo majje anoso chichaje. Ecuea equi yasijje iyanobiaje anoso, ecuea ejaaahuhanajji. Sipone ca oe caquijojea qui'yahua pasi'yo majje” poanaje eque mese.

—E'e, jiquio eque meseya sipone dahuajea cani jama dejja mimishi Eyacuiñajjiya acaje'yo. Anoso sejjajeyo majje equijo huana cani jamaya ecuea epreejji aje'yo —Jesosa poanaje.

Esohui acui so' che biso nei neijo motasa bajjanijo

(*Macoso 4.30-32; Noca 13.18-19*)

³¹ Majoya Jesosaa pea esohui eba meesahuajji huohui canaje jama ba'a: —Eyacuiñajjiya ehuohui ojaya epreejji cuanajo jama pea'ai ba'a: Pea eso' motasa che biso nei eso' bana cani equi quibojo. ³² Jiquio eso' che biso nei nei; tii majjeya quea cui quemoo nee poaje apo'e cui quemajja. Jamajjeya cuichojji cuana poeyani motasa acui biajje cahuiya —jamaya Jesosaa huohui canaje ojjaña ba meeiji quijje Eyacuiñajjiya epreejji cuana quea huiso nee, quea ca'a nee poaje'yo.

Esohui eba meesahuajji eshejjee meejjijo

(*Noca 13.20-21*)

³³ Pea esohui eba meesahuajji huohui canaje Jesosaa jama ba'a: —Eponaa pahui dahuajjiya quea huiso nee pohuipohui tejjee oe pojji nei nei eshejjee meeiji iñahuahuo neinei cani, ojjaña eshejjee meeiji. Jiquio eshejjee meeijiya ojjaña pohuipohui shejjee mee cani jamaya poaje ecuea epreejji cuana. Jama ba'a: Jjeya beca cuana jjashajja'ajjaquiani. Majoya aje quea huiso nee ojjaña pojja'a jjashajja'ajjaqui mee caje'yo Eyacuiñajjiyo —Jesosa poanaje.

Esohui eba mee'yojji

(*Macoso 4.33-34*)

³⁴ E'e, jiquio esohui ehuohui'yo cuana Jesosaa ma bishejo nequiya huohui canaje. Esohui eba meesahuajjijo ca ca oe huohui canaje. ³⁵ Jamaya poanijo ohuaya Eyacuiñajjija esohui huohuijjija esohui yahuajo nei nei jama acanaje. Jamaya aje yahuajo nei nei Eyacuiñajjija ojaya esohui huohuijjija huohui mee ca poa Jesosajo ba'a:

“Eyaya aje jja esohui huohuije esohui eba meeiji.

Yahuajo jiquio meshi panajeyo majje ecuea dejja cuana ba meesahua jjima poanaje ecuea ejjashahuabaqui'yojji. Jjeyahua ca ca ecuea ejjashahuabaqui'yojji ba meeje'yo, eyaya”.

Ehuohui'yo siponejo ba mee canaje Jesosaa

³⁶ Majoya Jesosaa —Poquia iña —acanaje dejja cuana. Bishejo ani cuayaqui'yo majje poquinaje equi yasijke. Dobiqui majje o shajja'ajjajji cuana o que poeyanaje. Huohui'ajja canaje: —Jesosa, ¡ba meesahuacue ehuohui'yo siponejo! Maya ecuanaja quea quehua.

³⁷ Jamajjeya Jesosaa oya cuana huohui canaje: —E'e, eya ojjañaja Edoe Mese anoso banajji nei nei jama. ³⁸ Que quea pame jayojja ojjaña dejja ojjaña meshijo ba'e cuana. Eso' quea pame nee Eyacuiñajjija epeeiji nei jayojja jama. Sipone so' quea tai jayojja eshahuaja epeeiji cuana. ³⁹ Joya dejja sipone so' jeaajajji epo jayojja jama dejja mimishi, e cuiajji nisho epo, Edosiquiana, de, Satanasa. Jiquio ecua epojja anoso jahuajo sejjajeyo ca'yonaje jama meshi oe poaje. Joya anoso sejja'yojji ca ca Eyacuiñajjija esohuidojiji cuana jama. ⁴⁰ Jamajjeya jiquio ecua sipone pasi'yo

majje dahuajea canaje jayojja jamaya poaje dejja mimishi meshi oe poajo.

⁴¹ —E'e, eyaya ojjañaja Edoe Meseya esohuidojo-jji cuana huoojeaje dejja mimishi cuana iñaa, ona mimishi po meeiji poani pea'ai iñaa. ⁴² Iña majje jeajea caje'yo cuaquí quea quiyo nee nee yasi-jje. Jomajo pa neineije'yō; ese' ijjiayaijea caje'yo cuaquí quea quiyo nee neejo. ⁴³ Ecuea epeejji ca ca ecuea esohui jama acanijo ba'e tiitije'yō eyajo eseja Chii nijje quea ja'a nee nee, eshequi ja'ajja, de —Jesosa poanaje.

Aquiana quea nahue ehuanaquehua'yō

⁴⁴ Majoya Jesosaa huohui canaje pea esohui eba meesahuajji jama ba'a: —Eyacuiñajjija esohui cuana ojaya epeejji cuanajo jama pea'ai ba'a: Quejo aquiana pame quea nahue nee nee ba majje dejja jjataqui canaje jomajo tii. Majoya oya quea bihui nee poquinaje. Ojjaña ojaya aquiana cuana dojo canaje; quia canaje que sosejje. Jiquio ecua aquiana quea nahue nee nee jjeshe canaje jama jayojja dejja Eyacuiñajji nijje jjapeequiani —Jesosa poanaje.

Pea esohui aquiana quea nahue nee neejo

⁴⁵ —Eyacuiñajjija esohui ojaya epeejji cuanajo jama pea'ai ba'a: Dejja aquiana nahuejjiya sa'ajja tiitii canaje mei sisi siyosiyo copocopo quea nahue nee. ⁴⁶ Oe mei sisi siyosiyo copocopo quea nahue nee nee ba majje ojjaña ojaya aquiana quiaa dojo canaje mei siyosiyo quea pame nee nee jjeshejji. Eya ca ca iña mei quea nahue nee nee quea pame nee nee jama, ojjaña jaahuanajji —Jesosa poanaje.

Esohui nahuoo cuiashajajijo

⁴⁷ —E'e jojo nei pea ba'eme epojji jamaya pea'ai ba'a: Nahuoo cuiashajajji jea cani cuaa bae yasijje. Nahuoo cuiashaja cajje dobiquiani. Peapea nahuoo cuiashaja cani. ⁴⁸ Quea huiso yanijo nahuoo cuiashajajji cuaa meshijaji sahua huasi-jje jjequisohua cani. Majoya pejo majje nahuoo cuana ba cani. Ojjaña nahuoo quea pame nee bio cani jjepai yasijje; peajja ijija ca ajja jojoya ca ca jeajea cani. ⁴⁹ Jamaya poaje e poe o'oyajo. Esohuidojiji cuana poeje; Eyacuiñajjija epeejji cuana ojjaña quea pame ba'e chicha caje'yo. De-jja mimishi cuana ca ca jeajea caje'yo cajaajojo. ⁵⁰ Cuaqui quea quiyo nee nee yasijje dobiquije'yo tii tii. Jomajo siasia'yoquije tii; ese' ijjiayaijea caje'yo quea nee poanijo —Jesosa poanaje.

Esohui eyacua

⁵¹ Majoya Jesosaa oya cuana huohui'ajja canaje: —¿A'a ecuea esohui quea ja'a nee? ¿A'a jjabahue-jaquinaje?

—E'e, quea ja'a nee.

⁵² Jamajjeya Jesosaa o shajja'ajjajji cuana acanaje: —E'aquiana meseya ojaya aquiana cuana etii, aquiana eyacua pea'ai ojjaña cuana huohui'ajja cani. Jiquio ecua pea huohui'ajja pea huohui'ajja acani jayojja jama esohui huohuijji poani, jjabahuejjaqui majje, Jodio esohui huohuijjiya Eyacuiñajjija esohui yahuajo etehue'yo, ecuea esohui eyacua pea'ai pea cuana ba meesahua cani —poanaje.

*Jesosa Nasanena meshi yasijje poquinaje
(Macoso 6.1-6; Noca 4.16-30)*

⁵³ Majoya esohui huohuipajea majje Jesosa jomajo ani poqui o'oyanaje ojaya cuiñajji yasi-jje, Nasanena huasijje. ⁵⁴ Jodioja equi ojee ej-jachichaquijji yasijje dobiquinaje. Esohui huohui canaje. Ojaya esohui shajja'ajja majje Nasanenajo ba'eca cuana quea tecue poanaje. Oya Jesosa Joseja jea poso acanaje cuaa: —¿Yajjajje shai jiquio dejja Jesosaa esohui quea ja'a nee nee huohui cani, de? ¿Eyacuiñajji jayojjaya jjaajaqui mee cani emanojaa quea huiso nee, de? ⁵⁵ Oya aje oe acui cacajji nei neija bacua ejja pojja'a, oja nae Mania bajjani, oja chahua cuana Jacobo, Jose, Simohui, Jonas pea'ai bajjani. ⁵⁶ Oja jjo'i cuana pea'ai jiquiojo ba'e, de. Jamajje ¿achejo joya Jesosaa ojjaña jiquio esohui ba canaje so'o? —jamajjeya quea quene poanaje Jesosa nijje. Joseja jea poso cajaa acanaje.

⁵⁷ Jamajjeya Jesosaa oya cuana jama acanaje ba'a: —E'e de, pea cuaa Eyacuiñajji esohui huohuipajea majje Jesosa jomajo ani poqui o'oyanaje ojaya cuiñajji yasi-jje, Nasanena huasijje. Jamatii oja meshijo ba'e cuana ojaya huapa pojjeama cuana ca ca oe jjashajja'ajjaqui sa po'yo ajja.

⁵⁸ Jamajjeya oya cuana jjashajja'ajjaqui sa po ajja. Jesosa Eyacuiñajji bacua pojjeama posojo, ohuaya emanojaa cuana oe pojji jjaajaqui mee ca'yonaje, ma dejjaajjima acani oe pojji nei acanaje Nasanenajo, Jesosaa.

14

*Enodeya Huani sapa jajasejjajea mee canaje
(Macoso 6.14-29; Noca 9.7-9)*

1-2 Jesosa Janinea meshijo anijo, Janinea meshi mese Enode bajjaniya shajja'ajja canaje onaja ehuohui'yo Jesosajo. Ma Enode pea emeshi mese, Enode pea'ai bajjani. Oya emeshi mese Enodeja bacua ejja; oya Enode Antipa bajjani pea'ai poanaje. Shajja'ajja majje ma Enodeya Huani shequi o'oya posoya acanaje: —E'e de, jiquio dejja aje oe Huani, ma ona besameejji poa. E'e pojja'a oya mano'yo majje shequi o'oyanaje. Jamajjeya ohuaya Eyacuiñajjiya jayojjaya acani — jamaya ohuaya ojo chacochacoani acanaje.

Yahuajo nei Jesosajo shajja'ajja jjimahuajo ma Enodeya Huani sapa jajasejjajea mee canaje. **3** E'e, yahuajo ma emeshi mese Enodeja edoe mese Penipeja ehuanase Enodiasi bajjani Huani nijje quea quene poa. Jamajjeya ma Enodeya Huani iña mee canaje; jeanobiajea mee canaje. **4** E'e, Huaniya yahuajo ma Enode jama tecueame aca poa ba'a: —¡Miyaya aje oe mique doeja Penipeja ehuanase Enodiasi a'a huana'yoffi! Jamaya pojjeama Jodioja etehue'yo; quea mimishi.

5 Jamajjeya ohua tecuea cajje quenequene-naje Huani nijje. Quecua sa aca poa. Jamatii quecua jjima; quea mete poanaje pea Jodio cuanajo. E'e, quea huiso Jodio cuana jjashahuabaquinaje Huani Eyacuiñajjiya esohui huohuijji nei nei poanaje. **6** Jamatii ma Enodeya o cuaya poa pojajo ojjaña ojaya epjeejji cuana iyaa canaje ojee ijija'ijjiaa, majamajaqui baa pea'ai. Enodiasija bacuase pea'ai oe nei majamaja nequinaje ojjañaja ebajji, quea bihui nee epo meejjji. Enode Antipa quea bihui nee nee poanaje epona sho'ijo. **7** Jamajjeya onijje miminaje jama

ba'a: —¿Ae shai sa poani miya? ¡Huohuicue mo! Eyaya miya quiaje. E'e jojo nei nei she, coya miya sañaya aje mi quiaje —acanaje Enodeya.

⁸ Jamajjeya epona sho'i poquinaje ojaya enaese Enodiasi huohuiya.

—E'e —oja nae poanaje—, e'e ¡Huani sapa jajasejjaja meequicue, she!

Epona sho'i poe o'oyanaje Enode que. Huohui canaje jama ba'a: —Huani, ma ona besameejji poani ejeanobia jaa. ¡Ojaya esapa jajasejjajea'yo majje piatojo jjequicue jjeyahua nei! Maya eya sa poani.

⁹ Shajja'ajja majje emeshi mese Enode quea ajjaja nee nee poanaje. Jamatii ojaya esohui epona sho'i nijje ojjaña ojaya epjeejji cuanaa shajja'ajja canaje. Jamajjeya ojaya esohui pajea ajja, Endodeja. Jamajjeya ohuaya sohuinano cuana huoojea canaje: —¡Epona sho'ija esohui jayojja jama acue! ¹⁰ ¡Huani ma ejeanobia jaa oe sapa jajasejjajaquicue! —poanaje.

¹¹ Jjeya nei sohuinano cuana poquinaje Huani que. Huani sapa jajasejjajea ca'yonaje. Esapa jjequi canaje piatojo. Epona sho'i quia canaje. Majoya ohuaya Huani ja esapa oja nae yasijje quia cañaqui'yonaje, epona sho'iya.

¹² Majoya Huani shajja'ajjajji cuana poe'yonaje o doyo'yhua emojea'yoiji. Mojea'yo majje papoqui'yonaje Jesosa huohuiya.

*Jesosaa 5.000 dejja cuana bobia canaje
(Macoso 6.30-44; Noca 9.10-17; Huani 6.1-14)*

¹³ Jesosa Huani emano'yo shajja'ajja majje o shajja'ajjajji cuana nijje sohuaquinaje bishe aijo quima huasijke.

Jamatii ma ba majje quea huiso dejja cuana cuiñajji cuanajo ba'e ejiojjijje poquinaje Jesosa baa. Poquicuajinaje ma Jesosa besapoquije yasi-jje. Onaya jjaja ebionei aniñaquinaje Jesosa hui que añaquiya. ¹⁴ Quijje pishana Jesosa o shajja'ajjajji cuana nijje ba'eñaquinaje. Bishe aijo ani nequisohuaquinaje etaja huasijke. Quea huiso nee nee dejja cuana ba cañaquinaje. Onajo quea yeno jjashahuabaquinaje, quea huiso emano-jaajo, quea nee jaajo pea'ai. Jamajjeya ojjaña huaquia mee ca'yonaje, jjaajaqui mee ca'yonaje, Jesosaa.

¹⁵ Siniajo Jesosa que poe majje o shajja'ajjajji cuaa huohui canaje jama ba'a: —Jesosa, sinia coma, de. Jiquiojo chama' equi, chama' bobo pea'ai. ¡Dejja cuana huoojeacue cuiñajji sisi cuana huasijke oja bobo jjesheya!

¹⁶ —Chojja. Ca'aniahua cuana. ¡Bobiacue oe miquiaaya! —Jesosaa acanaje.

¹⁷ —¿Yajja yajji? Oya cuana quea huiso nee nee aña ebobiajji. Ecuanaja bobo oe pojji yani. Me oejje pahui, beca nahuoo sisi pea'ai yani —poanaje cuana.

¹⁸ —¡Comaya jjajja oe yacua yecue! —Jesosa poanaje—. ¹⁹ Ojjaña cuana jama acue pea'ai ba'a: “¡Ojjaña anioquecue sipone biajje!” acue.

Anioque mee canaje sipone biajje. Majoya pahui me oejje huiso, nahuoo sisi becamejjiji

pea'ai jjeshe majje Jesosaa eyahuasijje jjabajeasohuaquinaje. Eyacuiñajji bihuia canaje. Eyacuiñajji nijje bobijo mimi majje pahui miji canaje, nahuoo sisi pea'ai. O shajja'ajjajji que quia canaje, Jesosaa. Majoya ohuaya bobi quia canaje dejja cuana huasijje. Quia ca poquije quea huiso nee nee jjapanaque poquipoquinaje bobi, de.

20 Ojjaña jejje majje eshajja'ajjajji cuaa chicha ca'yonaje bobi ojjañaja ijjiasejja. Jjepai ai yasijje iya ca'yonaje. Quea huiso nee poanaje; 12 jjepai huisome bobi e'ijjiasejjaja ecuatajea poanaje.

21 Quea huiso nee nee bobi ijija mee canaje, de, 5.000 dejja. Epona cuana, esho'i cuana pea'aiya quea huiso nee nee ijzia canaje.

*Jesosa bae ena biajje poquinaje
(Macoso 6.45-52; Huani 6.16-21)*

22 Majoya siniajo Jesosaa o shajja'ajjajji cuana huoojea canaje. Jama acanaje ba'a: —¡Bishe ai yasijje nequisohuaquicue! ¡Bae ojje miji yasijje besapoquicue! Quijje eya poquije mi que pea dejja cuana quea huiso nee nee cuana huoojea'yo majje —poanaje.

23 Majoya dejja cuana quea huiso cuana huoojea'yo majje eyiyo huasijje jaasohuaquinaje oe nei oja Chii nijje mimiya. Mecajje Jesosa oe nei aninaje eyiyojo. **24** Jesosa eyiyojo anijo o shajja'ajjajji cuaa bishe ai quea huesha nee dojo canaje. Bae yiyesamajo o epojo beni quea quemopoeyanaje. Enashajohua bishe ai janobajjima nei nane canaje, cuio canaje enaa. **25** Mecashono Jesosa eyiyojo ani o que poquinaje ena biajje. **26** O shajja'ajjajji cuaa Jesosa quea huesha pishana ena

biajje jeojeojebeje ba majje quea ajjajja nee nee poanaje. Quea metejo taaanaje; jama poanaje ba'a: —¡Coya ae shai poeje ba'a! —siasianaje—. ¡Coya eshahua, de!

²⁷ Jamajjeya Jesosa onijje miminaje. Jama poanaje ba'a: —¡A'a quea mete pojji! Eya jja iña iquio, eshahua pojjeama. ¡Quea jaji nee pocue!

²⁸ Jamajjeya Penohua jama huohuime acanaje ba'a: —Ecuea Emeshi mese, miya enequiya jjejoya, ¡eya mi que poqui meecue ena biajje!

²⁹ —E'e Peno, ¡poecue! —oya acanaje Jesosaa.

Jamajjeya Peno bishe aijo ani nequioquequinaje. Ena biajje Jesosa que poquinaje.

³⁰ Jamatii poqui pishana majje beni tii tii, enashajo quea quemo nee nee ba majje metenaje, de. Mete majje jaadobi'ajjaquinaje Peno. Taaanaje: —Jesosa, ¡eya hui'ije'yo! ¡Iñacue mo, oe! —poanaje.

³¹ Jesosaa me' iñacuaji canaje. Peno jama acanaje ba'a: —¿Apiojji acuae mi meteani so'o? ¿A'a eya quea ca'a nee nee miquea ba jjima?

³² Majoya Jesosa Peno nijje bishe ai yasijje aniso-huaqui'yajo beni nequioquequinaje. ³³ Jamajjeya ojjaña cuana bishe aijo aniya Jesosa bihuia canaje. Jama poanaje ba'a: —¡E'e jojo nei miya Ey-acuiñajjija Bacua Ejja oe nei!

Cuichi cuana hui'i ca ya poa meshi yasijje Jenesane' meshi yasijje besapoqui o'oyanaje

(Macoso 6.53-56)

³⁴ Majoya bae ai ojje miji yasijje Jenesane' meshi yasijje besapoqui o'oyanaje Jesosa. Ba'eñaquinaje.

³⁵ Dejja cuanaja jomajo ba'eja Jesosa eba poanaje yahuajo. Jamajjeya oya ba o'oya majje ojjaña

cuana iyaa meequi canaje Jesosa que. Jamajjeya ojjaña emanojaaca cuana Jesosa que ye canaje.
³⁶ Jama huohui'ajjame acanaje cuaa ba'a: — Jesosa, iojjaña emanojaaca cuana che mique daqui iñal'ajja meecue ehuaquia'yojji! —acanaje.

Ojjaña oja daqui cuema iñal'ajja majje jjaajacua-jiqui'yonaje, huaquia'yonaje pe'a'i, de.

15

Dejja quea jjashahuab aqui tai po majje quea tai poani

(Macoso 7.1-23)

¹ Majoya Paniseo cuana Jodio esohui huohui-ji cuana pea'ai Jenosanenajo ba'e Jesosa que poeyanaje. Oya huohui'ajja canaje: —Esohui huohui-ji, ¿apiojji acuae mi mi shajja'ajjajji cuana eti-iquianaja ehuohui'yo jama po ajja? ² E'e, ijjal'ijjia jjimahuajo eme' topo neinei ajja, de.

³ Jesosaa saja'a canaje jama ba'a: — Miquianaya acuae ¿ae poani pea'ai? ¿Apiojji acuae miquianaaya Eyacuiñajji esohui pajea'yaña eti-iquianaja ehuohui'yo yajji nisho? ⁴ E'e, Eyacuiñajji esohui jama poani ba'a: “¡Mique chii, miquea enaese etii pea'ai jaahuanacue! ¡Joya oja chii, oja nae pea'ai cajaa acajo cajajahuejjajea ca'yahua cuaa, meiya!” ⁵ Miyaya ca ca jama huohui taime yaña ba'a: “Dejja oja chii etii nijje, oja nae etii nijje pojja'a mimije jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuiajji”. ⁶ Jamajjeya oja chii etii, ojaya enaese etii pea'ai pajea meeña. Pea'ai

Eyacuiñajjija esohui pajea mee'yo sa aña etiiquianaja ehuohui'yo yajji nisho. ⁷ ¡Miya ca mi ca oe jjadasiaquijji nei nei! Eyacuiñajjija esohui huohuijji Isaiaja esohui mijo e'e jojo nei yahuajo nei poa. E'e, yahuajo nei Eyacuiñajjija Isaia tehue mee ca poa jama ba'a:

⁸ “Jiquio dejja cuanaa eya bihuia nisho cani. Jamatii jjashajja'ajjaqui ajja.

⁹ Jamajjeya ecuea equi yasijje jjachichaquiani ejjachichajequijji. Ohuaya ojaya ejjashahuabaqui'yojji huohui cani, ecuea esohui pojjeama”.

Jamaya Isaiaa yahuajo nei tehue ca poa miquianajo —Jesosa poanaje.

¹⁰ Jamajjeya Jesosaa pea cuana huasijke jama huohuime acanaje ba'a: —¡Shajja'ajjacue, jjabahuejja neineiquicue oe! ¹¹ Bobi cuana, ojjaña aquiana enabajje dobijuanijo pojjeama miquianaya quea mimishi poani. Chojja. Quea jjashahuabaqui tai po majje esohui quea tai enabajje cuayaquianijo ca ca quea mimishi poani. Eyacuiñajjija miquianaya ba cani quea mimishi —Jesosaa acanaje.

¹² Quijje o shajja'ajjajji cuaa Jesosa huohui canaje jama ba'a: —Jesosa, miquea esohuijo Paniseo cuana quea quene poani minijje —poanaje.

¹³ Jesosaa oya cuana saja'a canaje jama ba'a: —Ojjaña acui ecue Chiija eyajo anija bana pojjeama ohuaya chiyojea caje'yo jiquio ecua ohuaya ojaya epeejji nisho acaje'yo jama. ¹⁴ Jamajjeya ja'a Paniseo cuanajo quea mete pojji! Oya cuaa

aje oe esohui huohui cani quea tai, quea ja'a pojjeama. Cojjama' jayojja jama poani, de. Cojjamaa pea cojjama' mepejjejea cani jayojja o pea'ai oquejeaquije'yo jjani yasijje. Cojjama' jayojja dejja mimishi pea dejja mimishiya dojo cajje cuaqui yasijje poquije'yo onijje tii —jamaya Jesosaa acanaje.

¹⁵ Penohua Jesosa huohui'ajja canaje: —Jesosa, ecuanajaya ca ca esohui quea quehua miquea. ¡Ba meesahuacue mo!

¹⁶ —¿A'a ecuea esohui miquianajaya ba jjima pea'ai? —Jesosa poanaje—. ¿A'a miquea eba pojjeama? ¹⁷ Ojjaña bobi, pea aquiana pea'ai enabajje ijjiajea see ai yasijje dobiquiani. Quijje jamatii seejea caje'yo. ¹⁸ Joya quea tai jjashahuubaquianiya ca ca esohui tai jeacuaya cani. Maaya oya quea tai po mee ca'yani; quea mimishi Eyacuiñajjiya oya ba cani. ¹⁹ E'e, jjashahuaba taiqui majje pea quecua cani, onaja eponajo ba'e sa poani, peaja yahuejo ba'e sa poani, quehuajje coijo cani, sii cani, siajje poani, mimijajiani pea'ai. ²⁰ E'e, joya jama acanijo Eyacuiñajjiya ba cani quea mimishi; bobi ijji cani eme' shacula neinei jjimajo pojjeama quea mimishi poani.

*Cananea epona Jesosa que poeyanaje
(Macoso 7.24-30)*

²¹ Majoya Jesosa Jenesane' meshijo ani poquinaje Sinono meshi yasijje, Tino meshi yasijje pea'ai. ²² Jomajo poquiani oe Cananea epona ma meshijo ba'e o que poeyanaje. Oya Jodio pojjeama. Jamatii ejiojjijje poquije taaa majamaja

poquinaje: —Emeshi Mese nei, Dabija osecua, ¡ejo jjashahuabaquicue! Ecue bacua piona quea sapa niñe jaa. Quea nee nee poani, quea mano.

²³ Jamatii Jesosaja oya saja'a jjima. Jamajjeya ojaya eshajja'ajjajji cuana Jesosa nijje miminaje: —Jesosa, ¡epona huoojeacue! Joya ese nijje taaaje-beje.

²⁴ Jamajjeya oya cuana saja'a canaje Jesosaa: —Oya Jodio pojjeama. Eycuñajjiya eya huoojea canaje Jodio cuana sa'ajja'yohua. Oya cuana ñajjajja ecuaquisho'yo jayojja jama poquiquehuani Eycuñajjiyo.

²⁵ Jamatii epona Jesosa que poe majje ecui'oshajjajo nequiñanaje; jama poanaje ba'a: —Emeshi Mese nei, ¡ecuea ebacua piona jjaajaqui mee'yocue, quea mano nee jaa!

²⁶ Ma epona Jodio pojjeamajo huapa jayojja saja'ame acanaje Jesosaa: —¿A'a acuae ecue bacuaja bobi jeaje iñahuehua que? ¿A'a cuae jamaaya quea pame? —poanaje.

²⁷ Epona quea shoe jama jjejojo jama poanaje ba'a: —E'e, Emeshi Mese. Jamatii o huonejjiya ijija canijo, iñahuehuaa ehuonejjiya ijjiasejja cal'ijija cahua —poanaje.

²⁸ —Epona, miya ca mi ca oe quea ja'a nee, quea pame nee ejo jjashahuabaquiani. Jamajjeya eyaya miquea esohui jayojja jama aje'yo. Jjeya nei miquea ebacua piona jjaajaqui meeje'yo —Jesosaa acanaje.

Jamajjeya jjeya nei oja bacua piona jjaajaqui'yonaje; quea aja nee po'yonaje.

Jesosaa quea huiso emanojaaca huaquia mee ca'yonaje

²⁹ Majoya Jesosa jomajo ani ejiojjije poqui o'oyanaje Janinea bae sahuajje. Eyiyo huasijje jaasohuaqui majje anioquenaje. ³⁰ Quea huiso nee nee poeyanaje; o que jjachichaquinaje. Jje-qui canaje emanojaaca cuana: quibojjisha cuana, cojjama' cuana, jiojjijajja cuana, mimi'ajja cuana pea'ai, peapea epo'yo cuana pea'ai huanaoquea canaje cuaa Jesosa pejjejo ejjaajaqui'yojji. Oj-jaña cuana jjaajaqui mee ca'yonaje, huaquia mee ca'yonaje, de, Jesosaa. ³¹ Ba majje ojjaña cuana queabihui nee nee poanaje. Eyacuiñajji bihulia neinei canaje: —E'e, e, mimi'ajja cuana quea ja'a mimi mee ca'yonaje; jiojjijajja jeo mee ca'yonaje; quibojjisha jjaquibopiqui mee ca'yonaje; cojjama' quea cojja ja'a po mee ca'yonaje, jjabaqui mee ca'yonaje pea'ai. Ma ecua ohuaya jjaja'aqui jjimahua Isaeni cuana nijje acaninaje, jamaya aje jja oe jjeya acani, Jesosaa —acanaje cuaa.

*Jesosaa quea huiso cuana bobia canaje, 4.000
(Macoso 8.1-10)*

³² Majoya Jesosaa o shajja'ajjajji iyaa canaje. O que poeyajo huohui canaje jama ba'a: —Jiquio dejja cuana enijke poani beca cahuime. Ojaya bobi oe poanaje. Jamajjeya ojo eya quea yeno jjashahuabauquiani bobimajo. Oja equi yasijje huoojea sa po'yo ajja. Quea shoe nee nee; ejiojjijo bobi yasijje po chana'.

³³ O shajja'ajjajji cuaa Jesosa saja'a canaje: —Jiquiojo chama' bobi, dejjama'. ¿Yajja yajji? Oya

cuana quea huiso nee nee ebobiajji. ¿Achacua pahui ejjeshejji ojjaña bobiajji?

³⁴ —¿Ache huiso pahui miquea yani? —Jesosaa huohui'ajja canaje.

—Me oeje beca pea'ai, 7 pahui yani. Nahuoo sisi oe pojji yani pea'ai —acanaje cuaa.

³⁵ Jamajjeya Jesosaa ojjaña ejjachichaquiani cuana jama acanaje ba'a: —¡Meshijo anioquecue! —acanaje.

³⁶ Majoya ma 7 pahui, nahuoo sisi pea'ai jjeshe majje Eyacuiñajji nijje, oja Chii nijje miminaje bobijo. Pahui, nahuoo pea'ai miji canaje, Jesosaa. O shajja'ajjajji que quia canaje. Majoya ohuiya dejja cuana huasijje quia canaje. Quia ca poquije quea huiso nee nee jjapanaqui poquipoquinaje, bobi. ³⁷ Jamajjeya ojjaña cuaa ijzia canaje, quea jeje poanaje, de. Ijzia majje o shajja'ajjajji cuaa bobi e'ijjiasejja jjepai aijo chicha ca'yonaje. Quea huiso poanaje, 7 jjepaime. ³⁸ E'e, dejja quea huiso nee neeya bobi ijzia canaje, 4.000 dejja. Quea huiso nee epona cuana, esho'i cuana pea'aiya ijzia canaje. ³⁹ Majoya Jesosaa ojjaña cuana huoojea canaje ojaya equi yasijje. Majoya Jesosa o shajja'ajjajji cuana nijje bishe ai yasijje nequiso-huaquinaje. Besapoquinaje ojje, pea meshi yasijje, Majadana meshi yasijje.

16

*Jodio etiiya Jesosaa acani quea pame ba sa
acanaje*

(Macoso 8.11-13; Noca 12.54-56)

¹ Majoya Paniseo cuana, Sanoseo cuana pea'ai poeyanaje Jesosa que. Oya cuaa Jesosa Eyacuiñajjija huoojea'yo pojjeama poso acanaje. Jamajjeya jama anisho canaje ba'a: —Esohui huohuijji Jesosa, ¿a'a miya Eyacuiñajjija huoojea'yo nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiya jayojja jama acue ecuanaja ebajji! ¡Eyajo oe panacue! —acanaje Paniseo cuaa.

Jamatii Paniseo cuaa Jesosa Eyacuiñajjija huoojea'yo pojjeama poso acanaje. Jamajjeya pea Paniseo cuana nijje jama poanaje ba'a: —Chojja, Jesosa Eyacuiñajjija huoojea pojjeama. Jamajjeya Eyacuiñajjiya jama pojjeama mi pana cajo, capajea ca'yahua.

² Jesosaa oya cuana saja'a canaje: —Eshequi oquequiajo bo huo'ohuo'o poanijo miquianaaya huohuiaña: “E'e, de, mecahuajje quea jea poaje eshequi, ena epoji pojjeama”. ³ Mecajjeahua ca ca quea apo nee nee poanijo miquianaya jama poani ba'a: “E'e de, quea apo; jjeya ena poaje”. E'e —Jesosa poanaje—, eyahuasijje bo ba majje miquianaaya huohuiaña ena chama' pojja'a, ena poaje pojja'a. Jamatii Eyacuiñajjija esohuijo miquianajaya ba jjimaache shono ojjaña jaahuanajji poeje. ¿Apiojji miquea ba jjima? ⁴ Miquianaaya Eyacuiñajjija esohui pajea yaña. Jamajjeya Eyacuiñajjiya pana cani ba majamaja sa poani. Jamatii Eyacuiñajjiya Jjona yahuajo nei nei aca poa jayojja jama ohuaya jjeyahua acaje miquea ebajji.

Jamatii Jesosaa oya cuana jea cana'yonaje jjabahuejjaqui ajjajojo.

*Paniseoja esohui tai pahui shejjee meeiji jayojja
(Macoso 8.14-21)*

⁵ Majoya bae ojje miji yasijke besapoquian-
ijo Jesosa shajja'ajjajji cuana jjashahuabaquinaje.
Jama poanaje ba'a: —E'e de, ecuanaa bobo pa-
jea'yonaje.

⁶ Jamajjeya Jesosaa oya cuana huohui canaje: —
¡Quea ja'a nee jjashahuabaquicue! Paniseo cuana,
Sanoseo cuana pea'aija pahui shejjee meeijiyo
miya quea tai poaje.

⁷ Jamajjeya o shajja'ajjajji cuana ojee mimim-
iminaje: —E'e pojja'a oya jama poanaje ecuanaja
pahui ye jjimajo.

⁸ Ojaya ejjashahuubaqui'yojji Jesosaja eba
poanaje. Jamajjeya oya cuana acanaje: —¿APIOJJI
acuae jja nequiana ojee mimimimiani pahuijo?
¿A'a jja nequianajaya eya ba jjima quea ca'a nee
nee? ⁹ ¿A'a jja quiana ejo jjashahuubaqui jjima
tii? Eyaya me oejje pahui miji majje quea huiso
dejja bobianaje, 5.000 dejja. ¿A'a jja miyaya maya
pajea'yonaje? Ijjia'ijjjajeyo majje acuae jjaya
¿ache jjepai huiso chicha'yonaje pahui? ¹⁰ Oya
jayojjaya me oejje beca pahui, 7 pahui miji majje
quea huiso dejja bobianaje, 4.000 dejja. Majoya
miyaya pahui ¿ache jjepai huiso chicha'yonaje
so'o? ¿A'a ya pajea'yonaje? ¹¹ Eyaya miquianaya
huohuinaje jama ba'a: “Paniseo, Sanoseo pea'aija
pahui shejjee meeijiyo quea tai miya poaje” —
Jesosa poanaje.

¹² Jamajjeya o shajja'ajjajji cuana jjabahuej-
jaquinaje Jesosaa huohui cajje: —E'e, Paniseo,
Sanoseo pea'aija ehuohui taijo se quea tai poaje;

pahui shejjee meejjijo pojjeama Jesosaa huohui canaje –poanaje.

*Penoja esohui quea pame Jesosajo
(Macoso 8.27-30; Noca 9.18-21)*

¹³ Majoya Jesosa Pinipo meshi yasijje poquinaje. Sesanea huasijje poquijeya o shajja'ajjajji huohui'ajja canaje Jesosaa: —Dejja cuana acuae jja ¿yajja poani ejo, ojjañaja Edoe Mesejo? ¿A'ya cuae eya?

¹⁴ Oya cuaa saja'a canaje: —Beca cuana jja jama poani ba'a: Miya Huani, ma ona besameejji poa shequi o'oyanaje poso ca jja mi ca acani. Pea cuana aje jja oe jama poani: Miya Enia, Eyacuiñajjija esohui huohuijji yahuajo nei nequia poa. Pea poani jama ba'a: Miya Jenemia pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa –poanaje o shajja'ajjajji.

¹⁵ Jamajjeya Jesosaa oya cuana huohui'ajja canaje: —¿Miya acuae yajja poani ejo? ¿A'ya cuae eya?

¹⁶ —¡Miya ca ca Eyacuiñajjija Bacua Ejja oe nei, oja huoojea'yo ojjaña jaahuanajji! —Simohuiya Jesosa saja'a canaje.

¹⁷ Jamajjeya Jesosaa oya jama acanaje ba'a: —Simohui, Jjonaja bacua, ¡quea bihui nee pocue! Ecue Chii eyajo aniya miya ba meesahua cani eya oja huoojea'yo ojjaña jaahuanajji. Dejjaa pojjeama miya ba meesahua cani, de. ¹⁸ Jamajjeya eyaya miya huohuaña miya bajjani aje Peno, esejaya esohuijo Mei bajjani. Eyacuiñajjija esohui

e'e jojo nei ejo eyaya miya huohui meesahuaje'yo ecuea epeejji cuana quea ca'a nee epo'yojji. Equi mei jiyo nei jayojja jama quea ca'a nee nequi tii jayojja jama ecuea epeejji cuana quea ca'a nee nequi tiitije'yo; ejeabichajea'yojji pojjeama Edosiquianaja, eshahua cuanaja pealai.

¹⁹ —Eya Emeshi Mese nei jiquio meshijo poaje'yo. Jamajjeya aje miya huoojeaña ecue sohui huohuiya. Ecuea esohui esecue ca'apejojji jayojja jama eyahuasijje edobiqui mee'yojji. Jamajjeya ecuea esohui ba majje miyaya huohuijeache eba'ejji quea mimishi Eyacuiñajjija boti'ama. Miyaya huohuije pea'aiache eba'ejji quea pame nee Eyacuiñajjija eyajo anija quea boti nee.

²⁰ Majoya Jesosaa o shajja'ajjajji cuana huohui neinei canaje jama ba'a: —E'e, eya Eyacuiñajjija huoojea'yo ojjaña jaahuanajji. Jamatii ja'a oe ji-huohuijji so'o! —poanaje.

*Ojaya emano'yojjiyo Jesosa miminaje
(Macoso 8.31-9.1; Noca 9.22-27)*

²¹ Majoya Jesosaa o shajja'ajjajji cuana huohui coo canaje ojaya emano'yojjiyo: —Eya quijje Jenosanena huasijje poquije. Jomajo Moisesija etehue'yo huohuijji cuaa, Jodio etii bajjani cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manoje'yo ohua me caca mee cajje. Jamatii beca cahuime po majje mo shequi mee caje o'oya ecue Chiiya —acanaje.

²² Jamajjeya Peno quea yeno nee poanaje Jesusoso. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese, miya

Eyacuiñajjiya jaahuana caje'yo. Peaa aje oe miya enapajji pojjeama, equecua'yojji pojjeama jja mi, de.

²³ Jamajjeya aje jja oe Jesosaa oya Peno cojja ba neinei cani jama tecueame acanaje ba'a: — Peno, ja'a jamaya mimiji! Miya e dasiajji nisho epo jayojja mimiani. Miya Edosiquiana Satanasa jama mimiani. Jjashahuabaquiani quea tai, dejja jama; Eyacuiñajjiya ejjashahuabaqui'yojji jama pojjeama —poanaje.

²⁴ Jamajjeya Jesosa ojjaña o shajja'ajjajji nijje jama miminaje ba'a: —¡Ojjaña joya enijje e'e jojo nei jjapeequi'yo sa poani Eyacuiñajjiya esohui jayojja jama ba'ecue! E'e, e jayojjaya jja enijje capoquiahua, jamatii onaa napa cajje aje jja oe quea nee poaje'yo pojja'a. ²⁵ E'e, ojjaña joya Eyacuiñajjiya esohui jayojja jama ba'e sa po ajja aje oe ba'e tiitii aija enijje. Joya ecuea esohui jayojja jama ba'e sa poani ca ca ba'e tiitiiye'yo enijje eyajo. ²⁶ E'e pojja'a dejja quea huiso nee nee aquiana ojaya yajji chicha caje. Jamatii oya cuana cuaqui yasijje jeajea cajo, ojjaña ojaya aquiana cuana edojoji pojjeama. ¿A'a ojjaña ojaya aquiana cuana Eyacuiñajji yasijje quia cajo, oya cuana cuaquijo ani cuayaqui mee caje'yo? ¿A'a Eyacuiñajjiya oya cuana onijke eyajo ba'e mee caje'yo ma aquiana quea huiso nee nee sosejje? Chojja. ²⁷ E'e jojo nei eya ojjañaja Edoe Mese poeje o'oya. Quea jeajahua nee nee, quea ca'a nee nee poeje'yo. Eya esohuidojiji quea huiso nee nijje poeje'yo. Poe majje eyaya ojjaña cuana sosequiaje'yo. Ojjaña ba'enaje jayojja eyaya sosequiaje'yo. ²⁸ E'e jojo nei eya ojjañaja Edoe Mese

ojjaña huoojea'yojji quea ca'a nee nee poaje'yo. Beca cuaa jiquiojo nequiya jjaja mo jamaya ba caje mano'yo jjimahuua —Jesosaa o shajja'ajjajji cuana acanaje.

17

Jesosa quea cojja jiji poanaje oja Chii nijje mimianijo

(Macoso 9.2-13; Noca 9.28-36)

¹ Quijje pishana me oejje pea emejje oe cahuime po majje Jesosa poquinaje o shajja'ajjajji nijje pea beca peejjima dejja nijje, Peno nijje, Satiaco, oja doe Huani nijje pea'ai. Mahuiso dejja nijje poquinaje eyiyo huasijje quea huesha nee. ² Jocuama nequi oya Jesosa jjahua-paqui'yonaje; quea cojja jiji nee poanaje, eshequi jayojja poanaje, quea jeajahua nee nee. Oja daqui quea oshe nee nee, bo oshe jayojja poanaje. ³ Moisesi, Enia pea'ai ma yahuajo nei ba'ya poa Jesosa nijje mimimiminequi ba canaje o shajja'ajjajji cuaa. Moisesi, Enia pea'ai Jesosa nijje mimimiminequinaje Jesosa onaja mimishijo emano'yojji jjejojoya. ⁴ Jamajjeya Peno Jesosa nijje jama poanaje ba'a: —E'e Emeshi Mese, jiquiojo ecuana canequiquiahua, quea pame nee. Pea beca peejjima equi sisi ecuaaya ca'iyaahua miquea, Moisesija, Eniaja pea'ai eba'ejji.

⁵ Peno mimianijo tii bo quea oshe nee nee nequioquenaje. Queya canaje huojaa. Shajja'ajja canaje Eyacuiñajji jama poani ba'a: ⁶ —Jiquio ecuea ecue Bacua Ejja quea jea nee nee. Eya ojo quea bihui nee nee. ¡Oya oe shajja'ajjacue!

O shajja'ajja majje quea mete nee nee poanaje Peno, Satiaco, Huani pea'ai. Meshi yasijje hui oquequinaje. Ecui'oshajjajo nequinaje. ⁷ Jamajjeya o que poeyanaje Jesosa. Napa canaje emeya.

—¡Nequisohuacue! ¡A'a quea mete pojji! —Jesosa poanaje.

⁸ Jamajjeya oya cuana nequisohuanaje. Jesosa oe nei nequi bajea canaje.

⁹ Eyiyodo jaaoquequije'yo mimimimi jaaoque'yonaje. Jesosaa ma ojjañaja Edoe Meseya acanaje jama ba'a: —¡Ma miya eyiyodo banaje a'a jihuohuijji! ¡Quijje eya emano'yojaa shequi o'oyajo mo oe pea cuana huohuicue! —Jesosaa acanaje.

¹⁰ Jamajjeya oya cuaa huohui'ajja canaje: —Jesosa, Moisesija etehue'yo huohuijji poaniya jama acani ba'a: “Enia oe ebionei capoe'yahua Eyacuiñajjija huoojea'yo ojjaña jaahuanajji poe jjimahuajo”. ¿Yajjajje acuae Moisesija esohui huohuijji cuaa jama acani? —poanaje Peno, Satiaco, Huani pea'ai.

¹¹ Jesosaa saja'a canaje jama ba'a: —E'e jojo nei Enia jayojja jama oe dejja ebionei epoejji, ojjaña cuana ejo e'e jojo nei ejjashahuabaqui meesahua-jji. ¹² E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poa. Pea poso acanaje. Jamajjeya cuia ca'ya poa. Jamaya pea'ai eya acaje'yo cuaa. Eya ojjañaja Edoe Mese quea nee nee po mee caje'yo cuaa —poanaje Jesosa.

¹³ Jamajjeya o shajja'ajjajji cuana jjashahuabaqui nequinaje. Jama poanaje: —E'e

de, oya Huanijo mimiani, ma ona besameejji poajo. Eniaa jama sohui huohuime acanaje Huaniya, de —poanaje Peno Satiaco nijje Huani pea'ai nijje.

*Esho'i niñepoquipajea mee ca'yonaje Jesosaa
(Macoso 9.14-29; Noca 9.37-43)*

¹⁴ Eyiyoko nequi jaaoque'yo majje Jesosaa, o shajja'ajjajjiya pea'ai ba cañaquinaje quea huiso cuana ejjachichaqui nequica. Óe dejja Jesosa que poeyanaje. Ecui'oshajjajo nequiya huohui'ajja canaje: ¹⁵ —Emeshi Mese Jesosa, ¡ecuea ebacua ejjajo quea yeno jjashahuabaquicue! Oya quea mano nee nee, niñepoqui poani. Niñepoqui majje ena huasijke jea cani, cuaqui yasijke pea'ai jea cani. ¹⁶ Eyaya oya yenaje mi shajja'ajjajji cuana huasijke. Jamatii niñepoquipajea ajja.

¹⁷ Jesosaa ojjaña cuana acanaje: —¡De! ¿Ache shono acuae jja nequiana ejo jjashahuabaquije e'e jojo nei? Quea sapa ca'a mi coma. ¿Ache cahui huiso minijje nequi majje miyaya eya baje'yo Eycuuiñajjija huoojea'yo ojjaña jaahuanajji quea ca'a nee nee? ¡Miquea ebacua ejja e que jjequicue!

¹⁸ Jjequi canaje Jesosa que. Jesosaa o niñepoquimeejji poani huoojeacuayajea ca'yonaje: —Eshahua, ¡cuayaqui'yocue, esho'i niñepoquimeejji poani! —Jesosa poanaje.

Cuayaqui'yonaje. Jamajjeya oja bacua ejja niñepoquipajea'yonaje, quea aja nee po'yonaje.

¹⁹ Quijje ojjaña cuana poqui majje Jesosa que poeyanaje o shajja'ajjajji cuana. Huohui'ajja canaje: —¿Yajjajo acuae ecuaaya eshahua mi huoojeacuayajea mee'ajja'yonaje?

20 Jesosaa saja'a canaje: —Miquianaya jja ejo jjashahuabaqui ja'a jjima. Jjashahuabaquiani jama ba'a: “E'e pojja'a Jesosaa ecuanaja eshahua huoojeacuayajea mee ajja”. Jamajjeya mi huoojeacuayajeaña. ¡Bacue oe! Ejo jjashahuabaquicue jama ba'a: “Jesosaa e'e nei ohuaya jayojja jama ecuana ameesahua caje'yo”. Miya jama jjashahuabaquiajo, Eyacuiñajjiya miya amee caje'yo ojjaña eyaya aña jayojja jama, ma dejjaajjima acani amee caje'yo pea'ai. **21** E'e, jamatii jiquio eshahua jayojja quea huoojeacuayajea camaja. Eyacuiñajji nijje mimi huicha'a huicha'a majje, ojo jjashahuabaquianijo ijija'ijjia jjima po majje pea'ai huoojeacuayaje'yo miyaya —Jesosa poanaje.

*—Quije eya manoje'yo —Jesosa poanaje
(Macoso 9.30-32; Noca 9.43-45)*

22-23 Majoya Janinea meshijo ojee poquijeya Jesosaa o shajja'ajjajji cuana huohui canaje: —E'e, quijje eya iña meesahuaje onaja equecua'yojji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

O shajja'ajja majje o shajja'ajjajji cuana quea yeno nee nee poanaje. Quea mete pea'ai poanaje.

Eyacuiñajjiya equi iya bame'yojji beijo chicha canaje beijo chichajji poaniya

24 Majoya Capenaoma huasijke poeyajo, beijo chichajji poani Peno que poeyanaje; huohui'ajja canaje jama ba'a: —¿A'a acuae mi mi sohui huohuijjiya beijo quia cani, ma Eyacuiñajjiya equi iya bame'yojji?

25 —E'e de, quia cani —Peno poanaje.

Majoya Simohui Peno equi yasijke dobiquiajo, Jesosaa oya huohui'ajja canaje: —Simohui, ¿yajjajje acuae mi jjashahuabiquiani? ¿Emeshi mese neiya ajea bejjo sosequia mee cani? ¿A'a quea huesha ba'eja? ¿A'a oja meshijo ba'eja pojja'a?

—Quea huesha ba'eya poe majje sosequia caje'yo —poanaje Peno.

26 —E'e —Jesosa poanaje—. Jamajjeya emeshi mese neija echacojji cuana esosequia'yojji pojjeama. **27** Jamatii oya quene'ama epojji ejjasosequiaquijji. ¡Poquicue miya bae yasijke! ¡Joya ebionei ijija caje oe jjequiquiayacue! ¡Oja nabajo ba'e oe bacue ejjeshejjii quea sose huiso nee nee, ejo, mijo pea'ai esosequia'yojji! ¡Dojocue! ¡Bejjo chichajji poani yasijke quiacue! “Ma'aje esohui huohuijjija, ecuea pea'ai” acue —Jesosa poanaje.

18

*¿A'ya ona huoojeajji jayojja nequije eyajo?
(Macoso 9.33-37; Noca 9.46-48)*

1 Majoya ojjaña o shajja'ajjajji cuaa Jesosa que poe majje huohui'ajja canaje: —Jesosa, quijje miya ojjaña huoojeajji poaje. ¿A'ya cuae mi jayojja jama poaje minijje ona huoojeajji? ¿A'a ecuanaya pojja'a?

2 Jamajjeya Jesosaa oe esho'i nei o que iyaa canaje. O cojja nei nequinaje. **3** O shajja'ajjajji cuana huohui canaje Jesosaa: —¡Bacue oe! ¡Jiquio esho'i nei jama pocue! ¡Jjashajja'ajjaquicue oe! Esho'i nei pojji mi po'yajo ca ca enijje eba'e'yojji pojjeama quijje eya ojjaña huoojea'yojji poaje.

⁴ Jamajjeya joya esho'i jama quea bei jjashajja'ajjaquiani e que poquije'yo, e jayojja ona huoojea'yojjii eyajo poaje. ⁵ E'e, ecuea epeejji esho'i quea pame jama jjashajja'ajjaquiani. Ojjañaa joya ecuea epeejji quea jea acani eya pea'ai quea jea acani —Jesosa poanaje.

*Quea mimishi mi po o'oya chana'
(Macoso 9.42-48; Noca 17.1-2)*

⁶ —Ecuea epeejji jjeya nei jjapeequi ca'a'ama ja'a quea mimishi po meeji cuana! Joya o mimishi pomeejji poani Eyacuiñajjiya quea nee nee po mee caje'yo, de. Jamajjeya ¡quea mimishi epo mee cuahuajje oe mano'yocue! ¡Jjanaayipecaqi majje mei quea quemo nee jeyocue; bae quea doe yasijje oe tohuaacue! ⁷ Mimishi pomeejji cuanajo quea yeno nee nee ojjaña poani. Jamatii mimishi pomeejji yani, de. Quea yeno ca ca oe mimishi pomeejji poaje, quea nee nee po mee caje'yo tii Eyacuiñajjiya —Jesosa poanaje.

⁸ —Jamajjeya miya quea mimishi po mee cani emeya, ejiojjiya pojja'a. ¡Ejiojji, eme' pojja'a ejajasejjajea jayojja jama acue mimishi'ama epoji! Eme', ejiojji pea'ai chamajo eyahuasijje poqui'yajo Eyacuiñajji nijje eba'e tiitii'yojjii quea pame nee nee. Miquea beca eme', ejiojji pea'ai yanijo pojja'a quea mimishi tii poani ca ca cuaqui yasijje poquije'yo. Quea tai nee nee, quea nee nee; cuaqui jijipajea'yo ajja, de. ⁹ Ecojjajo jjabaqui majje miya quea mimishi poani pojja'a. Jamajjeya ¡ecojja ecajjajea jayojja jama acue! Cojjama', mimishi'ama miya eyahuasijje poquije'yo quea pame nee nee poaje'yo. Cojjajji, quea mimishi tii

poani miya cu aqui yasijke poquije'yo ca ca quea tai nee nee, quea nee nee poaje'yo tii tii. E'e, ¡quea jjashahuabaqui ja'a oe pocue! ¡Mimishi cuana oe pajea'yocue! —Jesosa poanaje.

¹⁰ —Jamajjeya ¡ecuea epeeiji eyacua a'a boti'ama aji! E'e jojo nei eyaya miya huohuaña eyajo esohuidojijiya, o jaahuanajjiya ecue Chii yasijke huohuiqui cani. ¹¹ Eya ca iña ojjañaja Edoe Mese poeyanaje mimishi cuana cuijea'yohua cu aqui yasijke miquianaya epoqui poani jjejojo —Jesosaa o shajja'ajjajji huohui canaje.

*Esohui eba meesahuajji ñajjajja epoquiquehuajo
(Noca 15.3-7)*

¹² —Jamajjeya eyaya miquianaya huohuije esohui ejjashahuabaquijji —Jesosa poanaje—. Oe dejjaja quea huiso ñajjajja yaninaje, 100 huisome. Oe nei poquiquehua'ya poa, ¿ae poanaje oya? ¿A'a sa'ajja canaje? E'e. Pea cuana, 99 huisome ñajjajja ojee ijija'ijjiaqui jeanana canaje epoquiquehua sa'ajja'yohua. ¹³ Ba'yo majje quea bihui nee po'yonaje. Pea ñajjajja poquiquehua jjimajo quea bihui pishana poanaje: “¡Jiquioya ecuea ñajjajjaja bacua, de!” poanaje eñajjajja mes. ¹⁴ Ñajjajja jaahuanajji ñajjajja ba'yo majje quea bihui nee nee poa. Jamaya poaje ecue Chii: Ecuea epeeiji eyacua quea mimishi jjejojo epoquiquehua'yo jayojja jama ojo jjashahuabaqui o'oyajo, Eyacuiñajji quea bihui nee poaje'yo —Jesosa poanaje.

*¡Miquea epeeiji minijke quea mimishi poajo oja
mimishi pajea'yocue, quea bei po o'oyacue onijke!
(Noca 17.3)*

15 —Ecuea epeeiji minijje quea mimishi poanijo, ionijke mimiquicue! ¡Ojaya mimishijo jjashahuabaqui meesahuacue! Jjashahuabaqui majje mimishi capajea ca'yahua. Jamajjeya minijje jjapeequije o'oya. **16** O mi jjashajja'ajjaquiajo ipea iyaacue, beca pojja'a, ecuea epeeiji pea'ai! ¡Ojee poquicue onijke mimiya! Jamajjeya oya cuaa miya ba caje e'e jojo nei miquea epeeiji nijje jjapeequi o'oya sa poani. **17** Ohuaya oya cuana mi jjashajja'ajjaquiajo ojjaña Eyacuiñajji epeeiji cuana huasijje iyaacue emimijji, ojaya mimishi epajea'yojji! Ojjaña niñeshe'ajja cajo mi jjashajja'ajjaquiajo, Eyacuiñajji epeeiji jama pojjeama oya. Jamatii jjadasiaquijji jama, de —Jesosa poanaje.

18 —Jamajjeya ojjaña ecuea epeeiji cuana miquianaaya huohui meejeache eba'eiji quea mimishi, ma Eyacuiñajji eyajo anija boti'ama pea'ai. Huohui meeje pea'aiache eba'eiji quea pame nee, ma Eyacuiñajji eyajo anija quea boti nee pea'ai —Jesosa poanaje.

19 —E'e jojo nei miquianaya meshijo ba'e ojee mimiajo, Eyacuiñajji, ecue Chiiya eyajo aniya miquianajaya esohui saja'a cani. **20** Beca cuana enijke jjapeequiani ejjachichaquianijo, eya o pejjejo nequiani —Jesosa poanaje.

Esohui ejjashahuabaqui meeji oe dejja onaja mimishijo quea quene tii tii poani

21 Majoya Penohua Jesosa huohui'ajja canaje: —Emeshi Mese Jesosa, ecuea epeeijiya quea mimishi ahuicha'a huicha'a cajo, ¿a'a eyaya oja mimishi capajea huicha'a huicha'a'yahua? ¿Ache

huiso huohui'yome amajje jjabeiqui ca'yojji? ¿A'a quea huiso pojja'a, me oejjje pea beca, 7 pojja'a?

²² Jesosaa saja'a canaje: —Chojja, Peno, me oejjje pea beca, 7 pojjeama. Quea huiso nee nee huohui'yome amajje jjabei neineiqui ca'yojji, jama tii tii epo'yojji —Jesosaa acanaje.

²³ Jamajjeya Jesosaa pea esohui ej-jashahuabaqui meeiji huohui canaje jama poani ba'a: —Eyacuiñajji ojjaña huoojea'yojji poaje. Jamaya poaje ba'a: Emeshi meseya aquiana oja quia sosequia mee ca'yani echacojji cuana.

²⁴ Sosequia mee canijo o que jjequi canaje oe echacojji poani. Aquiana quea huiso nee nee oja jjeshe poanaje. Jamajjeya sosequia ajja'ajja jjima, ojaya. ²⁵ Ma echacojji sosequiaquia ajja; yajja sosequia'yome yajji jojoya mi sosequiajeyo ca'yonaje. Jamajjeya emeshi meseya quea quene huohui canaje: “¡Oya oe quiacue ejjeshejji sosejje! Sosema' cachaco cahua. ¡Ojaya ehuanase, oja bacua cuanaya quiacue pea'ai, ojaya aquiana cuana pea'ai quia'yocue e sosequia'yojji!”

²⁶ —O shajja'ajja majje echacojji o que poquinaje. Ecui'oshajjajo nequi oya mimi nequinaje: “Ecuea emeshi mese, ja'a ecuana dojojji equia'yojji bejjo sosejje! ¡Ishoa'ajjacue! Eyaya ojjaña sosequia jeyo jeyoje'yo miya”.

²⁷ —Emeshi mese ojo jjashahuabaquinaje. Quea aquiana huiso nee nee nee sosequia jjima. Jamatii oja bajjani cuijea ca'yonaje, sosequia jjima tii. Poqui mee ca'yonaje, de.

²⁸ —Majoya echacojji poquinaje quea bihui nee nee. Jamatii poqui majje ma echacojjiya pea echacojji onijje nequi sa'ajja canaje. Ba

majje iñasibijea canaje. Jama poanaje ba'a: “Ijjeya nei mo sosequiacue mique jjeshe cuana!” oya poanaje. Ojaya oe pojji nei soequia jjima poanaje. ²⁹ Ecui'oshajjajo nequi mimi nequinaje jiquio pea echacojji: “Epeeiji, ¡ejo jjashahuabaquicue! ¡Ishoa'ajja socue! Ojjaña aje mi soequia jeyojeyo'yo de”.

³⁰ —“¡Chojja! ¡Ishoa sa po ajja iña!” poanaje. Jeanobiaa dojo canaje; ohua soequiajeyo ca'yajje huoojea ca'yonaje.

³¹ —Pea echacojji cuaa ba canaje. O dojo cajo quea yeno jjashahuabaquinaje. Poquinaje emeshi mese huohui'yohua. ³² Ma shajja'ajja majje emeshi meseya huoojea canaje ojaya echacojji jjequi'yohua. Poeyajo tecuea canaje emeshi meseya: “Miya ca mi ca oe quea mimishi nee. Miquea aquiana quea huiso nee nee soequia jjima. Jamatii enijke mimi'yajo eyaya miquea bajjani cuijea'yonaje, soequia jjima tii. ³³ Jamajjeya ¿yajjajo miquea epeejjiyo mi jjashahuabaquinaje miya? ¡E jayojja oe miya mi poanaje!” emeshi mese poanaje. ³⁴ Quenequene neinei'yonaje emeshi mese. Ejeanobiaiji huoojea ca'yonaje quea nee nee po meeya ohua soequiajeyo ca'yajje —jamaya Jesosa poanaje.

³⁵ —Jamajjeya jiquio ecua emeshi meseya acani jayojjaya jamaya miquianaya acaje'yo ecue Chi-iya, ca onaja mimishi miya mi pajea neinei'yajo. Miquea mimishi cuana pajea'yo ajja, cuijea'yo ajja pea'ai —Jesosaa acanaje.

*Esohui huohui canaje ehueijijo, Jesosaa
(Macoso 10.1-12; Noca 16.18)*

¹ Majoya esohui huohui majje Jesosa Janinea meshijo ani po'oquequinaje Jodea meshi yasi-jje, Jodana cuei ojje miji yasijje. ² Jomajo quea huiso dejja cuana onijje poquinaje. Ohuaya ojjaña jjaajaqui mee ca'yonaje, huaquia mee ca'yonaje. ³ Paniseo cuana ca ca o que poeyanaje jjadasi-aquiya nisho. Jamaya jjashahuabaquinaje ba'a: —É'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje.

Jamajjeya Jesosa huohui'ajja canaje cuaa jama ba'a: —Esohui huohuijji, ¿a'a acuae ehuanase huei cajji? ¿Yajjajo acuae ehuanase hueijea cajji so'o? ¿Achajja tehuemeya acuae oe Moisesiya aca poa?

⁴ Saja'a canaje Jesosaa: —¿A'a miquea Moisesija etehue'yo ba jjima esohui? Yahuajo nei nei tehue ca poa Moisesiya jama ba'a:

“Yahuajo Eyacuiñajjiya pana coo ca poa yahue, epona pea'ai. ⁵ Huohui ca poa ohuaya: — Jamajjeya yahueya oja chii, ojaya enaese pea'ai cajiñayiya ca'yahua oja huanase nijje eba'ejji”.

⁶ Oya cuana beca. Jamatii oe nei jayojja Eyacuiñajjiya oya ba cani, becamejjiji pea'ai pojjeama, oe nei jayojjaya. Cuanaya Eyacuiñajjiya oe jayojja aca poa. Jamajjeya ja'a oe jea meeiji! ¡Jama tii tii oe nei oe acue! —Jesosaa acanaje.

⁷ Huohui'ajja o'oya canaje Paniseo cuaa: — Jamajjeya ¿yajjajo acuae Moisesiya tehueme aca poa? Jama ba'a:

“Huei'yo majje yahueya ehueijeajji papeni ete-hue'yo caquia cahua oja huanase. Majoya cahuoofea cahua”.

⁸ Saja'a canaje Jesosaa: —Miquea etiiquiana quea mimishi nei jjejojoya Moisesiya huei mee'ajja canaje. Quijje nei Moisesiya jamaya tehue ca poa; jamatii Eyacuiñajjiya jamaya pojjeama pana coo ca poa. ⁹ Jamajjeya eyaya miya huohuiaña e'e jojo nei ehuanase pea dejaja sii jjima huei ca ajja. Joya ehuanase hueijji epo pea epona ehuana'yojji quea mimishi nee, epona siiji epo jama. Eyacuiñajjiya oya ba cani quea mimishi. Joya ma eponajo jjahuanaquiajo quea mimishi pea'ai poani; onaja ehuanase nijje poani —Jesosa poanaje.

¹⁰ —¡De! Jamajojoya eseya jjahuanaqui ca ajja. Jamatii shacuima' nequi cajji ojjaña eseya cuana. —o shajja'ajjajji poanaje.

¹¹ —Cho, ojjaña pojjeama shacuima' nequi cajji —Jesosa poanaje—. Beca cuana Eyacuiñajjiya huooofea caje'yo shacuima' tii enequijji. ¹² Beca cuana jjahuanaqui ajja, jamatii ejjhuanajquijji pojjeama. (Jamaya joya quibojjisha nei, biñajjajjama' cuana pea'ai.) Beca cuana jjahuanaqui ajja jamatii yajjajje shai jjahuanaqui sa po'yo ajjajo. Beca cuana Eyacuiñajjiya esohui ehuohui aiquijji, ojo echaco neinei cajji Eyacuiñajjiya huooofea canaje jjahuanaqui jjima tii tii enequijji. Jamatii Eyacuiñajjiya ojjaña huooofea'yo ajja shacuima' tii enequijji. Jamajjeya ¡ojaya ejjashahuabu'yojji mijo jamaya acue, miyaya! —Jesosa poanaje.

*Esho'i quianajo Eyacuiñajji nijje miminaje Jesosa
(Macoso 10.13-16; Noca 18.15-17)*

¹³ Majoya Jesosa que esho'i nei cuana jjequi canaje cuaa. Huohui canaje: —Jesosa, jiquio esho'i nei sapa napa'ajja majje ¡Eyacuiñajji nijje mimicue ojaya ejaa huanajji! —poanaje.

Jesosa shajja'ajjajji cuaa oya cuana tecuea canaje: —¡A'a jja oe Jesosa que jjequi majajji esho'i quiana! ¡Esohui oe cahuohui cahua!

¹⁴ Ma ba majje Jesosa poanaje: —¡Esho'i quiana e que capoe'yahua! ¡A'a quea huesha nequi meeiji! E'e, esho'i quiana jjashahuabacuajiquiani; enijje jjapeecuajiquiani. Jamaya ecuea epeeiji esho'i jayojja eyaya jaahuanamee sa aña pea'ai. Jamajjeya e que poquije'yo, eya eyajo ojjaña huoojea'yojji poaje —poanaje.

¹⁵ Jamajjeya esho'i cuana biajje eme' huana majje Jesosa poquinaje.

*Edejja etii pishana quea aquiana huiso Jesosa
nijje miminaje*

(Macoso 10.17-31; Noca 18.18-30)

¹⁶ Majoya oe dejja Jesosa que poeyanaje. Huohui'ajja canaje jama ba'a: —Emeshi Mese, ¿achajja po majje acuae mo eyahuasijje poqui ca'yojji Eyacuiñajji nijje eba'e tiitii'yojji? ¿Achajja acuae ba'e cajji quea pame nee epoiji?

¹⁷ —¿Apiojji miyaya eya huohui'ajjaña: “¿Ae quea pame nee epo'yojji?” Eyacuiñajji ca oe nei quea pame nee. Jamajjeya onijje ba'e tiitii'yo sa po majje ca oe joya shajja'ajjacue! ¡Ojaya esohui etehue'yo jayojja jama oe ba'ecue! —Jesosa poanaje.

18 —¿Ache esohui etehue'yo? —huohui'ajja canaje.

19 Jesosaa saja'a canaje: —Eyacuiñajjija esohui etehue'yo jama poani ba'a:

“¡A'a pea quecuajji!

¡A'a sii pojji!

¡A'a siajje pojji!

¡A'a pea siiiji!

¡Mique chii, mique nae pea'ai oe shajja'ajjacue!

¡Pea cuana mi pejjejo ba'e mique huapa pojjeama jayojja quea jea oe acue!”

20 —E'e, eyaya jamaya aña, esho'yahuua jama tii tii sohuaqui eyea. ¿Pea acuae yajja po cajji eyajo eba'e tiitii'yojji? —jiquio dejjaaa Jesosa huohui'ajja canaje.

21 —E'e, miya quea pame nee nee Eyacuiñajji jayojjaya po sa po majje ¡poquicue, miquea aquiana cuana quiaquicue ejjeshejji sosejje! ¡Ejjeshejji quia'yocue aema' cuana huasijje! ¡Majoya poecue, enijke epo'yojji! Jamajjeya eyajo Eyacuiñajjiya miya aquiana quea pame nee quea huiso quia caje'yo quijje.

22 Jesosaja esohui shajja'ajja majje dejja etii pishana quea dejja tai jjejojo quea yeno poquinaje; ojaya aquiana quea huiso nee nee yani jojoya quia sa po'yo ajja.

23 Jamajjeya Jesosaa o shajja'ajjajji cuana huohui canaje: —E'e, dejjaaa quea mimishiya jjejojoya aquiana quea huiso, meshi quea quemo pojja'a nahue canijo beshahua nei e que poqui ajja, eya eyajo ojjaña huoojea'yojji poaje'yo.

24 —E'e, eyaya huohuaña pea'ai jama ba'a: Ahuoja quii huejjajje ino jeanobiaña jamaya, ¿a'a

mapichi jeanobia cajji ahuoja quii huejjajje? Quea camaja coma. Jiquio ecua mapichi ahuoja quii huejjajje jeanobia cajji pome jamaya dejja quea aquiana huiso nee nee nahue cani eyahuasijje edobiquijji pojjeama.

²⁵ O shajja'ajja majje jjashahuaba neineiquinaje o shajja'ajjajji. Ojee mimimiminaje: —Jamajjeya ¿a'ya shai eyahuasijje dobiqui mee caje'yo?

²⁶ Cojja ba neinei canaje Jesosaa. Huohui canaje: —Dejjaam jamaya amee ajja tii. Eyacuiñajjiya oe neiya ojjaña acani. (Eyahuasijje dobiqui mee cani pea'ai joya quea aquiana huiso nee) —Jesosa poanaje.

²⁷ Jamajjeya Peno jjashahuabaquinaje ma dejja aquiana quea huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yonaje minijje epoqui'yojji. Jamajjeya ¿ae acuae ecuana quiaje so'o, de?

²⁸ Jesosaa saja'a canaje: —E'e jojo nei quijje Eyacuiñajjiya ojjaña eyacua pana ca'yajo eya eyajo nequije'yo ojjaña huoojea'yojji nei. Miquianaya, 12, e shajja'ajjajji poani enijje nequije'yo, enijje ona huoojea'yojji poaje'yo. E'e, miquianaaya Jodio cuana, ecuea pea epeejji cuana pea'ai huoojeaje'yo tii. ²⁹ E'e nei beca cuana ecuea esohui jama a sa poanijo aquiana cuana jeana ca'yani: Ojaya equi, oja huapa pojjeama, oja chii, oja nae pojja'a, oja bacua cuana pojja'a, oja huanase pojja'a jeana ca'yani. Jamajjeya e'e jojo nei quijje Eyacuiñajjiya oya cuana quea huiso nee nee o jayojja quia caje'yo; quea bihui nee nee ba'e tiitii mee caje'yo pea'ai eyajo onijje. ³⁰ Jamatii beca cuana jjeya ona huoojeajji poani eyajo ona huoojea'yojji

pojjeama poaje'yo. Joya jjeya ona huoojea'yojji pojjeama ca ca eyajo ona huoojea'yojji nei nei poaje'yo e jayojja —Jesosa poanaje.

20

*Esohui ese jjashahuabaqui meeiji huohui canaje
Jesosaa e'acuijjajja mesejo*

¹—E'e —Jesosa poanaje—, quijje eya ojjaña huoojea'yojji poaje, ojjaña sosequiaje'yo jjeya enijke chaco canaje sosejje. Jamaya poaje ba'a: Oe dejja, e'acuijjajja mese mecajjeahua poquinaje. Echacoji cuana iyaa canaje. Huohui'ajja canaje: ² “¿A'ya cuae jjeya poquije acuijjajja huojohua? Ojjaña miya eyaya sosequiaje oe esodojjo quea sose huiso nee nee sosejje”. “E'e” poanaje, “chacoje ecuaaya oe esodojjo quea nahue nee sosejje”. Majoya huoojea canaje chacohua.

³ —Quijje pishana eshequi jaasohua pishana majje ona ijjal'ijjia'ani yasijje poquinaje e'acuijjajja yiye mese. Beca dejja chacochaco jjima ani ba canaje. ⁴ Huohui'ajja canaje: “¿A'a miyaya acuijjajja yiyejo chacoje pea'ai? Miya eyaya sosequiaje quea sose huiso pea'ai”. “E'e, chacoje” poanaje. Poquinaje chacohua.

⁵ —Quijje eshequi biacojjajja nequijo, sinecua nei pea'ai oya poqui majamajanaje pea cuana iyaa echacoji. ⁶ Eshequi ejjajeapaaquijo pea'ai poqui o'oyanaje. Dejja cuana chacochaco jjima ani ba canaje. “¿Apiojji acuae mi chacochaco jjima ani?” acanaje e'acuijjajja meseja. ⁷ “Chama oya ecuea echacomjeejji aña, de; ajea esosequia'yojji”

saja'ame acanaje cuaa. “E'e. ¡Ecuea acuijjajja yiyejo chacoquicue pea'ai!” poanaje.

⁸—Meca nei e'acuijjajja meseya ona chacomee-jji huohui canaje: “¡Echacojji cuana iyaacue! ¡Sosequiacue! ¡Joya quijjeyejje nei dobiquinaje ebionei sosequiacue! ¡Joya ebionei dobiquinaje quijje yejje nei sosequiacue!”

⁹—Majoya echacomeejjiya joya eshequi ejjajeapaquijo dobiqui cuana sosequia canaje oe esodojjo quea nahue. ¹⁰⁻¹¹ Jamajje quijje joya mecaj-jeahua dobiqui cuana poeyanaje. Sosequia canaje oe esodojjo quea nahue pea'ai. Ba majje quea yeno poanaje, quea huiso nee nee esosequia caje poso. Jamatii oya sose huisoajja pea'ai sosequia canaje. E'acuijjajja mese nijje quenequenenaje. ¹² Mimijajinaje jama ba'a: “Joya eshequi ejjajeapaquijo poeyanajeya aje oe oe pojji chaco canaje. Ecuanaaya ca chaco neineinaje eshequi quea quiyojo. Jamatii miyaya oya sose huisoajja pea'ai sosequianaje. ¿Apiojji acuae jja ecuana jayojja pea'ai sosequianaje so'o?” poanaje. ¹³ “E'e epee-jji cuana, eyaya miya sosequianaje quea pame nee” poanaje. “Mi poeyajo jama poanaje ba'a: —E'e, chacoje oe esodojjo quea nahue sosejje — poanaje. ¿A'a e'e? Jamajjeya eyaya jamaya miya quia meenaje. Jamajjeya ¡a'a quea quene pojji! ¹⁴ Eyaya jiquio dejja quijjeyejje nei cuana oe esodojjo quea nahue nee quia sa poani mi jayoj-jaya. Jamaya quea pame. ¹⁵ Mi jayojjaya quea huiso sosequianaje. ¡A'a jja oe miya quea quene pojji! Bejjo ecuea jojoya eyaya quia sa amajje eyaya quiaña” e'acuijjajja mese poanaje —Jesosa poanaje.

16 —E'e, e'acuijjajja meseya ojjaña sosequia canaje ojaya ejjashahuabaqui'yojji jayojja jama. Jamaya Eyacuiñajjiya acaje'yo. Joya quijje nei jjapeequije'yo quea bihui nee ba'e tiitii mee caje'yo eyajo onijje pea'ai. Ojjaña ojaya ejjashahuabaquiji jayojjaya jama sosequia caje'yo pea'ai. Eyacuiñajjiya quea huiso iyaa caje onijje eba'e tiitii'yojji. Jamatii oe pojji babaca caje'yo oja epreejji huoojea'yojji epoji —Jesosa poanaje.

*—Quijje eya manoje'yo —Jesosa po o'oyanaje
(Macoso 10.32-34; Noca 18.31-34)*

17 Majoya Jenosanena huasijke poquinaje. Jesosaa o shajja'ajjajji cuana dojo canaje ejiojji sahua huasijke esohui huohuijji: **18** —¡Bacue oe! Eya jiquio ojjañaja Edoe Mese. Eseya Jenosanena huasijke poquije. Jomajo mo iña meesahuaje eya Jodio cuanaja equecua mee'yojji. E'e, Moisesija etehue'yo huohuijjiya, Eyacuiñajji nijje emimijji etii cuaa pea'ai eya iña mee caje. Taaa neineije cuana: “¡Oya quecuajeacue!” poaje. **19** Jodio pojjeama cuana huasijke mo huoojea caje. Ejo soa neineije cuana; cuia caje'yo mo cuaa huaca jee ejeapashajjajaa; acui ecueata'apeejo me cacaaje majje mo ba'ehuanasohuajea caje cuaa emano'yojji. Jamatii mo beca cahuime po majje Eyacuiñajjiya shequi mee caje'yo —Jesosaa huohui canaje.

*Semeneoja ehuanase Jesosa nijje miminaje oja
bacua ejjajo
(Macoso 10.35-45)*

20 Majoya Jacobo, Huani pea'ai enaese nijje Jesso que poeyanaje. Ecui'oshajjajo nequiñanaje onijje emimijji.

21 —She, ¿ajeo ami poeyanaje? —Jesosa poanaje.

—Jesosa, ecuea ebacua ejja cuana mi pejjejo canequi'yahua quijje miya ojjaña huoojea'yojji poaje. Oe shani mijijke, pea ebianei mijijke canequi'yahua minijke, ona huoojea'yojji. ¡Jamaya oe acue! —poanaje enaese.

22 —Chojja. Miquianajaya ba jjima —Jesosaa oya cuana acanaje—. Eya quea nee nee po mee caje'yo cuaa. ¿A'a miquianaya e jayojja quea nee nee poajo quea ca'a poaje? Eya quecuia caje'yo pea'ai cuaa. Enijke jjapeequianijo miquiana quecuia caje'yo pea'ai pojja'a cuaa. ¿A'a jamatii miquianaya quea ca'a poaje?

—E'e —saja'a canaje Jacobohua, Huaniya pea'ai—. Quea ca'a poaje mi jayojja onaa quea nee nee po mee ca'yajje. ¡Jamaya capoahua, jamatii caquecuia cahua cuaa mo!

23 —E'e —poanaje Jesosa—, jamajjeya e'e jojo nei miquiana e jayojja quea nee nee po mee caje'yo cuaa; e jayojja quea ca'a nee nee poaje, onaa mano mee ca'yajje. Jamatii, e pejjejo eyajo eyaya miya enequi mee'yojji pojjeama enijke ona huoojea'yojji. Chojja, ecue Chiiya eyajo aniya yahuajo nei pea cuana babaca ca'yonaje. Ohuaye nei nequi mee caje'yo e pejjejo quijje, eya ojjaña huoojea'yojji poajo —Jesosa poanaje.

24 Jesosa pejjejo nequi sa pea'ai poanijo onijje ona huoojea'yojji epojji, Jacobo, Huani nijje pea'ai quea quene poanaje pea shajja'ajjajji cuana, ome mijijke pea'ai. **25** Jamajoya aje oe Jesosaa oya cuana

iyaa canaje. Jama huohuime acanaje ba'a: —¡A'a onijje quea quene pojji! Miquea eba dejja cuana, Eyacuiñajjija epeejji pojjeama. Onajaya emeshi mese cuaa, ona huoojeajji cuanaa pea'aiya pea cuana huoojea neinei cani; quea quene nee nee poani, quea mase. ²⁶ Jamaya pojjeama miquianaya poaje, ecuea epeejji cuana. ¡E jayojjaya po sa poanijo pea cuana ba'e meesahuacue! ²⁷ Joya ona huoojea'yojji po sa poani ca ca echa-cojji sosema' jayojja capoahua. ²⁸ E'e, ¡e jayojja jama pocue! Eya ca ca iña ojjañaja Edoe Mese poeyanaje ojjaña cuana ba'e meesahuua; ojjañaja eya eba'e meesahuajji pojjeama. Ojjañaja mimishi sosequia'yojji mo manoje'yo, ojjaña cuaqui yasijke epoqui'yo poani jjejojoya —Jesosa poanaje.

*Cojjama' cuana quea cojja ja'a po mee ca'yonaje
Jesosaa*

(Macoso 10.46-52; Noca 18.35-43)

²⁹ Jenosanena huasijje poquije Jesosa dobiquinanajje Jenico huasijje. Majoya dobinana majje poquinajje Jenosanena huasijje. Quea huiso nee nee cuana onijje poquinajje. ³⁰ Becanejjiji pea'ai cojjama' ejiojji sahuajo e'anioque ani. Jesosa shajja'ajja canaje poeje. Taaa neineinajje cuana: —Jesosa, miya emeshi mese Dabija osecua. ¡Ejo jjashahuabaquicue quea yeno! —taaanajje.

³¹ —¡A'a oe taaa majajji! ¡Esohui oe ca'acue! — acanaje cuaa.

Jamatii taaa neineinajje cojjama' cuana: — Jesosa, Dabija osecua, ¡ejo jjashahuabaquicue!

32 Jamajjeya o shajja'ajja majje Jesosa nequiñaquinaje. Cojama' cuana iyaa canaje: — E'e, ¡poecue! ¿A'ya so'o? —poanaje.

33 —Emeshi Mese, ¡miyaya iña jjacojjapojaqui mee'yocue! —poanaje.

34 Jamajjeya Jesosa cojjama' cuanajo jjashahuabaquinaje. Cojja napa canaje. Cojja napa cajje ecojja jjabapojaqui'yonaje. Quea bihui nee nee po'yonaje jjacojjaja'aqui mee ca'yajje. Jamajjeya Jesosa nijje poquinaje.

21

*Jenosanenajo Jesosa nequiñaquinaje
(Macoso 11.1-11; Noca 19.28-40; Huani 12.12-19)*

1 Majoya Jesosa Mepajejo nequiñaquinanana je Jenosanena pejjejo, acui tii'ajja yiyejo, Onimo bajjani eyiyo pejjejo pea'ai. Nequiñaquinana majje o shajja'ajjajji becanejjiji pea'ai huoojea canaje Jesosaa. **2** Jama poanaje ba'a: —¡Poquicue Mepaje yasijke! ¡Dobiqui majje mapichi sisi, ebacua sho'i ai nijje ejeyo nequia nequi bañaquicue! ¡Ba majje, picho majje yecue e que! **3** Onaa: “¿Apiojji acuae ya ecua mapichi sisi pichojeaña so'o?” acajje, “Ecuea Emeshi Mese sa poani” saja'ame acue. Jamajjeya: “Ee, ocue dojo'ajja joya mapichi” acaje dejja a Mepajejo ba'eya —Jesosa poanaje.

4 E'e, jamaya acanaje Jesosaa, Eyacuiñajjija esohui huohuijji yahuajo nei nei ojo tehue ca poa jama ba'a:

5 “Ojjaña Jenosanenajo ba'e huohuicue jama ba'a: —¡Bacue oe! Mi huoojea'yojji nei poeyani; oya quea bei nee. Jamajjeya mapichi

sisija daasa biajje poeyani, mapichi sisija
ebacuaja daasa biajje".

Jamaya yahuajo nei nei Jesosajo tehue ca poa
Eyacuiñajji esohui huohuijjiya.

⁶ Jamajjeya Jesosaa huoojea cajje o shajja'ajjajji
poquinaje. ⁷ Mapichi sisi bacuajji dojo canaje.
Daqui ao cuana mapichi sisija bacuaja daasa'
biajje iya canaje. Jesosa anisohuaquinaje
mapichija bacua sho'i aija daasa' biajje. ⁸ Ojjaña
cuana ejjachichaqui nequi canaje, quea huiso
nee nei. Ojaya daqui ao cuana ejiojjijo jeapiihui
canaje Jesosa ja'ajjequijji. Pea cuaa acui iña
jajasejja canaje. Huana yiyoysi canaje ejiojjijo.
Jama yahuajo nei Jodio cuaa emeshi mese
cuana ja'ajjequi caninaje cuiñajji yasijje, jama
ja'ajjequimeya acaninaje ohua ba cahuajje.
⁹ Ojjaña ehui dojodzi poquije, Jesosa quishishijji
poquije pea'ai taaaaca poquinaje quea bihui nee
nee: —È'e Jesosa, emeshi mese Dabi yahuajo
ba'e miquea etiiquiana. Mi poeyajo ecuana quea
bihui nee nee. Quea pame nee nee miya, Jesosa.
¡Eyacuiñajji eyajo aniya miya cajaahuana cahua!
¡Eyacuiñajji cabihuia cahua, ojjaña!

¹⁰ Jamajjeya Jesosa Jenosanena huasijke
dobiqianijo, ojjaña cuana jomajo ba'e cuajicua-
jijebenaje jjachichaquiya, ojjaña. Huohui'ajja
canaje: —¿A'ya shai poeje? —poanaje.

¹¹ —Jesosa poeje, Eyacuiñajji esohui huohuijji
nei, ma Nasanenajo ba'enaje —saja'ame acanaje
cuaa.

Aquiana quiajji poani Eyacuiñajji equijo nequi

*cuana huoojeacuayajea canaje Jesosaa
 (Macoso 11.15-19; Noca 19.45-48; Huani 2.13-22)*

12 Quije pishana Jesosa ojjaña cuana nijje Eyacuiñajjija equi yasijje poqui o'oyanaje. Dobiquinaje. Aquiana quiajjí poani Eyacuiñajjija equijo nequi cuana huoojeacuayajea canaje Jesosaa, aquiana jjeshe poequi pea'ai. Aquiana cuana jjahuojojeajeaqui canaje; bejjo, pea bejjo sosejje quia cani cuanaja bejjo nequijji cuana jeapajjajea canaje; huia' quiajjí pea'aija huia' nequijji cuana jeabichajea canaje: **13** —¡A'a jja oe Eyacuiñajjija equijo aquiana quiajji! —tecueame acanaje Jesosaa—. Eyacuiñajjija esohui jama poani ba'a: “Ecuea equi ojjaña cuana enijje emimijji”. Miquianaaya ca ca siipojji nequijji jayojja amee aña Eyacuiñajjija equi.

14 Majo tii aniya cojjama' cuana, jeo'ajja cuana pea'ai Jesosa que poeyanaje. Ojjaña cuana Jesosaa quea pame nee po mee ca'yonaje. **15** Jesosaja jjaajaqui mee'yo cuana quea pame nee ba canaje; esho'iquiana majo tii ani sohuicuayanaje shajja'ajja canaje pea'ai. Jamatii Jodio etii cuana aje oe Jesosa nijje quea quene poanaje. Jesosa Eyacuiñajjija Bacua Ejja pojjeama poso tecuea canaje Moisesija etehue'yo huohuijji poaniya, Eyacuiñajjiji nijje emimijji etii cuaa. Jama poanaje ba'a: **16** —¿Apiojji acuae jiquio esho'iquiana sohuicuaya meeña mi bihuiajji? ¿A'a shajja'ajja jjima?

—E'e, shajja'ajjaña —Jesosa poanaje—. ¿A'a miquea ba jjima Eyacuiñajjija esohui etehue'yo ejo? Jama poani ba'a:

“Joya esho'i ai'ai, esho'i jjonajjona ai pea'ai quea
pame nee esohui cuaya mee'yojji mi bi-
huia'yojji”.

Jamaya Eyacuiñajjija esohui yahuajo nei ejo etehue'yo poani —Jesosa poanaje.

17 Mimi majje Jesosa poquinaje. Jea
cana'yonaje. Jenosanenajo ani poquinaje Betania
huasijje cahuiya.

*Acui etona jjajja jayojja, iquena bajjani sajjai
mee ca'yonaje Jesosaa*

(*Macoso 11.12-14, 20-26*)

18 Mecajjeahua Jenosanena huasijje poe
o'oyanaje; quea shoe poanaje Jesosa. **19** Ba canaje
ejiojji sahuajo nequi acui etona jjajja jayojja.
Acuijjajja ba'ajjaqui canaje. Chama' poanaje
ejjajja. Eña oo pana nequi'yo. Jamajjeya oya
Jesosaa huohui canaje: —¡Jamajjeya jjajjama' tii
capo'yahua acui! —Jesosaa jama acajje jjeya nei
sajjainana'yonaje acui.

20 Quijje pishana acui esajjai'yo ba majje o sha-
jja'ajjajji cuana jjajjasoquinaje: —¡De! ¡Jjeya nei ca-
ca sajjai'yonaje! —poanaje.

21-22 —E'e —Jesosa poanaje—. ¡Miya Eyacuiñajjijo
quea ja'a nee jjashahuabaquicue! A'a
jjashahuabaquijji jama ba'a: “E'e pojja'a
Eyacuiñajjija eya shajja'ajja'yo jjima”. Cho,
jama jjashahuabaquicue ba'a: “Eyacuiñajjija
e'e jojo nei nei eya saja'a caje'yo”. Jamaya
miya jjashahuabaquiajo, Eyacuiñajjiya miquea
esohui saja'a caje. E'e, Eyacuiñajjiya e jayojja jama
ameesahua caje'yo pea'ai, ma dejjaajjima acani.

¿Aya acuae Jesosa huoojea canaje esohui huohuiya?

(Macoso 11.27-33; Noca 20.1-8)

23 Majoya Jesosa Eyacuiñajjija equi yasijje do biqui o'oyanaje. Esohui huohui canijo, Jodio etii cuana, Eyacuiñajji nijje emimijji etii cuana pea'ai o que poeyanaje. Jesosa ojaya ba jjimajo huohui'ajja canaje: —*¿Aya acuae mi huoojea canaje?* *¿Apiojji acuaeaya esohui huohuiaña so'o?* *¿Apiojji acuaeaya aquiana quiajji poani huoojeacuaya-jeanaje oma mecajje?* —acanaje Jodio etii cuaa.

24-25 Jesosaa oya cuana saja'a canaje: —E'e, eyaya miya ebionei huohui'ajjaje. *¿Aya Huani huoojea canaje ona besa meeya?* *¿A'a Eyacuiñajjiya?* *¿A'a dejja cuaa pojja'a?* ¡Huohuicue mo! Eyaya majoya huohuije e huoojea'yojji epo.

26 Shajja'ajja majje Jodio cuana ojee mimimiminaje: —*¿Yajja saja'ame shai eseya aje so'o, de?* Quea mete ojjaña dejja cuanajo. Ojjaña ba cani Huani Eyacuiñajjiya huoojea canaje esohui huohuiya. Jamajjeya: “Dejjaa Huani huoojea canaje” eseya aije se jajahuejjajea ca chana' meiya. “Eyacuiñajjiya Huani huoojea canaje” eseya aije aje se oe jama acaje ba'a: “Jamajje, *¿apiojji miyaya Huani shajja'ajja jjima aña?*” Jesosaa acaje.

27 Jamajjeya jjashahuabaqui majje Jesosa huohui canaje Jodio cuaa: —Cua'a, de. Ecuanaja ba jjima —anisho canaje.

—Jamajjeya ecuea miya ehuohuijji pojjeama e huoojea'yojji epo —Jesosaa acanaje Jodio esohui huohuijji cuana, etii cuana pea'ai.

Esohui ejjashahuabaqui meeiji beca ebacua ej-jajo

²⁸ Jesosaa oya Jodio cuana huohui canaje pea'ai jama ba'a: —Shajja'ajjacue oe ecue sohui ej-jashahuabaqui meeiji jama ba'a: Oe dejaja becanejjiji pea'ai ebacua ejja yarinaje, shacuima'nequi cuana. Ejeajjiya oja bacua ejja etii huohui canaje: "Cha, ¡che oe jjeya que chacoquicue!"

²⁹ "Cho, cajaa. Mijo chaco sa po'yo ajja ca iñia" poanaje. Jamatii, jjashahuabaqui majje "Cachacoquiahuá" poanaje. Poquinaje que yasijje.

³⁰ —Ejeajjiya oja pea ebacua ejja, echahua mese huohui canaje pea'ai: "Cha, ¡che oe que chacoquicue jjeya!" poanaje. "E'e ecue Chii, jaaya chacoquije aje ca eya" poanaje. Jamatii poqui jjima poanaje, de.

³¹ —Jamajjeya ¿ache esho'i oja chiija ehuohui jama poanaje? ¿Achajja acuae miñia jjashahuabaquianí?

—E'o'i mese —acanaje cuaa.

—E'e —Jesosa poanaje—. Eyaya miya e'e nei huohuiña jama ba'a: Jiquio ecua e'o'i mese jjashahuabaqui majje oja chiiya huohui canaje jayojja jama acanaje jama jayojja dejja mimishi cuana, epona pea cojjojji poani pea'ai. Eyacuiñajji nijje jjapeecuajiquianí oja ejaahuanajji. Miquiana ca mi ca oe, cho. Eyacuiñajji nijje jjapeequi jjima. ³² E'e, Huani, ma ona besameejji poa yahuajo nei poeya poa miquiana ba meesahuaa. Huohui ca poa jama ba'a: "¡Miquea mimishijo quea yeno pocue! ¡Mimishi cuana pajea'yocue Eyacuiñajji esohui jama eba'ejji, onijje ejjapeequijji!" Huani poa. Miquianaya aje oe Huani

shajja'ajja sa po ajja poanaje. Dejja mimishi cuana, epona quea mimishi cuanaya ca ca shajja'ajja majje: “E'e, ¡Eyacuiñajji nijje ejjapeequi, mimishi cuana ejjapajequi'yo!” poanaje. Ma ba majje jamatii miquianaya jjashahuabaqui jjima, Eyacuiñajji esohui jama a sa po ajja tii poanaje —Jesosaa acanaje Jodio etii cuana.

Pea esohui ejjashahuabaqui meeiji jjonojjajja yiyejo

(*Macoso 12.1-12; Noca 20.9-19*)

³³ —¡Jiquio shajja'ajjacue pea esohui ejjashahuabaqui meeiji! —Jesosa poanaje—. Oe dejja emeshi meseya que quea quemo nee neejo bana canaje jjonojjajja oo pana, uva. Que peeyi canaje meija peeyi. Majoya que yiyesamajo equishipashajji iya canaje, mei cueehue iñaca canaje jjonojjajja na quishipashajeajji. Majoya mei iyasohua ao'ao majje peehuana canaje que jaahuanajji quea huesha nee ojaya ebajji. Pea echacojji cuana iyaa canaje. Huohui canaje emeshi meseya: “¡Ecuea que jaahuanacue! Jaahuanacue sosejje quiaje'yo oya jjonojjajja quea huiso nee” poanaje. Majoya emeshi mese quea huesha poquinaje. ³⁴ Quijje jjonojjajja jahuajo emeshi meseya pea o chacosahuajji poani beca huoojea canaje que jaahuanajji que, jjonojjajja jjequiya. Que jaahuanajji bañaqui majje huohui canaje jama ba'a: “¡Che mo jjonojjajja joya ecuea emeshi meseya pa cadojo'yahua, de!” poanaje.

³⁵ —Que jaahuanajji cuana quea mimishi poanaje. Jjonojjajja quia sa po ajja, joya emeshi meseja iya tepe mee. Jamajjeya o chacosahuajji

cuana iña canaje, cuiajea canaje, pea quecua canaje, pea jajahuejjajea canaje meiya. ³⁶ Emeshi meseya pea huoojea ca o'oyanaje huacuaya o chacosahuajji poani quea huiso pishana. Jamatii yahuajo jama acanaje que jaahuanajji cuaa. Cuiajea ca o'oyanaje pea'ai. ³⁷ Quijje yejje nei oja bacua ejja oe nei huoojea canaje que jaahuanajji baa: “E'e, ohuaya ecuea ebacua ejja shajja'ajja caje” poanaje emeshi mese. ³⁸ Cho, oja bacua ejja poeje ba majje jama poanaje ba'a: “Joya emeshi meseja bacua ejja poeje. Jiquio meshi quijje ojaya poaje, ejeajji mano'yajo. ¡Cua'a, ejjaquecuajeaqui oya eque mesena'yojji! Jamajjeya meshi esejaya tii poaje'yo, de” poanaje que jaahuanajji quea mimishi cuana.

³⁹ —Jamajjeya aje oe ebacua ejja iña canaje, quecuajea canaje, jeaqui canaje quea huesha nee, que jaahuanajji cuaa. Mahuiso esohui.

⁴⁰ —Jamajjeya emeshi meseya poe o'oya majje ¿yajja acuae acaje'yo jiquio que jaahuanajji quea mimishi cuana? —Jesosaa huohui'ajja canaje Jodio cuana.

⁴¹ —Oya quea quene nee nee poaje'yo. Ma que jaahuanajji quea mimishi cuana quecua-jea caje'yo, de. Que cuiña meequi caje'yo pea cuana, joya ojjaña jjonojjajja shejo jjasosequiaqui-jji cuana —acanaje Jodio cuaa.

⁴² —E'e —Jesosa poanaje—. ¿A'a miquea eba Eyacuiñajjiya esohui etehue'yo yahuajo nei? jama ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee nequi mee ca poa.

Jamajoya ojjaña ojaya epreejji cuanaa Ey-acuiñajji bihuia cani".

Jamaya yahuajo nei tehue ca poa ejo; eya ma eyamajjana equi iyajji jayojja jama quea ca'a nee nequi —Jesosaa acanaje.

⁴³ —E'e, jiquio esohui eba meesahuajji jayojja jama Eyacuiñajjiya acaje'yo —Jesosa poanaje—. Ohuaya yahuajo nei miquianaya babaca ca'ya poa ojo echaco'yoji, onijke eba'e tiitii'yoji. Jjeya ca ca Eyacuiñajjiya miquianaya, Jodio cuana, caja acaje'yo shajjama' jojoya. Pea cuana babaca caje'yo ojo echacojji, onijke eba'e tiitii'yoji pea'ai, joya e'e jojo nei ojo jjashahuabaquiani.

⁴⁴ —Jiquio ecua eyamajjana caja aca poa cuaa jjeya quea ca'a nee nequi jama eya miquianaaya cajaaya anaje; jjeya ca ca iña quea ca'a nee eya nequi'yo. Ojjaña joya e ba jjima e caja amajje quea yeno poaje, de. E caja tiitii amajje ca ca quea nee nee po tiitiije'yo —Jesosa poanaje.

⁴⁵ Jesosaja esohui shajja'ajja majje Moisesija etehue'yo huohuijji cuana, Eyacuiñajji nijje emimijji etii cuana pea'ai quea quene nee poanaje: — ¡De! Ecuanajo oya mimiani, equi yamajjanajo pojjeama. Eseya que jaahuanajji quea mimishi jayojja pea'ai ohuaya acani —poanaje Jodio cuana.

⁴⁶ Jamajjeya Jesosa iña sa acanaje ejeanobiajeajji. Jamatii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajjiya esohui huohuijji nei nei ba cani. Onajaya quea nahue nee nee Jesosa e'iñajji.

*Ebacua ejjaja ejjahuanaquijijo ojjaña ijja
mee'ajja ca poa ejeajjija
(Noca 14.15-24)*

¹ Jamajjeya Jesosaa o poe o'oyajjijo pea esohui ejjashahuabaquijji huohui canaje Jodio cuana huasijje jama ba'a: ² —Eyacuiñajjiya ojjaña cuana huoojea'yojji poajo jamaya poaje: Oe emeshi meseya oja bacua ejjaja ejjahuanaquijijo bobi quea huiso dahua mee canaje ojaya epereejiya e'ijjiajji nisho. ³ Ojjaña apoa poajo, o chacosahua-jji huoojea canaje epereeji cuana iyaaa, bobi ijjiajji. Cho, poe sa po ajja poanaje. ⁴ Jamajjeya emeshi meseya pea chacosahua-jji cuana huoojea canaje. “¡Jamaya acue!” poanaje: “Epereeji, ¡poecuajicue oe! Ojjaña apoa. Ana'ai quea sei quecua meenaje. Bobi cuana apoa, ojjaña. ¡Poecue ecue ebacua ejjaja ejjahuanaquijijo quea bihui nee epoji! acue” emeshi mese poanaje.

⁵ —Jamatii jjashajja'ajjaqui ajja poanaje cuana. Poe ajja. Beca cuana que yasijje poquinaje; pea aquiana quiaa poquinaje; ⁶ pea cuaa emeshi meseja echacosahua-jji iñaa majje cuia canaje, quecua ca'yonaje. ⁷ Ma shajja'ajja majje emeshi mese quea quene poanaje. Sohuinano cuana huoojea canaje dejja shajjama' iñaa. Quecua-jeyo ca'yonaje; equi cuana dahuajea canaje, sohuinano cuaa. ⁸ Majoya emeshi meseya o chacosahua-jji iyaa canaje pea cuana: “Ojjaña apoa e'ijjiajji ejjahuanaquijijo. Pea cuana epereeji nisho poanaje, jamajjeya epoeiji pojjeama. Cajaa. ⁹ ¡Poquicue! Quea huesha ba'e cuana iyaaquicue: —¡Poecue emeshi meseja bacua ejjaja ejjahuanaquijji yasijje! ¡Bobi quea huiso ijjiahuacue! —acue”

emeshi mese poanaje.

10 —Jamajjeya poquinaje. Ojjaña cuana iyaa canaje; dejja quea pame, dejja quea mimishi cuanaya. Quea huiso poeyanaje. Dobiquinaje. Equi cuio canaje. Chama' pea e'anijji poanaje.

11 Majoya emeshi meseya ojjaña cuana baa poeyanaje, ojjaña cuana nijje mimiya. Ba canaje oe dejja daqui jehuejji. **12** “Epeejji, ¿apiojji acuae miya poeyanaje daqui quea jehuejji? ¡Jamaya pojjeama ecue bacua ejjaja ejjahuanaquijji yasijke epoejji!” poanaje. Saja'a jjima ma dejjaja.

13 Jamajjeya emeshi mese quea tecue poanaje. Iyaa canaje o chacosahuajji: “¡Oya jeyo majje jeaquicue quea misi nee yasijke! Jomajo pa neineije'yo, ese' iijiayaijea caje'yo quea nee neejo” poanaje. Mahuiso ecuea esohui —Jesosa poanaje.

14 —E'e, ojjaña cuana iyaa'ajja caje Eyacuiñajjiya. Jamatii oe pojji dobiquije'yo onijke eba'e tiitii'yojji —Jesosaa ojjaña cuana acanaje. (E'e, Eyacuiñajjiya Jodio cuana iyaa coo canaje onijke eba'e'yojji quea bihui nee. Jamatii shajjama' poanaje. Ojaya huoojea'yo quecuajea canaje. Jamajjeya Eyacuiñajjiya Jodio pojjeama iyaa canaje. Quea huiso poeyanaje. Ma dejja daqui jehue jayojja jama beca cuanaja mimishi cuijea'yo jjima. Jamajoya jeacuayajea caje'yo quea nee nee epo'yojji.)

Bejjo oe pojji quia cajji ba'e sosejje emeshi mesejaya jayji

(Macoso 12.13-17; Noca 20.20-26)

15 Jesosa mimije shajja'ajja majje Paniseo cuana quea quene poanaje: —Oya Jesosa

jjashahuabaquiani eseya epeejji nisho jayojja jama, de –poanaje.

Poqui majje ojee mimimiminaje: —Cua'a, Jesosa ejjadasiaquiqui; esohui quea camaja nee ejjahuohui'ajjaquiqui, ojaya yajja saja'ame ya'yojji. Jamajjeya Moisesija etehue'yo jayojja jama mi saja'a cajo, cacuajea meequei'yahua.

¹⁶ Jamajjeya Paniseo cuaa o shajja'ajjajji cuana, joya Enodeja esohui quea boti nee poani pea'ai huoojea canaje Jesosa que. Huohui'ajja mee canaje jama ba'a: —Esohui huohuijji, miyaya e'e jojo nei huohuiaña Eyacuiñajji ejjashahuabaqui'yojji jama. Miya etii cuanajo jjashahuabaqui ajja; emeshi mese cuanajo pea'ai mete'ama. Jamajjeya quea ja'a nee huohuiaña. ¹⁷ E'e. Jamajjeya mo oe che huohuicue: ¿A'a beijo quia cajji Shomano meshi mese Sesa bajjanija yajji? ¿A'a equiajji pojjeama esejaya pojja'a? ¿A'a cuae jja ma Sesaja meshijo ba'e sosejje quia cajji so'o? —acanaje cuaa.

¹⁸ Ma Jodio cuanaja ejjashahuabaquijji Jesosaja eba poanaje. Jamajjeya: —¡Miquianaya ca mi ca oe e dasiajji nisho cuana, epeejji nisho quea tai nee nee! ¿Apiojji nequiaa eya dasia sa aña? ¹⁹ ¡Beijo mo huohui'ajjacue esodojjo! —poanaje.

²⁰ Jjequi canaje cuaa. Esodojjo ba majje huohui'ajja canaje Jesosaa: —¿Ae ecajja'yo jiquio? ¿Ae bajjani tehueme'ya?

²¹ —Emeshi mese ecajja'yo, Sesa bajjani — acanaje Jodio cuaa.

—E'e —poanaje Jesosa—. Jamajjeya ¡Sesaja beijo quiaquicue ohua sa cajo! ¡Eyacuiñajji a'a pa-jea'yojji; oya bihuiacue, shajja'ajjacue pea'ai!

22 Jesosa shajja'ajja majje ojjaña cuana quea mete nee poanaje: —¡Quea jjashahuabaqui ja'a nee nee oya Jesosa! ¡Jjadasia meequi ajja!

Jamajjeya poquinaje, jeana ca'yonaje Paniseo cuaa.

*¿A'a e'e jojo nei mano'yo majje shequije o'oya quijje? —huohui'ajja canaje cuaa Jesosa
(Macoso 12.18-27; Noca 20.27-40)*

23 Ma pojajjo tii beca Sanoseo cuana poeyanaje Jesosa huohui'ajja. Sanoseo cuana aje oe jama poani ba'a: —Mano'yo majje jama tii tii; eshequi o'oyajji pojjeama quijje.

Jesosaja ca ca jama sohuihuohuime ajjima. Jamajjeya Jesosa huohui'ajja canaje Sanoseo cuaa; edasaijji nisho jama acanaje ba'a: **24** —Esohui huohuijji, Moisesiya jama tehue ca poa yahuajo nei nei ba'a: “Dejja ejjahuanaqui, bacuama' mano'yajo, oja chahuaa ehuanase equijjojea ani cahuana ca'yahua, oja o'ija bacua jea jayojja jama epoji”. **25** ¿A'a e'e? Jamajjeya jama poso ba'a: Quea huiso edoe mese, me oeije pea beca nequia poa. E'o'i mese ebionei jjahuanaquia poa eponajo. Mano'yonaje bacuama' tii. Oja chahuaa epona equijjojea ani huana ca o'oyanaje, bacuama' tii ani. **26** Oya jayojja mano'yonaje bacuama' tii. Jamajjeya peaa echahua meseya huana ca o'oyanaje. Mano'yonaje bacuama' pea'ai. Jamaya ojjaña manojeyo'yonaje. **27** Quije ehuanase pea'ai mano'yonaje. **28** Jamajjeya shequi o'oya majje eyajo, ¿ajea ehuanase epona poaje, ache edoe meseja? Ojjaña echahua cuana huea'ajja'yo epo — Sanoseo cuaa acanaje.

29 Jesosaa saja'a canaje jama ba'a: —Chojja. Jamaya pojjeama. Miquea ba jjima Eyacuiñajjiya esohui; oya quea ca'a nee miquea ba jjima pea'ai.
30 E'e, shequi o'oya majje ejjahuanaqui'yojji pojjeama. Esohuidojiji eyajo ani jama poaje.
31 Cuanaya ¿a'a miquea ba jjima dejja cuana ojjaña mano'yo majje shequije o'oya? Jamajjeya Eyacuiñajjiya yahuajo nei esohui tehue mee ca poa miquiana jjabahuejjaquijji. Jamaya poa ba'a:
32 "Eya ca ca iña Amajama jaahuanajji, Isaaca, Jacobo pea'ai jaahuanajji". ¿A'a Eyacuiñajjiya emano'yo cuana meshijo e'ohuajea jaa jaahuana cani? Cho. Ojaya epeejji cuana eshe nequi, mano'yo majje shequi'yo pea'ai jaahuana cani Eyacuiñajjiya —Jesosaa acanaje.

33 Jesosaja esohuijo ojjaña cuana quea bihui nee poanaje: —¡Quea pame nee ohuaya Jesosaa huohui cani! —poanaje cuana.

¡Eyacuiñajji quea jea nee acue, mi pejejo nequi cuana pea'ai!

(Macoso 12.28-34)

34 Majoya Paniseo cuaa shajja'ajja canaje Jesosa quea jjashahuabaqui ja'a nee; Sanoseo cuana jjadasia meequi ajja. Jamajjeya jjachichaqui majje ojee jjashahuabaqui o'oyanaje Jesosa dasiaquijji, esohui quea camaja nee ehuohui'ajjaquijji.
35 Majoya Jesosa que poe o'oyanaje Paniseo cuana. Dasia'yohua nisho Moisesija etehue'yo huohuijjijiya huohui'ajja canaje jama ba'a: **36** —Esohui huohuijji, yahuajo Moisesiya tehue ca poa Eyacuiñajjiya esohui. ¿Ache esohui quea pame nee nee e'ajji?

³⁷ Jesosaa acanaje: —E'e, jamaya quea pame nee acue ba'a:

“¡Eyacuiñajji miquea Emeshi Mese nei quea jea nee nee acue! Miquea huapa pojjeama cuana miquea quea jea; ¡quea jea nee neeya oe acue Eyacuiñajji! Jamajjeya ¡jojo jjashahuaba tiitiiquicue!”

³⁸⁻³⁹ Jiquio ehuohui'yo quea pame nee. Pea oya jayojja quea pame nee jama ba'a:

“¡Ojjaña pea cuana quea jea nee acue, miquea huapa pojjeama jama quea jea neeya oe acue!”

⁴⁰ Jamaya miya poajo miya Moisesija etehue'yo jama ba'e; Eyacuiñajjija esohui huohuijji yahuajo nei ba'eja esohui jama ba'e pea'ai —Jesosa poanaje.

*Eyacuiñajjija huoojea'yo dejja jaahuanajji Quito
(Macoso 12.35-37; Noca 20.41-44)*

⁴¹ Jamajjeya ojjaña Paniseo cuana jjachichaquiajo oya cuana huohui'ajja canaje Jesosaa: ⁴² —¿Yajja huohuime acuae nequiaa aña Eyacuiñajjija huoojea'yo dejja jaahuanajjijo Quitojo? ¿Ache etiquianaja osecua oya?

—Quito emeshi mese Dabija osecua, ma yahuajo ba'ya poaja —acanaje Paniseo cuaa.

⁴³ —Jamajjeya ¿yajjajje acuae Eyacuiñajjija Edojjoshahua Pameya emeshi mese Dabi jama amee ca poa yahuajo ba'a: “Eyacuiñajjija huoojea'yo ojjaña jaahuanajji Quito ecuea Emeshi Mese nei”? Yahuajo nei Dabiya jama huohui ca poa pea'ai ba'a:

⁴⁴ “Eyacuiñajjija ecuea Emeshi Mese Quito jama aca poa: —¡Enijje anioquecue ebianei mijijke

ojjaña cuana huoojea'yojji! Eyaya mi quecuajji nisho epo jeabichajea jeyojeyoje'yo". Jamaya huohui ca poa yahuajo Dabiya ejo. ⁴⁵ E'e, Dabiya Eyacuiñajjija huoojea'yo Quito aca poa "Ecuea Emeshi Mese". Jamajjeya Quito Dabija Emeshi Mese nei poani. Jamatii oya Dabija osecua pea'ai, de —Jesosaa acanaje—. Eya, Eyacuiñajjija huoojea'yo, dejjaja jea pojjeama; Eyacuiñajjija Bacua Ejja. Jamajjeya eya ojjaña Emeshi Mese nei.

⁴⁶ Jesosa mimije shajja'ajja majje Paniseo cuana quea mete poanaje. Jeca poanaje, mimima'yo aninaje; huohui'ajja beca'yo jjima tii acanaje.

23

*—¡A'a Jodio esohui huohuijji jama ba'ejji! —
Jesosa poanaje*

(Macoso 12.38-40; Noca 11.37-54, 20.45-47)

¹ Majoya Jesosaa ojjaña cuana, o shajja'ajjajji cuana pea'ai huohui canaje jama ba'a: ² — Moisesija etehue'yo huohuijji, Paniseo cuana pea'ai miquea esohui huohuijji. ³ Jamajjeya ¡oya cuana shajja'ajjacue! ¡Ojaya esohui jayojja jama acue ojjaña! Jamatii oya cuana aje oe esohui jama ba'e ajja; quea mimishi. Jamajjeya ¡a'a o jayojja ba'ejji! —poanaje—. ⁴ E'e, jamaya poani ba'a: Dejjaa aquiana quea biquie abo mee cani pea dejja. Jamatii huanasohua sahua ajja, de, quea mimishiya jjejojo. O jayojja Jodio esohui huohuijjiya pea cuana ba'e meesahua ajja Eyacuiñajjija etehue'yo jama —Jesosa poanaje.

⁵ —Quea pame poso oya jjabaquiani onaja ebi-huiajji: "E'e de, oya esohui huohuijji quea pame

nee” epo meeiji acani. Jamajjeya esohui etehue'yo quea quemo jjasapahuahuo iyaquiani, aa huahuo pea'ai ojjañaja ebajji. Daqui quea pame nee nee, quea ao nee huosho cani ojjañaja ebajji pea'ai. ⁶ Ojee ijija'ijjianijo, emeshi mese pejjejo anioqueani ebionei ijija sa poanijo. Jodioja equi ojee ejjachichaquijji jo pea'ai ebionei anioque sa poani Eyacuiñajji esohui huohuijji pejjejo, ojjaña nijje emimimimijji. “E'e, oya cuana Eyacuiñajji esohui huohuijji nei quea pame nee” epo meeiji acani. ⁷ Ejiojjije poquiani ojjañaa aquiana quia cani yasijke anicuua, pea cuaa jama bihuia cani ba'a: “Esohui huohuijji, miya quea pame nee nee.” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee poso jjabaquiani —Jesosa poanaje.

⁸ Jamajjeya o shajja'ajjajji cuana Jesosaa acanaje pea'ai jama ba'a: —¡A'a miquianaya o jayojja jama pojji! Pea cuana a'a jjabihuia meequiviji: “¡Miya esohui huohuijji quea pame nee nee!” a'a jjapo meequiviji cuana. Cho. Miquea Esohui Huohuijji quea pame nee oe nei yani, miquea Emeshi Mese nei. Miquianaya ecuea epeejji cuana ca ca Eyacuiñajji ba cani pea epeejji jayojjaya. ⁹ Oe nei eyajo ani eseja Chii. Jamajjeya jesohui huohuijji oya jayojja “Esejaya Chii” a'a ajji! ¹⁰ Cuanaya Eyacuiñajji huoojea'yo ojjaña jaahuanajji, Quito miquiana huoojea'yojji nei nei. Jamajjeya pea cuana “ese huoojea'yojji nei” a'a jjapo meequiviji. ¹¹ E'e, ¡emeshi mese jayojja jama nequi sa poani ca ca pea cuana chacosahuacue! ¹² Jamajjeya joya emeshi mese poso jjabaquiani Eyacuiñajji emeshi mese

pojjeama acaje'yo. Echacosahuajji jjabaquiani ca ca Eyacuiñajjiya emeshi mese jayojja po mee caje'yo —jamaya acanaje Jesosaa o shajja'ajjajji cuana.

Jesosaa Jodio etii cuana tecuea canaje

¹³ Majoya Jesosaa Paniseo cuana, Moisesija etehue'yo huohuijji poani pea'ai jama tecueame acanaje ba'a: —Miquianaaya aje oe Moisesija etehue'yo huohuaña, Jodioja esohui huohuijji poaniya pea'ai. Jamatii miya ca mi ca oe esohui huohuijji nisho, siajjepoiji. E'e, miquianaya Eyacuiñajji nijje jjapeequi ajja. Pea cuana Eyacuiñajji nijje jjapeequi sa poani miyaya jjapeequipajea meeyaña, de. E'e, jiquio ecua esecue ca'a cani cuaa ona edobiqui poani jjejojo jama jayojja miquiaaya pea cuana dobiqui mee ajja eyahuasijke Eyacuiñajji nijje eba'e tiitii'yojji. Jamajoya miquianaya quea nee nee po mee caje'yo quijje, quea nee nee tii tii, de —Jesosa poanaje.

¹⁴ —E'e, miquianaya ca ca oe e'ahuemanoja equi cuana jjesheaña sosema'. Majoya Eyacuiñajji nijje mimi nishoani quea huiso nee. Jamajoya Eyacuiñajjiya miquianaya cajaa acaje'yo. Quea nee nee po mee caje'yo tii tii —Jesosa poanaje.

¹⁵ —Jodioja esohui huohuijji cuana, Moisesija etehue'yo huohuijji cuana pea'ai, miquianaya aje oe esohui huohuijji nisho, peajja. Miquianaaya chaco neineiaña; quea huesha poquiani pea'ai pea cuana Moisesija etehue'yo shajja'ajja meeya. Jamatii mi shajja'ajjajji cuana mi jayojja quea mimishi nee nee. Jamajoya oya cuana e'e jojo nei quea nee nee po mee caje'yo, mi jayojjaya —Jesosa poanaje.

16 —E'e, miquianajaya ehuohui quea quehuajo cojjama' jama poani. Cojjama' cuana pea cojama' cuaa me iña majje mepejjejea cani jayojja. Ojjaña poquiquehuaje'yo —Jesosa poanaje—. Miquea ehuohui jama ba'a: “Eyacuiñajjija equi nequianijo, ecuea ehuohui jama eyaya e'e jojo nei aje”. Pea cuana jama poani ba'a: “Chojja, jamaya mimi majje miquea ehuohui jama e'ajji pojjeama”. Jamaya huohui cani cuaa pea'ai ba'a: “Ma mei huo'o Eyacuiñajjija equijo anijo, ecuea ehuohui'yo jayojja jama eyaya aje”. “E'e, ijamaya mimi majje miquea ehuohui jayojja jama e'e jojo nei acue!” pea cuana poani. Jamaya mimi quehuani miquianaya —Jesosa poanaje.

17 Oya cuana tecuea canaje jama pea'ai ba'a: —Chojja, de. Miquianaya jjashahuaba quehuaquiani. Mei huo'o Eyacuiñajjija equijo quea pame ani; Eyacuiñajjija equi quea pame nee pea'ai. **18** Miquianajaya pea ehuohui quea quehua pea'ai jama ba'a: “Mei ehuana huicha'a huicha'a pea mei biajje yani Eyacuiñajjija equijo aquiana dahuajji, Eyacuiñajji bihuajji. Ma mei e'iya cuana nequianijo, eyaya ecuea ehuohui jayojja jama e'e jojo nei aje” amajje, dejja ojaya ehuohui jama e'ajji pojjeama, miquianaya poani. Jiquio jama poani ba'a: Aquiana mei e'iya biajje huana cani cuaa. Majoya jama mimiani ba'a: “Ma aquiana mei e'iya biajje yanijo, ecuea ehuohui jayojja jama eyaya aje”. “E'e, ijamaya mimi majje ca ca miquea ehuohui jayojja jama e'e jojo nei acue!” ¡Miquianaya jamaya mimi quehua'ani cuana! **19** ¡Ma ehuohui'yo cajaa! —Jesosa poanaje—. Mei e'iya quea pame nee; aquiana mei e'iya biajje ani

quea pame pea'ai. Pea jayojjaya. ²⁰ Jamajjeya dejja mei e'iyajo mimianijo oya ojjaña aquiana mei e'iya biajjejo mimiani pea'ai. Pea jayojjaya poani. ¡Jamaya a'a mimijji ma aquiana cuanajo! —Jesosa poanaje. ²¹ —Miquianaya Eyacuiñajjija equi yasijje mimiani cuana jama ba'a: “Eyaya ecuea ehuohui'yo jayojja jama e'e jojo nei aje Eyacuiñajjija equi yanijo”. Jamaya aje oe miya mimiani Eyacuiñajjijo, ma equijo ba'yanijo pea'ai. Jamajjeya ¡Eyacuiñajjija equi yasijje a'a jama mimijji! ²² Pea cuana mimianijo eyahuasijje jama poani ba'a: “Eyajo Eyacuiñajjija eba'eiji yanijo eyaya ecuea ehuohui'yo jayojja jama e'e jojo nei aje. Ecuea esohui e'e nei pojjeama jojjemo eya quea nee capoahua”. Jamaya amajje miya Eyacuiñajjija eba'eiji mimiani; “Eyacuiñajji eyajo aniya eya ba canijo, eyaya ecuea ehuohui'yo jayojja jama e'e jojo nei aje”. “Ecuea ehuohui'yo jayojja jama ajjima jojjemo eya quea nee po mee ca'yome” beshahua nei aña; oya jayojjaya. Jamajjeya ¡a'a jamaya mimijji Eyacuiñajjijo; quea tai! —Jesosa poanaje.

²³ Majoya Jesosaa Moisesija etehue'yo huohui-jji cuana, Paniseo cuana pea'ai jama tecueame acanaje ba'a: —Miquea aquiana bobí quea johua e'ajji equi pejjejo pohuani. Tiiyajo quiaña iye huiso Eyacuiñajjija epojji, ojaya ehuohui'yo jayojja jama poani:

“Miquianajaya aquiana ipiacue; ome miji pea'ai,
 10 oya jayojjaya, oe Eyacuiñajjija epojji, pea
 me oejee ebeca pee pea'ai, 9 miquea epojji”.
 Eyacuiñajji yahuajo nei jamaya poa. Jamaya
 miya poani. Quea pame. Jamatii de, Moi-

sesija etehue'yojo quea ja'a jjashahuaba tiiti-
iqui ajja. Jamaya quea tai aña ba'a: Miya
e'e jojo nei jjashahuabaqui jjima, siajje poani,
jjashahuabaqui ajja aema' cuana ba'e meesahua-
jji. Eyacuiñajjija esohui jayojja jama po tiitii ajja.
Jamajjeya ¡Eyacuiñajjija etehue'yo jama ba'ecue!
¡Majoya Eyacuiñajji yasijje iye huiso quiacue ojjaña
miquea aquiana pea'ai! —Jesosa poanaje.

24 —Miquianaya cojjama' jama; jjashahuabaqui
ajja pea'ai. ¿A'a huashapa bobijo anidobiquiajo
jeajea'aña, jamatii aquiana quea quemo anido-
biquiajo ijjiageaña? Jamaya miya poani; ojjaña
miquea aquiana quea biso pea'ai ipia'ajja ma-
jje iye huiso quiaña Eyacuiñajjija epojji. Jamatii
pea cuana ba'e meesahua ajja, de. Jamajoya Ey-
acuiñajjiya miquianaya cajaa acaje'yo; quea nee
nee po mee caje'yo —Jesosa poanaje.

25 —E'e Paniseo cuana, miquianaya Moisesija
etehue'yo huohuijji pea'ai. Jamatii miquianaya
ca ca oe esohui huohuijji nisho de, quea tai.
¿A'a caneco cueehue topo cani cuaa ena ishi
jjimahuajo, jamatii eyiyedojjojje quea ihui shacula
jjima? Jamaya miya. Jjabiquiani quea pame jayoj-
ja. Jamatii quea jjashahuabaqui tai nee; sii poani;
epona, onaja aquiana jea baña pea'ai. **26** Paniseo
cuana, miquianaya aje oe quea jjashahuabaqui
quehua. Jamajjeya Eyacuiñajjiya miquianaya ca-
jaa acaje'yo; quea nee nee po mee caje'yo, de.
¿A'a caneco yiyyedojjojje ebionei topo cani cuaa?
Jamajjeya e'e jojo nei quea pame nee. ¡Caneco
topo cani jayojja jama acue miquiaaya; ebionei
jjashahuabaqui tai pajea'yocue e'e jojo nei quea
pame epojji! —Jesosa poanaje.

27 —Paniseo cuana, Moisesija etehue'yo huohuijji pea'ai, miquianaya esohui huohuijji nisho de, quea mimishi. Emano mojea'yojji cuia'asha cani cuaa quea pame jayojja. Jamatii eyiyedojjojje quea ihui, eman'o'yo saajaaji. **28** Emano'yo mojea'yojji jayojja jama miquianaya cuana; quea pame jayojja ojjañaa ba cani; jamatii quea jjashahuabaqui tai. Shajjama', quea pame po nishoani pea'ai. Jamajoya Eyacuiñajjiya miquianaya cajaa acaje'yo; quea nee nee po mee caje'yo —Jesosa poanaje.

29 —Moisesija etehue'yo huohuijji, Paniseo cuana pea'ai, miquianaya aje oe esohui huohuijji nisho, quea mase. Jamajjeya Eyacuiñajjiya miquianaya quea nee nee po mee caje'yo. E'e, miquianaya emano saajaaji mo'yaña, quea pame a'yaña ma Eyacuiñajjiya esohui huohuijji yahuajo mojea jaa. Esajaajji cuia'asha'aña quea pame nee Eyacuiñajjiya epeeiji nei yahuajo emano'yo bihuia'yojji —Jesosa poanaje—. **30** Siajje miya poani jama ba'a: “Yahuajo ecuanaja etiiquiana cuana nijje eba'e'yo jojjemo ecuanaja ca ca oe Eyacuiñajjiya esohui huohuijji cuana ecuiajea'yojji pojjeama poqueaye. Chama' ecuanaja ejjashahuabaquijji etiiquiana jama; ecuanaja ca ca pea” miquianaya poani —Jesosa poanaje—. **31** Chojja. Jamaya miquianaya po nishoani. Jamatii miquianajaya etiiquiana jama Eyacuiñajjiya esohui huohuijji quecuajji nei nei pea'ai. **32** Jamajjeya o jayojja jama poani quiana; Eyacuiñajjiya huoojea'yo cuana cuiajea jeyojoye'yo, de —Jesosa poanaje—. **33** Miquianaya peyo quea se nee nee jama de, quea

mase nee nee, esohui huohuijji quecuajji, miquea etiiquiana cuana jama. Jamajjeya ¿a'a acuae nequiana Eyacuiñajjijo jjanequiquehuaquijji? Chojja. E'e jojo nei ohuaya miya huohui caje'yo: “¡Poquicue nequiana! ¡Cuaqui yasijke dobiquicue! ¡Quea mase nee nee aje oe nequiana!” —Jesosa poanaje.

³⁴ —Jamajjeya eyaya miquiana huasijke huoojeña Eyacuiñajjija esohui huohuijji, esohui bameesahuajji, dejja quea jjashahuabaqui ja'a nee pea'ai. Jamatii beca cuana cuiajeaje'yo; pea cuana acui ecueata'apeejo me cacajeaje'yo; pea cuana cuiasejjajeaje'yo miquea equi ojee ejjachichaquijji yasijke; pea cuana ocuenaje'yo ojjaña cuiñajji yasijke equecua'yoji, miquianaaya —Jesosa poanaje—. ³⁵ E'e Jodio cuana, miquea etiiquiana cuaa dejja mimishi'ama quecuajea ca'yonaje quea huiso. Eyacuiñajjija etehue'yo ebionei tehue ca poa jama ba'a: Abeni cuiahuejjajea ca poa miquea etiiquiana Cainiya. Oya jayojja quea huiso cuiajea ca poa cuaa. Quijje nei Eyacuiñajjija etehue'yo quijje yejje nei tehue ca poa oja sohui huohuijji Sacania, Benequiaja bacua ejja cuiahuejjajea ca poa cuaa Eyacuiñajjija equijo, aquiana dahuajeajji pejjejo —Jesosa poanaje—. ³⁶ Jamajjeya eyaya miya e'e jojo nei huohuiaña: Jjeya nei apoa poaje; Eyacuiñajjiya miquiana cuana quea nee nee po mee caje'yo ojjaña miquea etiiquianaja mimishi cuanajo, o jayojja jama miquianaya poani jojoya.

Jamaya Jesosaa Jodio cuana tecuea canaje quea mimishi nee jojoya.

*Jesosa quea yeno poanaje ojjaña Jenosanenajo ba'e cuanajo
(Noca 13.34-35)*

³⁷ Majoya Jesosa quea yeno nee nee ojjaña cuana Jenosanenajo ba'e cuanajo jama poanaje ba'a: —Jodio cuana Jenosanenajo ba'e, miquiana cuana ecuea quea jea nee nee. Jamajjeya eya miquianajo quea yeno poani. E'e, miquianaaya aje oe Eyacuiñajjija esohui huohuijji quecuajea'ya poa; ojaya huoojea'yo jajahuejjaja'ya poa meiya pea'ai. ¡Bacue oe! Cachina enaeseya ebacua huojje cani ejaaahuanaajji jama jayojja eyaya miquiana iyaa sa neineiaña e que, ejaaahuanaajji. Jamatii enijje jjapeequi sa po ajja. Cajaa aña jama ba'a: “Chojja, Eyacuiñajjija miya huoojea jjima ojjaña jaahuanajji”. ³⁸ Jamajjeya ¡bacue! —Jesosa poanaje—, Eyacuiñajjija miquianaya cajaa acaje'yo. Jeajea caje'yo ejaaahuana majajji pojjeama. ³⁹ E'e, eya jiquiojo tii nequi tii ajja. Jamajjeya eya miquianajaya ba o'oya jjima poaje e poe o'oya jjimahuajo. Quijje e poe o'oyajo ca nequiana ca oe jama poaje ba'a: “Jesosa miya Eyacuiñajjija huoojea'yo ojjaña jaahuanajji. ¡Eyacuiñajjija miya cajaahuana cahua quea pame!” poaje miquianaya quijje —Jesosa poanaje Jenosanenajo ba'e cuana nijje.

24

*—Eyacuiñajjija equi cajjajeajea caje'yo cuaa mei cuana —Jesosa poanaje
(Macoso 13.1-2; Noca 21.5-6)*

¹ Jesosa Eyacuiñajjija equijo ani poquinaje. Poquijeya o shajja'ajjajji cuaa oya huohui canaje: — ¡Bacue Eyacuiñajjija equi! Quea quemo, quea pame mei cuana.

² —E'e. ¿A'a jiquio equi quea pame nee baña? E'e jojo nei quijje mei cuana cajjajeajea caje'yo cuaa. Chama'yo tii acaje'yo —Jesosa poanaje.

*Dejja cuana quea mase nee poaje quijje
(Macoso 13.3-13; Noca 21.7-19)*

³ Quijje Jesosa eyiyo huasijke Onimo acui yiye yasijke jaasohuaquinaje o shajja'ajjajji cuana nijje. Anioquenaje. Pea dejja poqui jjima. Jamajjeya o shajja'ajjajji cuaa huohui'ajja canaje: —Jesosa, ¿ache shono acuae mei cuana cajjajeajea caje'yo cuaa so'o? ¿Ae acuae poaje mi epoe o'oya cuahujje? ¿A'ya ba majje ecuanaja eba poaje miya poeje o'oya, meshi chama'yo tii epojjijo?

⁴ Jesosaa saja'a canaje: —ijjashahuaba neineiquicue onajaya miya edasiajji pojjeama!

⁵ Quea huiso siajjepoiji poeje, ecuea ehuoojea'yo pojjeama: “Eyacuiñajjija eya huoojea canaje, eya ca ca iña ojjaña jaahuanajji” siajje poaje. Quea huiso dasia caje'yo. ⁶ “Ojjaña jjaquecuaquiani ojjaña meshi yasijke” huohui caje peaaya pea'ai. Jamatii ¡a'a quea mete pojji! Jamaya poaje. Jamatii apoa pojjeama, oe po ajja jjima poaje so'o —Jesosa poanaje—. ⁷ E'e, jjaquecuaqui caje'yo cuana ojjaña meshi yasijke, ojjaña cuiñajji yasijke pea'ai. Quea huiso emanomeeijiya mano mee caje'yo; bobi yasijke po majje manoje'yo quea huiso; meshi huehuahuehuaje ojjaña meshi yasijke pea'ai —Jesosa poanaje—. ⁸ E'e, jiquio

ecua epona bacua cuayaje ebionei jjapashineijje nee'ani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

⁹ —Majoya pea cuaa miquianaya iña majje jeanobiajea caje'yo ecuiasejjajeajji, equecua'yojji pea'ai. Enijje jjapeequianijo miquianaya boti'ama nei poaje ojjaña meshijo ba'e cuanaja. ¹⁰ Jamajoya quea huiso enijje jjapeepajeaqui'yo majje mimishi aje o'oya. Peaja epreejji boti'ama poaje'yo —Jesosa poanaje—. Jamajoya dejja mase iña mee caje'yo equecua'yojji. ¹¹ Quea huiso pea cuana poeje: “Eya Eyacuiñajji esohui huohuijji” siajje poaje. Cho, Eyacuiñajji pojjeama. Jamatii, ecuea epreejji dasia caje'yo quea huiso. Poquiquehua mee caje'yo eshahua nijke. ¹² Dejja cuana shajjama' jayojja po majje emeshi mese cuana shajja'ajja sa po ajja poaje'yo. Jamajjeya pea cuana boti'ama poaje'yo. ¹³ Jamatii e poe o'oya jjimahuajo, enijje jjapeequi pajea'yo ajja tii ca ca Eyacuiñajji nijke ba'e tiitijje'yo, enijje pea'ai —Jesosa poanaje.

¹⁴ —Eya poeje o'oya. Eyacuiñajji nijke ojjaña cuanaja Emeshi Mese nei poaje'yo. Ma ehuohui'yo quea pame nee ojjaña meshi cuana huasijje huohui caje, ojjaña dejja cuana huasijje pea'ai ojjañaja eshajja'ajjajji. Majoya e poe o'oyajo ojjaña oe poaje —Jesosa poanaje.

*Aquiana quea tai nee ojjaña quea mete nee nee
epo meejjii*

(Macoso 13.14-23; Noca 21.20-24, 17.22-24)

15 —Eyacuiñajjiya esohui huohuijji Dañeniya yahuajo nei huohui ca poa jama ba'a:
“Quije Eyacuiñajjiya equijo nequije aquiana quea tai nee nee, ojjaña quea mete nee nee epo meejjii”.

16 Jamajjeya ma ba majje ca ca, ma pojajo tii ojjaña Jodio meshijo ba'e capoquicuajiahua eyiyo cuana huasijje. (Jiquio ehuohui'yojo cajjashahuabaquiahua quea ja'a epojji.) **17** ¡Joya equi huisa biajje chacochacoani a'a equi yasijje dobiquinanajji aquiana cuana biohua edojoji! **18** ¡Joya quejo chacochacoqui pea'ai a'a equi yasijje poquinanajji daqui moojo! Eyiyo huasijje poquicuaji aija aje oe mano'yo chana!. **19** Epona cuana o'ejji, bacua sho'iji pea'ai quea yeno poaje; quea camaja equehua poquicuajiji poaje. **20** Jamajjeya Eyacuiñajji nijje mimicue jama ba'a: “Eyacuiñajji, ¡eenojo pojjeama capoahua, epojja ejomishocajjijo pojjeama pea'ai ecuanaja epoquijji eyiyo cuana huasijje!” acue —Jesosa poanaje—. **21** E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma pojja cuanajo ca ca quea nee nee poaje dejja cuana —Jesosa poanaje.

22 —Eyacuiñajjiya oe pojji cahuime quea camaja po mee caje'yo; oe pojji cahuime epo'yo jojemo ojjaña cuana mano'yome. Ojaya epeejji jaahuana canijo, ojaya quea nahue nee emano jeyojeyo'yojji, Eyacuiñajjiya oe pojji cahuijo quea camaja po mee caje'yo, quea cahui huiso pojjeama —Jesosa poanaje.

23 —Ma pojja cuanajo a'a jjashajja'ajjaquijji ona siajje poajo jama ba'a: “¡Bacue oe, Eyacuiñajjija huoojea'yo Quito jiiquiacua poe'yonaje!” jama poso, ja'a shajja'ajjajji! “¡Bacue oe, Quito jocuama pa poe'yonaje!” Jama onaa acajje ja'a jjashajja'ajjaquijji, a'a poquijji! **24** E'e, Eyacuiñajjija huoojea'yo ojjaña jaahuanajji e jayojja nisho, Eyacuiñajjija esohui huohuellijji nisho pea'ai poeje quea huiso nee nee. Ohuaya ma pea dejjaajjima acani acaje'yo Eyacuiñajjija epeeiji cuana dasia'yojji nisho. Dasia caje'yo quea huiso nee; ecuea epeeiji nei pea'ai beshahua nei eya pajea mee caje'yo o jayojja epoji; chojja, jjadasia mee-qui ajja. **25** E shajja'ajjajji cuana, eyaya miya huohuinaje quijje oya poeje ejjadasiaqui'yojji. ¡A'a oya cuana shajja'ajjajji! —Jesosa poanaje.

26 —Jamajjeya a'a jjashajja'ajjaquijji onaa miya siajje acajje jama ba'a: “¡Baqicue oe, Quito jocuama huenihueni aijo nequi!” Jama acajje ja'a baquijji! “¡Bacue oe, Quito equi equecuaijji dojjojo ejja'aniquehuaqui ani!” acajje ja'a jjashajja'ajjaquijji; a'a o que dobiquijji! **27-28** Cho, shajja'ajjacue ecue sohui: ¿A'a joya e'ihuijaa huasijje be'o cuana cuabesajebeje? E'e jojo nei miquianaaaya eya baje joya ecua be'o e'ihui yasijje oqueani jama. Cuanaya pojjeije nei nei poajo jeaja'a cani eyajo; ojjañaa ba caje quea huesha nee. Jamaya eya ojjañaja Edoe Mese poeje o'oya, pojjeije jama. Jeaja'ajeajebeje. Eya ojjañaa ba caje'yo. Quehuajje pojjeama eya poeje'yo —Jesosa poanaje.

*Jesosa ojjañaja Edoe Mese poeje o'oya
(Macoso 13.24-37; Noca 21.25-28)*

²⁹ —E'e, quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. Majameta cuana jjacajjaqui'yo majje jijijioqueje'yo ojjaña pea'ai. Majameta nequijji cuana huehuahuehuaje'yo janobajjima nei pea'ai.

³⁰ —Majoya miquianaaya baje aquiana eyajo. Ma ba majje huohuije jama ba'a: “¡E'e jojo nei Jesosa Quito ojjañaja Edoe Mese jjeyahua nei poeje o'oya, de!” poaje.

—Jamajjeya ojjaña cuana ojjaña meshijo ba'e quea mete nee nee poaje'yo. Ecuea epeejji pojjeama siasiaje jama ba'a: “Coya aje oe ¿ae shai poeje ba'a? ¡Bacue, ojjañaja Edoe Mese Jesosa Quito poeje o'oya bo biajje! Oya oe nei quea ca'a nee nee, quea sohui poja nee nee. Quea jeajahua nee nee pea'ai. Esohuidojojji quea ca'a nee onijje poeje quea huiso nee nee” poaje cuana —Jesosa poanaje—. ³¹ Esohuidojojji quea ca'aa aquiana eshe'ana ai jayojja mia cajo, eyaya esohuidojji cuana huoojeaje'yo biacua, macua huasijke pea'ai ojjaña ecuea epeejji cuana jjequiya —Jesosa poanaje.

*Esohui acuijo, iquenajo, huohui canaje Jesosaa
(Macoso 13.18; Noca 21.29-33)*

³² Jesosaa huohui canaje pea esohui jama ba'a: —E'e, eyaya miquianaya esohui ejjashahuabaqui meejji huohuije iquena acuijo. Esejaya meshijo acui iña'yani ba majje eseaya jama poani ba'a: “E'e nei, nayaja po'yonaje. Jjeya eshequiaja po

pajea'yonaje". ³³—Jamaya eshequi, ba'i quea misi, majameta eyajo jijijijoque'ani ba majje pea'ai quea bihui jjashahuabaquicue jama ba'a: "E'e, jjeya nei apoa poaje. ijjeyahua nei esejaya Emeshi Mese nei Jesosa Quito poeje o'oya!"

³⁴—E'e jojo nei ojjaña ma pojja cuanajo ba'e cuana mano jeyojeyo'yo jjimahuajo ojjaña apoa poaje'yo; eya ojjañaja Emeshi Mese oe nequije'yo.

³⁵ E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yojji pojjeama; shajja'ajja titii caje'yo cuaa —Jesosa poanaje—. ³⁶ ¿Ache shono shai jamaya poaje, ojjaña apoa poaje'yo? Dejja cuanaja ba jjima; esohuidojiji cuanaja ba jjima pea'ai; ecuea ehuohuijji pojjeama. Ecue Chiija eba ojaye nei. Ohuaye nei huohui caje'yo ojjaña apoa epo'yojji —Jesosa poanaje.

*iJesosa poe o'oyajjijo jja'ishoa'ajjaqui anicue!
(Noca 17.26-30, 34-36)*

³⁷—Yahuajo nei nei dejja Noe bajjani nequia poa. Noe enequiahuajo ojjaña cuana quea mimishi poa. Quijje eya ojjañaja Edoe Mese poe o'oyajo, ojjaña cuana quea mimishi poaje o'oya, yahuajo nei nei jayojjaya poaje o'oya. ³⁸ Yahuajo ojjaña meshi ohua jjimahuajo jamatii dejja cuana ijji'a'ijjia ania poa. Ishi'ishi nequia poa pea'ai. Jjahuanaqui nequia poa. Jamaya poanaje Noe bishe ai yasijje dobiQUI jjimahuajo. ³⁹ Ona ojjaña jjashahuabaqui jjima anijo ena quea quembo poa. Jjayehuequia poa; johui oquea poa; hui'i ca'ya poa. Jamaya poaje o'oya eya ojjañaja Edoe Mese epoe o'oya cuahuajo: jjashahuabaquije cuana

jama ba'a: "Jamatii ecuana quea pame nequi". Ojjañaja ba jjima meshi ojjaña tii chama'yo tii poaje'yo. ⁴⁰ E'e, e poe o'oyajo beca dejja nequije quejo. Oe dojosohuaqui caje'yo; pea jea canaje'yo. ⁴¹ Beca epona quecuapasha pashaqui, oe dojosohuaqui caje'yo; pea jea canaje'yo, Eyacuiñajjiya —Jesosa poanaje—. ⁴² ¡Jamajjeya jjashahuabaqui tiitii anicue! Ache pojjajo Emeshi Meseja epoe o'oyajji miquea ebajji pojjeama. ⁴³ Jiquio jama poaje ba'a: Equi mese siipojji ache shono poeje poso jjabaquiani. Ojaya eba jojjemo ohuaya ishoa ca'anime, equi jaahuanajjiya. ⁴⁴ Eya miquianajaya Edoe Mese ache pojjajo miquiana que poeje o'oya ebajo ese. Jamajjeya ijja'ishoa'ajjaqui anicue! —Jesosa poanaje.

*Pea echacomeejji quea pame nee poanaje
(Noca 12.41-48)*

⁴⁵ —Ecuea esohui shajja'ajjacue echacomeejji cuanajo jama ba'a: Equi ai meseya poqui jjimahuua echacomeejji iyaa canaje. Huoojea canaje: "¡Ecuea equi cuiñacue, miyaya! ¡Ecuea pea echacojji cuana oe bobiacue pea'ai! Quijje eya poeje o'oya".

⁴⁶ —Equi mese poe'yo majje ojjaña quea pame nee ba caña'ya poa; quea bihui nee poña'ya poa. Jamajjeya echacomeejji quea bihui nee poanaje.

⁴⁷ Jamajjoya equi meseya echacomeejji quea pame huoojea caje'yo ojjaña ojaya aquiana cuiñaa.

⁴⁸ Pea echacomeejji siipojji ca ca jjashahuuba taiquiani jama ba'a: "Equi mese poquinaje quea huesha nee. Quijje nei nei poeje'yo". ⁴⁹ Quea tecueya jjejojo ohuaya echacojji cuana cuia

cani. Pea cuana nijje ishi'ishiani, huooani. Apoa pojjeama nequi. ⁵⁰ Equi meseache pojjajo epoeje'yo poso acani. Jamajjeya equi mese quehua poeje'yo. ⁵¹ Ojaya equi cuiñajji poani ehuoo jaa baña'yo majje tecuea cañaje'yo. Jeacuayajea cañaje'yo ojjaña quea mimishi poani nijje. Jomajo quea nee nee poaje'yo tii tii; ese' ijjiayaijea caje'yo quea neejo —Jesosa poanaje—. Jiquio ecua equi meseya ojaya equi cuiñajji shajjama' tecueajea majje jeacuayajea caña'yonaje jayojja jamaya eyaya aje'yo ojjaña ejo ishoa'ajja, poe o'oya majje —Jesosa poanaje.

25

Epona sho'i cuana poquinaje pea epona sho'i jjahueaquequi baa

¹ —¡Pea esohui shajja'ajjacue Eyacuiñajji ojjañaja Emeshi Mese oe nei poajejo! Jiquio jayojja jama poaje ba'a: Epona sho'i ahuema'ani ome miji pea'ai huisome, 10 poa. Ma jjahueaquequi baa cuaquijiji dojo canaje. ² Me oeje epona jjashahuabaquinaje. Pea me oeje jjashahuabaqui jjima. ³ Joya jjashahuabaqui jjimaa cuaquijiji dojo canaje; jamatii esei dojo jjima ejijiji, de. ⁴ Peaa jjashahuabaqui majje cuaquijiji dojo canaje eseiji. Tahuoojo dojo canaje pea'ai ejijiji.

⁵ —Epona sho'i cuana quea cojja jee mano po majje cahuinaje. Shacuima' nequi mecashono poeyanaje. ⁶ Jamajjeya mecashono pea equi yasi-jje poe'yo majje taaaanje; “Shacuima' nequi aje poe'yonaje. ¡Cua'a, baquicue!”

⁷ —Taaaje shajja'ajja majje ojjaña epona sho'i cuana shequinaje. Ejijiji hui jeacuaya canaje.

⁸ Epona sho'i jjashahuabaqui jjima cuaa ma ej-jashahuabaqui cuana huohui'ajja canaje jama ba'a: “¡Esei mo quiacue! Esei ecuanaja oe poanaje. Cuaquijiji ecuanaja jiji'yo ajja”.

⁹ —Epona sho'i ojaya ejjashahuabaqui'yo cuaa saja'a canaje: “Miquea ese chama' eshojji. Ecuea ca ca jiquio che oe pojji. ¡Poquicue miya ma ese quia caqui yasijke; jocuama jjequicue!”

¹⁰ —Jocuama o poquiahua, shacuima' nequi poeyanaje. Ojjaña dobiqui'yonaje, joya apoa epo, o jjahueaquijiji equi yasijke. Dobiqui majje esecue ca'a canaje. ¹¹ Joya ese jjequiya poquiya cuana poe'yo majje esecue eca'a nequi ba caña'yonaje. Taaa aninaje: “¡Che esecue ca'apejocue!”

¹² —Shacuimaa eyiye doijojo nequiya saja'a canaje: “Chojja, ecuea miya ba jjima” acanaje. Jamaya poanaje —Jesosa poanaje.

¹³ —E'e —Jesosa poanaje oja epeeiji cuana nijje—, ijamajjeya jja'ishoa'ajjaqui ani tiitiicue pea'ai! Ecuea epoe o'oyajji miquea ebajji pojjeama.

Esohui ejjeshejjijo (Noca 19.11-27)

¹⁴ Jesosaa pea esohui eba meesahuajji huohui canaje: —Jjeya eyaya pea esohui huohuije, eya ojjaña Emeshi Mese poe o'oyajo —Jesosa poanaje—. Jama poaje ba'a: Oe dejja, emeshi meseya quea huesha poqui jjimahuajo iyaa canaje ojaya echacojji cuana, ojjaña ojaya aquiana jaahuana meeiji. ¹⁵ Majoya ohuaya oe echacojji quea jjashahuabaqui ja'a huasijke esodojjo me oejje, 5

huisome quea nahue nee nee quia canaje aquiana jjeshejji, quea huiso bejjo chichajji. Pea echacojji quea jjashahuabaqui ja'a pishana huasijje beca esodojjo quea nahue nee nee quia canaje aquiana jjeshejji, quea huiso bejjo chichajji. Pea echacojji beshahua nei jjashahuabaqui ajja huasijje oe esodojjo quea nahue nee nee quia canaje bejjo chichajji nisho. Esodojjo quia majje emeshi mese poquinaje.

¹⁶ —Echacojji quea jjashahuabaqui ja'aa ojaya esodojjo me oejje huisome quea nahue quia canaje aquiana jjeshejji. Majoya chicha canaje ome pea'ai huisome. ¹⁷ Oya jayojjaya pea echacojjiya ojaya beca esodojjo quea nahue quia canaje aquiana jjeshejji. Majoya ohuaya chicha canaje ebeca pee pea'ai huisome esodojjo. ¹⁸ Pea echacojji aje oe jjashahuabaqui ajja poanaje. Ojaya emeshi meseja esodojjo oe nei quehuajje nei ohua canaje.

¹⁹ —Quijje nei emeshi mese poe o'oyanaje ojaya echacojji cuana huasijje. Jjashahuabaquinaje jama ba'a: “¿Ae shai poani so'o echacojji cuana ecuea esodojjojo?” Jamajjeya echacojji cuana iyaa majje huohui'ajja canaje: “¿Ache huiro esodojjo yani so'o jjeya?”

²⁰ —Echacojji esodojjo me oejje huisome jaahuanajji ojaya emeshi mese nijje jama poanaje ba'a: “Yahuajo nei miyaya me oejje esodojjo quia'yonaje eya. Ma'aje miquea. Pea me oejje huisomeya miquea poanaje. Ma'aje pea me oejje ecue chicha” poanaje echacojji.

²¹ —Ojaya emeshi mese onijje quea bihui nee poanaje jama ba'a: “E'e de, miya echacojji quea

pame nee. Yahuajo eyaya miya quianaje me oeje esodojjo. Miyaya maya quea pame nee chichanaje. Jamajjeya jjeya eyaya miya ecuea aquiana quea huiso jaahuana meeje'yo. Cua'a, jenijje anicue quea bihui nee!" emeshi mese poanaje quea bei nee.

²² —Majoya pea echacojji poeyanaje, ma beca esodojjo yahuajo quia canaje. Ma echacojji jama poanaje ba'a: "Emeshi mese, yahuajo nei miquea esodojjo becanejjiji pea'ai quia'yonaje eya. Ma'aje miquea beca esodojjo. Pea esodojjo becanejjiji pea'ai ecue chicha yenaje. Ma'aje ecue chicha esodojjo pea'ai" echacojji poanaje.

²³ —Emeshi mese onijje quea bei miminaje jama ba'a: "E'e, de, miya echacojji quea pame nee. Yahuajo eyaya miya quianaje esodojjo becanejjiji pea'ai. Miyaya pea chichanaje quea pame nee. Jamajjeya jjeya eyaya miya ecuea aquiana quea huiso jaahuana meeje'yo. Cua'a, jenijje anicue quea bihui nee!" emeshi mese poanaje.

²⁴ —Majoya pea echacojji poeyanaje, ma esodojjo oe nei quia canaje. Emeshi mese huohui canaje ohuaya jama ba'a: "Emeshi mese, ecuea eba miya quenequene cuajiani. Miyaya miquea echacojji chaco meeaña sosema!. Quea dejja taija jjejojo miquea aquiana quea huiso yani" jama posoya acanaje echacojjiya. ²⁵ "Jamajjeya eya quea mete poanaje. Miquea esodojjo emoquehua aninaje onaa esii ca poani jjejojo. Ma'aje miquea bejjo, ma miyaya quianaje huisome tiiya" echacojji poanaje.

²⁶ —Ojaya emeshi meseya oya acanaje: "Miya echacojji quea mimishi, quea huea. Miya quea

MATEO 25:27

cli

MATEO 25:30

jjashahuabaqui tai poanaje jama ba'a: —Ecuea echaco sosema' poanaje. Ecuea emeshi mese quea dejja tai. Jamajjeya quea huiso ojaya aquiana yani —miya poanaje. Siajje miya poani. Miquea ejjashahuaba taiquijji jayojja jama eyaya miya aje. ²⁷ ¿Apiojji acuae miyaya ecuea ejjeshejji mi quianaje bejjo jaajji yasijje? Quijje pishana ohuaya eya quea huiso quia ca'yo queaye”.

²⁸ —Emeshi mese ma echacojji nijje quea tecue poanijo pea cuana huoojea canaje jama ba'a: “Echacojji quea hueaa jjejojo ecuea esodojo mi chicha canaje. ¡Maya esodojo oe nei jjeshe majje quia'yocue pea echacojji huea'ama huasijke, maya ecuea esodojo me oejje ecue quia poanaje yasijke quiacue! ²⁹ E'e, joya huea'ama poani aquiana cuana quia caje cuaa. Dejja aema' quea hueaja aquiana ojjaña jjeshe'yo majje dojo caje'yo cuaa. ³⁰ Jiquio echacojji cajaa ajeaje'yo; quea huea coma. Enijje oya enequijji pojjeama. Huoojeacuayajeje'yo. Oya quea yeno nee nee poaje'yo. Quea nee nee pea'ai poaje'yo” emeshi mese poanaje —jamaya Jesosaa acanaje.

E'e, jiquio Jesosaja ejjashahuabaqui'yojji jama ba'a: Poe o'oya majje Jesosaa ojaya epeejji quea jjashahuabaqui ja'a quea pame ba'e mee caje'yo onijje eyajo. Onijje ona huoojea'yojji po mee caje'yo. Pea echacojji quea huea ba majje ca ca cajaa acaje'yo. Quea nee nee poaje'yo oya cuana.

*Esohui Jesosa Quitoja ojjañaja Edoe Meseja epoe
o'oyajjijo*

³¹ Jesosaa huohui canaje pea'ai: —Eya poe o'oya majje quea ca'a poaje'yo. Ojjaña huoo-jea'yojji poaje'yo. Ojjaña esohuidojiji cuana eni-jje poeje'yo. Majoya eya ba'esohuaqui'yo ma-jje eyahuasijje, jocuama eya nequije'yo, Emeshi Mese nei. ³² Ojjaña cuana e que jjachichaqui meeje'yo. Majoya eyaya ñajjajja cuiñajji jayojja jama aje jama ba'a: Ñajjajja cuiñajjiya ñajjajja cuana, chivo cuana nequiashiña cani. ³³ Ñajjajja oo pana nequiashiña cani ebianeijje. Chivo ca ca huapa nequia acani, shanijje. ³⁴ Ñajjajja cuiñajji jayojja jama eyaya, ojjañaja Emeshi Meseya ojjaña dejja cuana nequishiñaje'yo. Ecuea epeejji quea pame nee ebianeijje nequiaeje'yo. Oya cuana aje'yo jama ba'a: "Miquianaya ecue Chiija bacua cuana e'e jojo nei poanaje, ojaya huapa pojjeama. Ja-majjeya onijje nequi tiitiije'yo. Eyacuiñajji ja-maya jjashahuabaqui'ya poa yahuajo nei nei, meshi pana jjimahuajo. ³⁵ Jamaya poaje'yo jjeya miquianajo, miya quea pame nee poana-jejo. E'e, yahuajo eya quea shoe poajo, eya bobi quianaje miyaya. Eya quea naba taja poajo, ena quianaje miyaya. Eya miquianajaya ba jjima poanaje. Jamatii miquea equi yasijje dobiqui meenaje. ³⁶ Eya daquima' poajo, miquianaaya daqui huosho meenaje. E emanojaajo, ejeanobia-jaajo pea'ai, miquianaya poeyanaje enijje jjapee-quiya" jamaya eyaya aje'yo —Jesosa poanaje.

³⁷ —Majoya dejja pame cuaa eya huohui'ajja caje jama ba'a: "¿Ache shono acuae ecuaaya miya bobianaje, miya quea shoe poanajejo? ¿Ache shono ena quianaje miya quea naba taja poana-

jejo? ³⁸ ¿A'a miya ecuanaja equi yasijje dobi meenaje? ¿A'a daqui huosho meenaje miya daquimajo? ¿Ache shono shai ecuaaya jamaya anaje? ³⁹ Mi emanojaajo, ejeanobiajaajo pea'ai, ¿a'a ecuana mi que poeyanaje? ¿Ache shono acuae jja jama ecuaaya mi anaje so'o?" Jamaya dejja pame cuaa quijje huohui'ajja caje eya eyajo.

⁴⁰ —Jamajjeya eyaya, Emeshi Mese neiya saja'aje'yo quijje eyajo jama ba'a: "Miyaya ecuea huapa pojjeama aema' yahuajo jaahuananajejo, eya jaahuananaje. Jamajjeya ecuea eba miquianaya ecuea epeeiji e'e jojo nei poanaje. Ecuea ejjashahuabaqui'yojji jayojja jama ca ca miyaya a'yonaje".

⁴¹ —Mayoja eyaya, Emeshi Mese neiya dejja tai cuana shanijje nequi tecueaje'yo jama ba'a: "¡Po-quicue miya! Cajaa'yo ca mi ca ecua. Edosiquiana etii Satanasa, eshahua cuana pea'ai cuaqui yasijje poquije'yo. Miya cuana pea'ai anije'yo cuaquijo tii. ⁴² Yahuajo eya quea shoe, bobia jjima poanaje miquea. Eya quea naba taja, ena quia jjima poanaje. ⁴³ Eya miquea eba pojjeama, miquea equi yasijje dobi mee jjima poanaje. Eya daquima', daqui huosho mee jjima poanaje miquea. E emanojaajo, ejeanobiajaajo pea'ai miya poe jjima poanaje e jaahuanaa" jamaya eyaya aje dejja mimishi cuana —Jesosa poanaje.

⁴⁴ —Majoya dejja mimishi cuaa eya huohui'ajja caje jama ba'a: "¿Ache shono acuae miya bobia jjima apoa? ¿Ena cuana quia jjima apoa? ¿A'a ecuanaya miya ecuanaja equi yasijje dobi mee jjima apoa? ¿A'a daquimajo, ecuanaya

daqui huosho mee jjima apoa? ¿A'a mi emanoojaajo, ejeanobiajaajo pea'ai, a'a miya ecuanaja jaahuana jjima apoa? ¿Ache shono shai, de?" dejja mimishi cuaa huohui'ajja caje –Jesosa poanaje– . ⁴⁵ Majoya eyaya, Emeshi Mese neiya saja'aje'yo jama ba'a: "Ecuea huapa pojjeama cuanajje jaahuana jjima. Jamajjeya miquianaaya eya cajaa a'yonaje pea'ai".

⁴⁶ –Majoya eyaya, Emeshi Mese neiya dejja quea mimishi cuana quea huesha nee huoojeaje'yo cuaqui yasijje edobiqui'yojji. Quea nee nee po tiitiji'e'yo. Dejja pame cuana ebianejje nequi ca ca ba'e tiitii meeje'yo Eyacuiñajji nijje – jamaya huohui canaje Jesosaa.

26

Jodio etii cuana jjashahuabaquinaje Jesosa que-cua'yojjiyo

(*Macoso 14.1-2; Noca 22.1-2; Huani 11.45-53*)

¹ Majoya Jesosaa o shajja'ajjajji cuana jjabahuejjaqui mee canaje. Pea esohui huohui canaje jama ba'a: ² –Quijje pishana, becanejjiji pealai cahuime po majje, Jodio cuana jjashahuabaquije o'oya etiiquianaja bacua cuana yahuajo Ejitojo mano'yo jjima poajo. Jamajjeya ojee ij{jia'ij{jiaje o'oya quea bei nee. E'e, yahuajo nei nei Ejito meshijo ani Jodioja ebacua ejja cuia'yo jjima aca poa esohuidojojjiya. Ma shejo ij{jia jjimahuajo Jodio cuaa eya iñ{a majje dejja quea mase yasijje quia caje'yo equecua'yojji. Acui ecueata'apeejo me caca majje ba'ehuanasohuajea caje'yo –Jesosa poanaje.

³ Majoya Eyacuiñajji nijje emimiji etii cuana, Jodio dejja jaahuanajji cuana pea'ai ojee jjachichaquinaje Eyacuiñajji nijje emimiji etija equi aijo, Caipa bajjanija equijo. ⁴ Caipa jjashahuaba taiquinaje pea cuana huoojeajji Jesosa iñajji, quijje equecua'yojji. ⁵ Jodio etii cuana ojee miminaje jama ba'a: —¡Jesosa quehua neijje iñacue ojjaña Jodio cuana jjachichaqui jjimahuajo, ojee ijja'ijja jjimahuajo! ¡Oya iñacue jjeyahua nei, de! Quijje pishana ojjaña ojee ijja'ijja anijo, ecuanajaya Jesosa e'iñajji pojjeama. Chojja. Ojjaña Jodio cuana quea quene nee nee ecuana nijje po chana', Jesosa onajaya quea nahue nee equecua mee'yojji. Quea shajjaquijjo po chana' pea'ai —jamaya acanaje Jodio etii cuaa.

*Jesosa Betaniajo ani sapa sha canaje
shiyeshiyeya eponaa*
(*Macoso 14.3-9; Huani 12.1-8*)

⁶ Jesosa Betaniajo aninaje dejja Simoni bajjanija equijo. Yahuajo nei Simoni quea mano nee nee batata epo'yo poa, ma dejja cuaa jjajeaqui mee'yo jjima acani. Jesosaa oya yahuajo huaquia mee ca'yonaje, jjajeaqui mee ca'yonaje. Simonija equijo Jesosa e'anioque aninaje. Ijjia'ijja aninaje bobo ijjiäßji pejjejo. ⁷ Jesosa ijjal'ijja anijo, oe epona poe'yonaje o que. Ohuaya tahuoo quea nahue neejo shiyeshiyeye ye canaje Jesosa huojja shajji. Huojja sha canaje. ⁸ Ba majje Jesosa shajja'ajjajji cuaa epona tecuea canaje: —¿Apiojji acuae miyaya shiyeshiyeya shaña so'o? ⁹ ¿Sha jjima yajjijo poso ca mi ca oe shiyeshiyeye dojo meenaje esodojjo quea huiso sosejje? E'e, aema'

cuana huasijje esodojjo equiajji poso —Jesosa shajja'ajjajji cuana poanaje.

¹⁰ Jesosaa oya cuana shajja'ajja majje huohui canaje: —¿Apiojji acuaeya epona tecueaña so'o? E'e, eya ohuaya huojja sha canaje. Jamaya quea pame nee. ¹¹ Aema' cuana minijje po tiitije'yo. ¡Oya cuana jaahuana'yocue quijje pea'ai! Eya ca ca nequi tiitii ajja minijje. ¹² Eya huojja sha cajo epona jjashahuabaquinaje jama ba'a: “Jesosa mano'yo jjimahuajo eyaya oya huojja shaña shiyeshiyeya, onaja mojea jjimahua shaña” poanaje epona —Jesosaa acanaje—. ¹³ Jamajjeya quijje ojjaña meshijo ecuea esohui huohui caje. Jiquio eponajo huohui caje pea'ai jama ba'a: “Oe eponaa Jesosa huojja sha ca poa shiyeshiyeya, quea jeajoo”. Jiquio epona pajea'yo ajja tii tii, e'e jojo nei —jamaya Jesosaa acanaje.

*Jodasaa onaya iña meesahua canaje Jesosa
(Macoso 14.10-11; Noca 22.3-6)*

¹⁴ Yaninaje quea huiso Jesosa shajja'ajjajji cuana, 12. Oe nei Jodasa Isicaniote bajjani poquinaje Eyacuiñajji nijje emimijji etii cuana huasijje. ¹⁵ Miminaje jama ba'a: —Eyaya miya Jesosa iña mee sahuaje. ¿Ache sose huiso acuae mo ya oe sosequiaje'yo so'o?

¹⁶ Onaaya saja'a canaje jama ba'a: —Quea huiso, 30 esodojjo quea nahue nee sosequiaje'yo miya.

Jamajjeya Jodasa jjashahuaba neineiqui aninaje achajja iña meeme aje so'o cuana: —Caba'ajjaquisahua —poanaje.

Jesosaa o shajja'ajjajji cuana bobi ijzia mee canaje

(*Macoso 14.12-25; Noca 22.7-23; Huani 13.21-30; 1 Conitio 11.23-25*)

¹⁷ Jodio cuana quea bihui ojee ijzia'ijjianaje yohua shejo ba'a esohuidojiji yahuajo nei etiiquianaja bacua cuana cuia'yo jjima ñajjajja na' esecuejo ecuiapepa ba majje shejo. Pahui quea ca'a eshejjee meeiji chama' ijzia ca poa. Ebionei epojja e'ijzia'ijjajji, Jesosa que poe majje o shajja'ajjajji cuaa huohui'ajja canaje jama ba'a: —Jesosa, ¿ache equijo acuae seya pahui ca'a ijziaje so'o? ¡Ecuana huoojeacue aquiana iyajea, miquiana ishoajji!

¹⁸ Jesosaa huohui canaje jama ba'a: — ¡Poquicue miya cuiñajji yasijje! ¡Jomajo ecuea epeejji baquicue! Onijje mimicue jama ba'a: “Ecuana sohui huohuijji jama poanaje ba'a: —E mano'yajo aje apoa poaje. Miquea equijo eyaya e shajja'ajjajji cuana nijjeya pahui ca'a ijziaje'yo, esohuidojijiya etiiquianaja bacua ejja cuana cuia'yo jjima poa shejo” acue —Jesosaa huohui canaje.

¹⁹ Jamajjeya o shajja'ajjajji cuana ojaya ehuoojea'yo jayojjaya jama poanaje. Bobi iyajea canaje pahui ca'a ijziajji.

²⁰ Majoya sinecua neijo Jesosa o shajja'ajjajji cuana nijje anioquenaje bobi ijziajji pejjejo ijzia'ijjiaa. ²¹ Ojee ijzia'ijjia'anijo Jesosa jama poanaje ba'a: —E'e jojo nei jiquojo ani oe dejja poquije ona jjequiya e iña'yojji. Ohuaya eya huohui caje cuana.

²² Eshajja'ajjajji cuana quea yeno nee nee poanaje. Pea mimiajo pea poanaje jama ba'a: —

Ecuea Emeshi Mese, eya ca ca o jayojja pojjeama, e'e jojo nei.

Jamaya ojjaña miminaje. ²³ Majoya Jesosa onijje miminaje jama ba'a: —Oe dejja e shajja'ajjajjiya joya enijje pahui shapeshi po'aniya eya onaya cuana iñia mee caje'yo. ²⁴ E'e, yahuajo nei Eyacuiñajjiya esohui tehuejji cuaa esohui tehue ca poa jama ba'a: “Quijje oe dejja Eyacuiñajjiya huoojea'yo ojjaña jaahuanajji onaya cuana iñia meesahua caje'yo equecua'yojji”. Jamajjeya ma dejja quijje quea yeno poaje. Jjashahuabaquije jama ba'a: “¿Apiojji shai eya ecue naeya mejo ca poa? Eya ca ca nequi sa po ajja. Ecuea ejjashahuaba taiquijjijo mano'yo sa poani” oya poaje. Quijje oya quea nee nee po tiitije'yo — Jesosa poanaje.

²⁵ Majoya Jodasa Jesosa nijje miminaje jama ba'a: —Emeshi Mese, eya ca ca o jayojja pojjeama. Eyaya miya onaya e'iñia meesahuajji pojjeama — poanaje.

Jesosa onijje miminaje: —E'e, Jodasa, miya jama quea tai poaje, e'e jojo nei —Jesosa poanaje.

²⁶ Majoya ojee ijija'ijjia'anijo tii Jesosaa pahui ca'a jjeshe canaje. Eyacuiñajji bihuia majje, pahui mijisisi majje quia canaje o shajja'ajjajji cuana. Jama huohuime acanaje Jesosaa ba'a: —¡Ijjiacue! Jiquio ecuea eyami —poanaje.

²⁷ Pahui ijija majje caneco jjeshe canaje, Jesosaa. Eyacuiñajji bihuia majje quia canaje ojjaña o shajja'ajjajji cuana. —¡Ishicue! Jiquio ecuea ena'.

²⁸ Ecuea ena' cuayaquiajo eya manoje'yo. Jamajoya eyaya Eyacuiñajjiya esohui eyacua jayojjaya aje. E'e, ojjaña ecuea epeejjija mimishi cuana

cuijeaje'yo. ²⁹ Jjeya eyaya jiquio jjonojajja na, uva na e'ishi o'oyajji pojjeama miquiana nijje; eya manoje'yo. Quijje nei poe o'oya majje eyaya jiquio ishiije o'oya miquiana nijje. E'e, eya poe o'oyajo ecue Chiya eya ojjaña huoojea'yojji po mee caje'yo. Ojjañaa eya shajja'ajja caje'yo — jamaya Jesosaa acanaje.

Jesosa miminaje Peno nijje

(*Macoso 14.26-31; Noca 22.31-34; Huani 13.36-38*)

³⁰ Majoya ojee sohuicuaya majje poquinaje eyiyo huasijje Onimo yiye yasijje.

³¹ Majoya Jesosa o shajja'ajjajji cuana nijje miminaje jama ba'a: —Jiquio mecajje ojjaña miquianaya enijke jjapeequi pajejaje'yo. E'e, yahuajo Eyacuiñajjija esohui tehuejji cuaa tehue ca poa ejo: Eya ñajjajja cuiñajji jayojja jama poaje. E mano'yajo ecuea epeejji cuana ñajjajja cuana jayojja jama poaje; jjajeeajajequinanaje'yo. Etehue'yo yahuajo nei nei jama poa ba'a:

“Quijje eyaya ñajjajja cuiñajji jaahuana neinei ajja.

Jamajjeya onaaya oya cuia caje'yo. Ñajjajja cuiñajji chamajo, ñajjajja cuana jjajeeajajequinanaje'yo”. Jamaya aca poa yahuajo nei nei —Jesosa poanaje—. ³² Jamatii, shequi o'oya majje eya poquije Janinea meshi yasijje. Jomajo aje mi poeyajo ishoañaquije —Jesosa poanaje.

³³ Penohua Jesosa jama acanaje ba'a: —E'e pojja'a pea cuana minijje jjapee tiitiiqui'yo ajja. Eya ca ca pea jayojja jama pojjeama. Eya jjapee tiitiiqui'yo minijje —Peno poanaje.

34 Jesosaa Peno jama acanaje ba'a: —Eyaya e'e jojo nei miya huohuaña Peno, jiquio mecajje tii cachina yahue pea beca peejjima taaame po jjimahuajo, pea beca peejjima huohui'ajjame amajje miya ejo poaje jama ba'a: “Chojja, ¡ecuea Jesosa ba jjima nei nei!” miyaya saja'ame aje quea meteya jjejojo —Jesosaa Peno acanaje.

35 —Chojja, Jesosa —Peno poanaje—. E'e pojja'a eya minijje jjapeequianijo, pea cuaa eya cuiajea caje'yo. Jamatii ¡ecuea ca mi ca epajea'yojji pojjeama!

Oya jayojja pea cuaa jama acanaje pea'ai ba'a: —E'e Jesosa, ¡ecuanajaya ca mi ca epajea'yojji pojjeama tii!

*Jetesemani quejo Jesosa miminaje oja Chii nijje
(Macoso 14.32-42; Noca 22.39-46)*

36 Majoya Jesosa o shajja'ajjajji cuana nijje Jetesemani que yasijje poquinaje. Jesosa jama poanaje ba'a: —¡Anioquecue jiquiojo tii! Jocuama eya poquije ecue Chii nijje mimiya.

37 Jesosaa Peno, Huani, Satiaco pea'ai dojo canaje jocuama, ma Semeneoja bacua ejja cuana bajjani Huani, Satiaco pea'ai. Jesosa jjashahuabaquinaje quea yeno nee nee.

38 Jamajjeya onijje jama poanaje ba'a: —Eya quea yeno nee nee, emano ca'yojji jayojja. ¡Anioquecue enijje; a'a cahuijji! —Jesosa poanaje.

39 Jesosa cuama pishana ani poqui majje ecui'oshajjajo nequinaje. Oja Chii nijje miminaje jama ba'a: —Ecue Chii, miquea ejjashahuabaqui'yojji jayojja jama aje'yo eyaya. Miyaya eya huoojeanaje dejjaja mimishi cuanajo

mano'yohua. Quea camaja nee nee ejo. ¿A'a miyaya che onaaya eya quecua mee'yo jjima aje so'o? ¿A'a onaaya eya iña mee'yo jjima aje'yo? Jamatii ¡miquea ejjashahuabaqui'yojji jayojja jama acue! ¡Ecuea ejjashahuabaqui'yojji jayojja jama a'a aiji! —Jesosa jamaya poanaje.

⁴⁰ Majoya oya poqui o'oyanaje o shajja'ajjajji cuana que. Ba cañaqui'yonaje cahuijaa. Tecue'ama Peno nijje miminaje jama ba'a: —¿A'a mi cahuijaa? ¿A'a che enijje cahui jjima nequi jjima so'o? ⁴¹ ¡A'a cahuijji! ¡Eyacuiñajji nijje mimi majamajacue! Jamajoya pea cuaa miya quea mimishi epo mee'yojji pojjeama. E'e, miquianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

⁴² Majoya Jesosa poqui o'oyanaje jocuama pishana oja Chii nijje mimi o'oyaa. Mimi o'oyanaje jama ba'a: —Ecue Chii, eya ojjañaja mimishijo mano'yo ajjajo, ¿a'a onajaya mimishi ecuijea'yojji pojjeama poaje'yo? Jamajjeya ¡miquea ejjashahuabaqui'yojji jayojja jama acue! —Jesosa poanaje.

⁴³ Oja Chii nijje mimi'yo majje Jesosa poqui o'oyanaje o shajja'ajjajji cuana que. Oya cuana quea cojja jee mano poanaje; cahui o'oyanaje. Jamatii Jesosaa onijje mimi jjima; shequi mee'yo jjima acanaje. ⁴⁴ Ona jeana o'oya majje jocuama pishana poqui o'oyanaje Jesosa, oja Chii nijje mimi o'oyaa. Oya jayojja mimi o'oyame poanaje. ⁴⁵ Mimi o'oya majje poe o'oyanaje o shajja'ajjajji cuana que. Onijje mimi o'oyanaje: —¿A'a mi cahuijaa tii? ¡Jomishocajaa pojja'a ca mi ca oe?

Jjeyahua nei dejja a eya onaya iña meesahua caje'yo. ⁴⁶ ¡Cua'a, jjeya nei ecuea epeejji nisho poeje'yo! Joya aje poeje ba'a.

Jesosa iña canaje
(*Macoso 14.43-50; Noca 22.47-53; Huani 18.2-11*)

⁴⁷ Jesosa mimianijo tii, Jodasa o que poeyanaje, ma eshajja'ajjajji cuana sohuihuohui poequi yasi-jje. Oya aje oe Jesosaja epeejji pea'ai poanaje; pea 11 nijje nequinaje tii. Quea huiso nee nee dejja nijje Jodasa poeyanaje; yohuajji poeyanaje acuijji, baajji, mejejjji pea'ai poeyanaje. Jodio etii cuaa, Eyacuiñajji nijje emimijji etiiya pea'ai ojjaña huoojea canaje Jesosa iñaa. ⁴⁸ Jodasaa, Jesosa e'iña meejjiyá yahuajo jama huohuime aca poa ba'a: —¡Bacue oe! Eyaya oe dejja ba majje cuiapashi nishoje. ¡Majoya oe miquianaaya iñacue!

⁴⁹ Jamajjeya Jodasa Jesosa que jjanequichip-iquinaje: —¡A'a mi ecuea Emeshi Mese nei jiquio! —amajje cuiapashi nisho canaje.

⁵⁰ Jesosaa acanaje: —Ecuea epeejji Jodasa, ¿ajeo ami poeyanaje? —Jesosa poanaje.

Pea dejja cuaa ba majje, Jesosa que poe majje iña canaje edojoji. ⁵¹ Jesosa iña cajo, oja epeejjiya onijje nequiya baa iña canaje. Onaja sapa jajapo-jojeajji nisho shajja jajasejja canaje, Eyacuiñajji nijje emimijji etija echacojjji poanija eshajja.

⁵² —Chojja. ¡A'a jja oe jajajji! —Jesosaa oya huohui canaje—. ¡Baa oe ejee yasijje nequianobia'yocue! Ojjaña jjajajaquiani manoje'yo yacua ca'yajje. ⁵³ ¿A'a miquea eba pojjeama eyaya ecue Chii ehuohui jojjemo

ohuaya esohuidojijiache huisonei nei huoojea
came jjeyahua nei, e jaahuanaa? ⁵⁴ Jamatii
eya jama po ajja. E'e, yahuajo nei Eyacuiñajija
esohui etehue'yo jama tehueme ejo aca poa
ba'a: "Onaaya iña mee majje dojo caje emano
mee'yojji". Jamaya ejo yahuajo nei tehue ca poa.
Jamaya eya acaje'yo cuaa jjeya –Jesosa poanaje.

⁵⁵ Jamajjeya Jesosaa ojjaña dejja ej-
jachichaqui'yo nequi yasijje huohui canaje: –
¿Apiojji miya poeyanaje baajji, acuijji, mejejji
pea'ai e iñaa? ¿A'a cuae jja iña siipojji so'o?
Ojjaña pojjajo eya ojjaña nijje esohui huohuijji
po nequinaje Eyacuiñajija equijo. Jamatii
eya miquianajaya iña jjima poanaje. ¿Apiojji
miquianaya mecajje poeyanaje e iñaa? ⁵⁶ Jamatii
jamaya nequiana poani. Miquianaaya ca mi
ca oe Eyacuiñajija esohui huohuijija etehue'yo
yahuajo nei nei miquianajo jayojja jama quea tai
aña.

Majoya o shajja'ajjajji cuana cuajicuaji-
nananaje; Jesosa jeajea canananaje.

Jodio etiiya Jesosa cuia mee canaje
(Macoso 14.53-65; Noca 22.54-55, 63-71; Huani
18.12-14, 19-24)

⁵⁷ Jamajjeya joya Jesosa iñajji cuaa oya dojo
canaje Eyacuiñajji nijje emimijji etiija equi yasi-
jje, Caipaja equi yasijje. Jocuama Jodio cuana
jjachichaquinaje, Jodio etii cuana, Moisesija ete-
hue'yo huohuijji poani pea'ai. ⁵⁸ Penohua ca
ca equijje aca poquinaje Jesosa onaa dojo caje.
Caipaja equi yasijje Peno nequiñauquinaje. Do-
biquinaje epeeyi nequi yasijje, sohuinana cuana
nijje anioquenaje ae onaa Jesosa acaje ebajji.

59 Eyacuiñajji nijje emimijji etii, ojjaña Jodio etii cuana, Jodio esohui huohuijji poani pea'aiya ojee mimimiminaje Jesosajo, ojjaña ejjachichaqui nequiya o quecua'yo sa acani. Jamajjeya sa'ajja canaje dejja cuana Jesosa huohuijji nisho, Shomano emeshi mese Pinato bajjani yasijke dojo majje Jesosa huohuijji nisho: —Jesosa ca ca jama acanaje ba'a —siajje yajji.

60 Quea huiso dejja Jesosa siajje acanaje. Jamatii peaa siajje'a, peaa siajje'a acanaje Jesosajo. Chama' beca oya jayojja mimime epojji Jesosa mano mee'yoyji. **61** Quije yejje nei beca dejja poeyanaje e'e jojo nei jayojja emimijji. Jama poanaje ba'a: —Eyaya oya shajja'ajjanaje. Jama poanaje Jesosa ba'a: “Eyaya Eyacuiñajjija equi jeabichajeaje'yo. Jeabichajea'yo majje pea equi iyaje'yo pea beca peejjima cahuime”.

62 Ma shajja'ajja majje Eyacuiñajji nijje emimijji etiiya nequisohua majje Jesosa huohui'ajja canaje: —¿A'a pa miya jama poanaje? ¿Jesosa, a'a acuaeya dejja cuana miyaya saja'aje'yo so'o?

Jamatii Jesosa jjamimisaja'aqui ajja poanaje.

63 Jamajjeya Eyacuiñajji nijje emimijji etiiya huohui neinei canaje: —¡Eyacuiñajji eshe nequi tiiya eseya ba canijo, ecuana huohuicue e'e nei! ¿A'a acuae miya Eyacuiñajjija Bacua Ejja nei, oja huoojea'yo ojjaña jaahuanajji? ¡Huohuicue mo oe!

64 Jamajjeya Jesosaa huohui canaje: —E'e, joya ecua miya mimiani jayojjaya eya. Cuanaya eyaya miya e'e nei huohuiaña: Quijje miyaya eya baje'yo ecue Chii nijje ebianeijje ani. Oya quea ca'a nee nee enequi tii tii. Eya miquianaaya baje pea'ai poeje o'oya; bo biajje poeje'yo —Jesosa poanaje.

⁶⁵ Shajja'ajja majje Jodio etii quea quene nee nee poanaje. Quea quene nee nee po majje ojaya daqui, oja huosho ba'e daqui isajea canaje. Jodio dejjaajamaya oja daqui isajea cani quea quene po majje. Ojjaña cuana huohui canaje jama ba'a: —De, ¡pea dejja a'a iyaajji Jesosa huohuijji! Jamatii. ¡Oya Jesosa mimiqui Eyacuiñajjija Bacua Ejja miame! ¿A'a acuae miquiaaya shajja'ajjanaje oja sohui? Jamajjeya ¿yajja acuae seya aje so'o, de, Jesosa?

⁶⁶ —¡Oya oe manojea mee'yocue; quea tai ca esohui acanaje! —jamaya acanaje Jodio dejja cuaa, Jesosa Eyacuiñajjija Bacua Ejja pojjeama posojo.

⁶⁷ Majoya aje oe Jodio dejjaajamaya cojja cui-chojea canaje. Ejjachichaqui nequiyacuia canaje pea'ai emeya. ⁶⁸ Cuia majje huohui'ajja canaje: —¡Miya Eyacuiñajjija huoojea nei jjabaqui majje jja ca oe huohui pocue! ¿Aya acuae mi cuia canaje so'o? —acanaje cuaa.

Penohua siajje acanaje Jesosa oja ba jjima nisho acanaje

(Macoso 14.66-72; Noca 22.56-62; Huani 18.15-18, 25-27)

⁶⁹ Ojjaña cuaa napa caqui Penohua ba canaje Jesosa; esecuejo sohuinano pejjejo e'anioque aniya ba ca'aninaje. Oe echacojjiya ahuema'aniya Peno ba majje huohui'ajja canaje: —¡Miya ca jja mi ca oe Jesosa nijje aninaje Janinea meshijo!

Eponaa huohui cajje ojjaña cuaa Peno bajea canaje. Jamajje Peno metenaje. Jama saja'ame acanaje ba'a: ⁷⁰ —¡Chojja, ecuea oya ba jjima! ¿Ajeo acuae mi mimiani? —Peno siajje poanaje.

71 Majoya Peno epeeyijo nequi cuayaquinaje quea mete jjejojo. Pea epona echacojjiya Peno ba canaje esecuejo nequi. Ohuaya ojjaña dejja cuana huohui canaje: —E'e jojo nei oya Jesosa nijje aninaje, ma Nasanenajo ba'e nijje —poanaje.

72 —Chojja, ecuea oya ba jjima nei nei. Eyacuiñajjiya eba eya e'e jojo nei mimiani —Penohua saja'a canaje.

73 Quije pishana beca cuana Peno que ojee nequi jjanequichipiquinaje. Jama poanaje ba'a: —E'e nei miya Jesosaja epeeiji pea'ai pea cuana nijje. Jamaya miquea emimi, pea Janinea meshijo ba'e jayojja jama miya mimiani, de —poanaje.

74 Ojaya esohui shajja'ajja majje Peno quea mete nee nee poanaje; ona nijje mimijajinaje: —;Siajje miya poani! Jiquio dejja ecuea ba jjima. Eya e'e jojo nei pojjeama poani jojjemo Eyacuiñajjiya eya mano mee ca'yome —Peno poanaje. Jamatii Peno siajje poanaje.

Peno jamaya poajo, cachina yahue taaanaje.

75 Cachina taaajo Penohua shahuaba ca'yonaje ma Jesosaa oma mecajje o jama acanaje jama ba'a: —Peno, cachina yahue taaa jjimahuajo miyaya eya ba jjima nei nei nisho aje'yo, ebeca pee peejjima huohuime aje'yo —jamaya Jesosaa Peno acanaje.

Jamajjeya jjashahuabaqui majje Peno quea yeno nee nee poanaje; pa neinei poqui'yonaje Jesosa ba jjima nisho epo jjejojo.

*Jesosa emeshi mese Pinato huasijke dojo canaje
(Macoso 15.1; Noca 23.1-2; Huani 18.28-32)*

¹ Mecajjeahua ojjaña Jodio etii cuana, Eyacuiñaggi nijje emimijji etii cuana ojee miminaje Jesosajo: —¿Achajja amajje acuae seja Jesosa quecua meeje'yo so'o? Cua'a, ¡ejjaquecua meequiqui! —poanaje.

² Jamajjeya Jesosa me jeyo majje dojo canaje Shomano emeshi mese Pinato bajjani yasijke.

*Jodasa jjanaayisibijeaquei'yonaje Jesosa quecua
mee'yo majje quea yeno jjejojo
(Hecho 1.18-19)*

³ Jamajjeya Jodasa, ma Jesosa iña meesahuajji epo Jesosa quecua caje'yo ba majje quea yeno nee nee poanaje. Poquicuajinaje Jodio etii yasijke, Eyacuiñaggi nijje emimijji etii yasijke pea'ai.

⁴ Huohui cañaquinaje: —Eya Jesosa iña mee majje quea mimishi poanaje; oya ca ca Jesosa mase'ama nei nei poanaje, mimishi'ama nei. ¡Ma'aje miquea esodojjo, 30, ma miyaya eya quianaje Jesosa iña meesahua sosejje!

—E'e pojja'a, de. E'e jamatii, Jesosa caquecua-jea cahua —Jodio etiiya saja'a canaje—. Miquea mimishijo ca jja mi ca jjashahuabaquiani, de —poanaje.

⁵ Jamajjeya Jodasaa esodojjo meshi yasijke huojjojeajea canaje. Pa poquinaje ebio huasijke jjanaayisibijeaquei'yohua. Mano'yonaje. Chama'yo tii Jodasa po'yonaje.

⁶ Jodio cuaa aje oe esodojjo meshijo ani chicha canaje: —¿Yajja acuae jja seja jiquio esodojjo aje

so'o? Jesosa sosequia'yoji ya ca coma, de. Eyacuiñajjija equi yasijje iya sa po ajja. Jamaya pojjeama eseyaya aña –poanaje.

⁷ Jamajjeya mimimimi majje meshimisi iñabajijjija meshi, Apaneno meshi jjeshe canaje emano ohuajeajji, Jodio pojjeama ohuajeajji, ma 30 esodojo sosejje jjeshe canaje. ⁸ Jjeya ca ca yohua bajjani ba'a ma ena' cuayaquinaje meshi bajjani'yo, Jesosaja ena' cuayaquinajejo.

⁹⁻¹⁰ E'e, yahuajo nei nei Eyacuiñajjija esohui huohuijji Jenemiaa tehue ca poa jama ba'a:

“Ecuea Emeshi Meseya eya huohui canaje: — ¡Ma 30 esodojo sosejje meshi jjeshequicue! —aca poa—, ma bajjanija ba'a meshimisi iñabajijji poanija meshi. Mahuiso esodojjo quia canaje Jodio cuaa Eyacuiñajjija huoojea'yo Quito iña meesahuajji, equecua'yoji”.

Jamaya Jenemia poa yahuajo nei nei.

*Emeshi mese Pinatohua Jesosa ba canaje
(Macoso 15.2-5; Noca 23.3-5; Huani 18.33-38)*

¹¹ Jamajjeya Jesosa emeshi mese Pinato huasijke dojo canaje,eme jeyo. Pinatohua ba majje huohui'ajja canaje: —¿A'ya acuae mi so'o? ¿A'a miya Jodioja Emeshi Mese poaje'yo?

—E'e, joya ecua miyaya huohuiaña jamaya epo'yoji eya —Jesosaa saja'a canaje.

¹² Jodio etii cuaa, Eyacuiñajji nijje emimijji eti-iya pea'ai siajje acanaje Pinato Jesosajo. Jamatii Jesosaa saja'a jjima acanaje. ¹³ Jamajjeya Pinatohua huohui'ajja canaje: —¿Yajjajje acuae mi mi jjasaja'aquiani so'o? ¿A'a jje shajja'ajja jjima?

14 Chojja, Jesosa jjasaja'aqui ajja nei nei. Ba maje Pinato jjashahuaba neineiquinaje: —¿Yajjajje shai Jesosa jjasaja'aqui ajja, de?

15-16 Jamajjeya Pinatohua niñeba ca'yonaje jama ba'a: —Ojjaña eshequiaja eyaya oe Jodio dejja jeacuaya'yaña Jodio queabihui nee poanijo. E'e, ojjaña Jodio cuana jjashahuabaquiani jama ba'a: Yahuajo Ejito meshijo Jodio etiiquianaja bacua ejja cuia'yo jjima aca poa esohuidojojiya, ena' ecuiapapa jojoya —Pinato poanaje.

Jiquio shejoya Pinatohua oe Jodio dejja ejeanobia nequi huoojeacuayajea mee ca'yaninaje. Jamajjeya oya Pinato jjashahuabaquinaje: —E'e, eyaya oe Jodio huoojeacuayajea meeje'yo jjeyahua nei. Jesosa pojja'a pichojea meeje'yo. Pea yani Mashama bajjani, ojjaña eba nei. Oya ejeanobia nequi quea masejojo. ¿Ache dejja shai Jodio cuaa sa cani so'o? Caba'ajja sahua —jamaya Pinato jjashahuabaquinaje.

17 Jamajjeya Pinatohua ojjaña Jodio cuana ehuohui'ajjajji iyaa canaje. Jjachichaquiajo huohui'ajja canaje: —Jjeyahua nei eyaya jeacuayajeaje'yo oe Jodio dejja. ¿Ache acuae jja oe jeacuayajeaje'yo so'o? ¿A'a Mashama? ¿A'a Jesosa Quito pichojeaje'yo? —poanaje.

18 Pinatoja eba poanaje Jodio etiiya quea quene nee poani ojjaña cuana Jesosa nijje jjapeequianijo. Jamajjeya Jesosa iña mee canaje equecuajea'yojjii, Jodio etiiquiaa.

19 Emeshi mese chacochacoañani yasijje Pinato Jesosa nijje mimimiminequianijo, oja huanaseya pea echacojji huoojea canaje Pinato huohuiya.

Jama huohuime acanaje ba'a: —Huee, mecajje eyaya cahuibanaje Jesosa mimishi'ama nei nei. ¡A'a oya quecuá mee'yojji! Eya quea mete ani ojo. E'e, jjacahuibaqui majje piopionaje quea mete jjejojo —Pinatoja huanaseya echacojji huohui mee canaje.

²⁰ Oja huanase quea mete poanijo, Pinatohua Jesosa pichojea'yo sa acanaje. Jamatii Jodio etii cuaa, Eyacuiñajji nijje emimijji etiiya pea'ai ojjaña ejjachichaqui nequi taaa mee canaje: —¡Mashama oe huoojeacuayaja'yocue! ¡Jesosa a'a pichojeajji! ¡Quecuajea'yocue ca oma oe!

²¹ Jamajjeya Pinatohua: —¿Ache acuae jja oe pichojeaje'yo?

Jamaya acajje, taaa neinei canaje cuana: —Mashama, ¡Mashama jeacuayaja'yocue! — poanaje cuana.

²² —Jamajje ¿yajja acuae oe eyaya Jesosa Quito aje so'o? Eyacuiñajji a huoojea'yo ojjaña jaahuana-jji ca pa coma —Pinatohua huohui'ajja canaje.

—¡Me cacajeacue oe acui ecueata'apeejo! — acanaje cuaa.

²³ —¿Yajja acuae jja so'o? ¿Yajjajo acuae jjaya quecuá'yo sa aña Jesosa? —Pinatohua huohui'ajja canaje.

Jamatii taaa majamajanaje Jodio cuana: —¡Me cacajeacue oe; me cacajeacue oe Jesosa! —jama taaameya Jodio cuana poanaje.

²⁴ E'e, Jesosa pichojea mee jjima acanaje cuaa; quea quene nee neejo janobajjima nei siasianaje; taaa nequinaje Jodio. Taaa majamajajo Pinatohua huoojea canaje enaeme shacuajji jjequiya. Majoya ojjaña cuanaja ebajji Pinatohua

eme topo canaje: —¡Eyaya pojjeama me cacaje Jesosa emano'yojji! ¡Jamaya pojjeama ecuea esohui! ¡Miyaya ca jja ca oe jamaya aña! —Pinatohua acanaje.

²⁵ Taaajebenaje ojjaña Jodio etii cuana: —E'e, jecuaaya oya mano meeje'yo Jesosa; quea tai coma! ¡Oya mimishi'ama jojoya, ecuanajaya ebacua, os-ecua cuana pea'ai cacuia ca'yahua, Eyacuiñajjiya! —Jesosa quea mimishi poso acanaje cuaa.

²⁶ Jamajjeya Pinatohua ohua sa canijo Mashama jeacuayajea mee ca'yonaje; Jesosa ca ca huoojea canaje cuiasejjajea majje me cacajearaa, emano'yojji.

*Sohuinano soa neineinaje Jesosajo
(Macoso 15.16-20; Huani 19.2-3)*

²⁷ Majoya emeshi meseja sohuinano cuaa Jesosa dojo canaje emeshi mese chacochacoañani equi DOJJO huasijke. Ojjaña sohuinano o que jjachichaquinaje. ²⁸ Oja daqui huijjajea mee majje daqui huo'o nei huosho mee canaje emeshi mese nisho'yajji. ²⁹ Acuisha sipi majje sapahuahuo iya canaje emeshi mese jayojja nisho epoji. Emeshi meseja acui ejehuijjajja iñanequia mee canaje ebianei mejje. Majoya ecui'oshajjajo nequianaje ojjaña, Jesosa bihuiajji nisho. Jama bihuia nishome acanaje cuaa ba'a: —¡Miya Jodioja Emeshi Mese quea ca'a nee! ¡Ba'e tiitii'yocue! —jama sajeameya anisho canaje cuaa Jesosa.

³⁰ Majoya cuichojea canaje oja yami yasijke; acui ejehuijjajja jjequisejjajea ca'yonaje oja emejo nequi. Jjequisejjajea'yo majje sapa cuiape'ejea canaje. ³¹ Ojo soa neinei'yo majje daqui huo'o

nei huijjeajeajea ca'yonaje; ojaya daqui quia ca o'yanaje. Majoya Jesosa dojo canaje me cacajeaa, ba'ehuanasohuajeaa pea'ai, sohuinano cuaa.

*Jesosa acui ecueata'apeejo me cacajea canaje
sohuinano cuaa*
(Macoso 15.21-32; Noca 23.26-43; Huani 19.17-27)

³² Jenosanenajo aniya Jesosa dojo caje, ba cajjequinaje pea dejja Simoni bajjani, Sinene meshijo ba'e poe'yo. Sohuinano cuaa Simoni acui ecueata'apee dojo mee canaje Jesosa quishishijji, Jesosa ba'ehuanasohuajeajji. ³³ Jamaya oya poquinaje Jonijota eyiyo huasijje, Ese Ejjaja esohuijo Esapa Jiji anijji bajjani yasijje. ³⁴ Nequiñaquiajo Jesosa ishi mee'ajja canaje cuaa acuijjajja na quea sese, quea pase. Ishi mee'ajja canaje quecua ca'yajje nee'ama epoiji. Sio majje ishi jjima acanaje Jesosaa. Majoya me cacajea ca'yonaje. Me caca majje nequiasohuajea canaje. Majoya oja daqui cuana chicha ca'yonaje, sohuinano cuaa. Iyachicha'yo majje, hue'e nisho majje daqui majjo ca'yonaje, ojaya pojji epo'yojji. ³⁵⁻³⁸ Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a: OYA JESOSA JÓDÍOJA EMESHI MESE EPÓ'YOJJI

Jesosa ba'e pejjejo beca siipojji pea acui ecueata'apee cuanajo ba'ehuanasohuajea pea'ai ca'yonaje, Jesosaja ebianei mijijje, pea shani mijijje. Majoya e'anioque aniya ojjaña cuaa ba neinei ca aninaje oja epeejiya eba'ehuanaoquea ca'yo poajejje.

*Ejiojjije poquije Jesosa nijje mimijajinaje cuana
(Salmos 22.7; 109.25; Mateo 26.61)*

39 Pea dejja cuaa ejiojjije poquianiya Jesosa que poe majje esapa jeacajjacajja canaje, soa huisahuisa nequinaje. Jama mimijajime poanaje ba'a: **40** —¿A'a acuae oe miyaya Eyacuiñajjija mei equi iñajeabichajea'yo majje pea equi iyaje o'oya so'o pea beca peejjima cahuime? ¡Ba'ajja socue! Ache ba'ajja; miya Eyacuiñajjija Bacua Ejja nei jjabaqui majje ca oe jacui ecueata'apeejo ba'e nequioque'ajja'yo socue emano'yojji pojjeama! —poanaje cuana.

41 Jamaya pea'ai Jodio etii bajjani cuaa, Moisesija etehue'yo huohuijji cuaa, Eyacuiñajji nijje emimiji etii cuaa pea'aiya Jesosa niñeba canaje: **42** —¿A'a Jesosa ojjaña jaahuanajji epo'yojji? Oya ona nahuejji pojjeama. Oya ca ca oma nequioque'yo jjima poani, de. ¿A'a acuae jja oe oya Jodioja Emeshi Mese poaje'yo? ¡Jjaba'ajjaqui socue! Jodioja Emeshi Mese nei epo'yojji jjabaqui majje jacui ecueata'apeejo ba'e jja ca oe canequioqueahua jjeyahua neiya ecuanaja ebajji! Ba majje ecuaaya: “Jesosa e'e jojo nei Eyacuiñajjija Bacua Ejja poanaje” aje'yo. **43** Ohuaya: “E'e, eya ca ca iña Eyacuiñajjija Bacua Ejja; ohuaya eya jaahuanana cani” acanaje yahuajo. Jamajjeya oya Jesosa Eyacuiñajjija quea boti nee neejo, ¡Eyacuiñajjija oya canahue cahua jjeyahua nei! —Jodio cuana poanaje.

44 Siipojji cuaa ma o pejjejo eba'ehuanasohuajea ba'eya pea'ai Jesosa jamaya niñebame acanaje, quea huiso nee.

Jesosa mano'yonaje
(Macoso 15.33-41; Noca 23.44-49; Huani 19.28-30)

⁴⁵ Majoya eshequi biacojjajja nequijo shequima' jayojja poanaje; quea misi nee poanaje ojjaña meshi yasijje. Quijje eshequi jjajeapaaqui'yo majje jiji o'yanaje. ⁴⁶ Sinecua, quea misi poajo Jesosa quea yeno nee neejo taaa neineinaje: —¿Eli, Eli, lama sabactani? —taaame poanaje—; ecue Chii, ecue Chii, ¿yajjajo acuae moyo jeana'yonaje so'o? —Jesosa poanaje Jodioja esohuijo.

⁴⁷ Shajja'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiquiana Enia iyaa cani pojja'a!

⁴⁸ Jamajjeya oe dejja poquicuajinaje acuijjajja na sese jjequiya. Jjequi majje shajashaja iyanobia canaje ena ejjequi yasijje. Majoya bequiobo sajo quecuahuosho majje Jesosaja enaba huasijje huoo canaje ojaya e'ishijji nisho.

⁴⁹ —Chojja, ¡ishoa socue! ¡Enia pojja'a poeje o nahueya! ¡Ba'ajja socue! —Jodio cuana poanaje.

⁵⁰ Jamatii taaa neinei o'oya majje Jesosa mano'yonaje. Chama'yo tii poanaje. ⁵¹ Jesosa mano'yajo tii, Eyacuiñajjija equijo daqui quea moo eba'ehuana ba'e Eyacuiñajjija eyajje jja'isajea meequi canaje; biacuajje ebionei jja'isajequinaje. Meshi janobajjima nei huehuahuehuhanaje pea'ai. Mei quea quemo cuana jjayajjejequinaje pea'ai. ⁵² Mei jjani, esajaajji cuana pea'ai jjayajjejequinaje. ⁵³ Quijje Jesosa eshe o'oya poajo, Eyacuiñajjija epeejji yahuajo emano'yo ma jjani cuanajo jaa cuayaqui'yonaje, quea huiso Jenosanena huasijje

poquinaje cuana; quea huiso dejja ba canaje ma emano'yo cuana.

⁵⁴ Ojjaña ba majje, meshi huehuahuehuani ba majje pea'ai sohuinano quea huiiso nee, 100, huoo-jeajji poaniya pea sohuinano cuana nijjeya, ma Jesosa nahuejji poani, quea mete nee nee poanaje.

—¡E'e jojo nei, de, oya Jesosa Eyacuiñajjija Bacua Ejja nei poanaje! —sohuinano poanaje.

⁵⁵ Quea huesha nequiya eponta cuaa pea'ai Jesosa eba'ehuanasohuajea ba'e ba canaje. Oya cuana yahuajo Jesosa nijje Janinea meshijo ania poa. Onije Jenosanena huasijke poeyanaje oja bobo cuacula meesahuaa. ⁵⁶ Oya cuana ma bajjani ba'a: Mania Madanena; Satiaco, oja chahua Jose pea'aija enaese Mania bajjani; Semeneoja ehuanase pea'ai; Jesosaja enaese pea'ai.

*Jesosa mei jjani yasijke huananobia ca'yonaje
(Macoso 15.42-47; Noca 23.50-56; Huani 19.38-42)*

⁵⁷ Jamajjeya sinecua nei Jesosa mano'yajo, dejja quea aquiana huiiso nee Jose bajjani poeyanaje, pea Jose, Amatea meshijo ba'e. Oya Jesosa nijje jjapee tiitiiquia poa yahuajo nei. ⁵⁸ Jamajjeya poe majje oya Pinato baa poquinaje. Huohui cañaquinaje: —Emeshi mese Pinato, Jesosa mano'yonaje. Eyaya oya cadojo'yahua ecuea mei jjani yasijke ehuananobiaqui'yoiji —poanaje.

Pinatohua huoojea canaje: —E'e, ¡dojocue! Eyaya sohuinano cuana jamaya huohuime aje —poanaje.

⁵⁹ Jamajjeya Joseya Jesosa acui ecueata'apeejo emano'yo ba'e jjequioquea'yo majje dojo

ca'yonaje. ⁶⁰ Daqui oshe eyacua neijo bebo majje huananobia ca'yonaje ojaya mei jjani yasijje, ma oja jjeya nei tio huasijje. Majoya mei quea quemo jeacajjajja canaje mei jjani naba capa'yojji. Jesosa mei jjani dojjojo jaa capajea canaje. Capa'yo majje poquinaje Jose pea cuana nijje. ⁶¹ Mania Madanena, pea epona Mania bajjani pea'ai mei jjani yasijje poeyanaje pea'ai Jesosa jjanijo ehuananobia jaa baa. Jomajo e'anioque aniya ba canaje, epona cuaa.

Sohuinano cuaa mei jjani nahue canaje

⁶² Jamajjeya mecahuajje epojja ejomishocajji jjayejjequiajo Paniseo cuana, Eyacuiñajji nijje emimiji etii pea'ai poqui o'oyanaje Pinato que. ⁶³ Huohui caña'yonaje: —Emeshi mese, ecuana jjashahuabaquiani yahuajo Jesosa mano'yo jjimahua siajje poanaje jama ba'a: “Beca cahuime po majje eya emano'yojaa shequije'yo” —Jodio poanaje, Jesosa siajje poanajejo poso—. ⁶⁴ Jamajjeya ijjeyahua nei sohuinano huoojeacue jjani baa, beca cahuime pohua, Jesosaja epeejiya oe equehua dojo'yo bacue! Jamaya po majje ojjaña cuana dasia ca chana'jama ba'a: “¡Bacue oe! ¡Jesosa ca jja ca emano'yojaa shequi o'oyanaje!” huohui ca chana' oja epeejiya. Ojjaña cuana siajje nei nei aca'yo chana' —Jodio cuana jamaya poanaje, Jesosa eshequi o'oyajji pojjeamajo poso.

⁶⁵ Jamajjeya Pinatohua huoojea canaje: — ¡Ma'aje sohuinano cuana! ¡Dojo'yocue mei jjani yasijje, ma Jesosa ehuananobia jaa huasijje! ¡A'a acuae jjani ca'aje'yo ba'ajja socue! —poanaje Pinato.

66 Jamajjeya poquinaje Jodio cuana sohuinano cuana nijje mei jjani yasijke. Jjani capajji ijzia ca'a meequi ca'yonaje baacuiya. Majoya esecue jjanijo emeshi mese nisho iya canaje ona edobiqui poaje jjejojo. Etehue iya canaje, emeshi mese nisho. Majoya Jodio cuana poquinaje. Sohuinano ca ca enequinaje tii, esecue jaahuanajjiya.

28

Jesosa shequi'yonaje

(*Macoso 16.1-10; Noca 24.1-12; Huani 20.1-10*)

1 Jamajjeya epojja ejomishocajji jjayejjequiajo mecajjeahua nei nei, ebionei jjapojaquiajo, nomico pojjajo, Mania Madanena, pea Mania nijje poquinaje mei jjani yasijke. **2** Epona cuana jjani pejje yasijke poeyajo, meshi huehuahuehuana je janobajjima nei. Eyacuiñajjija esohuidojiji eyajo ani nequioquenaje. Mei jeacajjajjajea canaje. Majoya esohuidojiji mei biajje anioquenaje. **3** Oya quea jiji nee nee poanaje pojjejje jayojja; ojaya daqui quea oshe nee nee, bo oshe nee nee jayojja ani ba canaje epona cuaa. **4** Sohuinano cuana quea mete nee nee poanaje. Piopio neineinaje; meshi yasijke jaabichajequinaje, emano'yo jayojja jama jaanaje esohuidojiji yajjajo. **5** Majoya esohuidojijiya epona cuana jama huohuime acanaje ba'a: —¡A'a quea mete pojji! Ecuea miya eba. ¿A'a Jesosa, ma acui ecueata'apeejo mano'yonaje sa'ajja'yo poequi? **6** Chama' oya jjeya jiquiojo. Shequi'yonaje ca jja coma; ma ecua ohuaya huohui canaje jamaya e'e jojo nei po'yonaje; oya shequi'yonaje jjeya.

E'e, ¡quia'o jiquio ba'ajjahua'yo! Jiquiojo jaanaje.
⁷ ¡Jjeyahua nei poquicuajicue oja epeeiji cuana huohuiya! ¡Jama huohuime acue ba'a: "Jesosa pa shequi'yonaje" acue! "Oya jjeya nei Janinea meshi yasijje poquije miquiana poqui jjimahuajo. ¡Oya oe jocuama baquicue!" jamaya o shajja'ajjajji cuana huohuiquicue! ¡Ecue sohui ma eya huohuinaje oe a'a pajea'yojji; pea huasijje huohui neiquicue! —esohuidojojji jamaya poanaje.

⁸ Jamajjeya epona cuana poqui cuajicuajinaje. Quea mete, quea bei nee nee poanaje. Cuajicuajinanajje Jesosa shajja'ajjajji cuana esohuidojojji esohui huohuiya.

⁹ Ejiojjijje poquijejo Jesosa jjanequipanaquinaje. Ehui dojodzi nequinaje. Huohui canaje: —Jjo'i, ¡ejo quea bei pocue! Eya poeyanaje —Jesosa poanaje.

O que poe majje o que jjanequichipiquinaje. Ecui'oshajjajo nequinaje; jiojji napa canaje. Quea bihui nee nee yajji epona cuaa oya bihuia canaje.
¹⁰ Jamajjeya Jesosaa oya cuana huohui canaje: —¡A'a quea mete pojji! ¡Poquicue; ecuea epeeiji cuana huohuiquicue, miyaya! ¡Jama oe acue ba'a: "¡Jjeyahua nei oe Janinea meshi yasijje poquicue! ¡Jocuama oe Jesosa baquicue, Janinea meshi yasijje!" acue! —Jesosa poanaje.

Sohuinano cuana Jesosajo siajje poanaje

¹¹ Epona cuana poqui'yajo sohuinano cuana meshijo jaa nequisohua'yonaje. Jenosanena huasijje poquinaje Jodio etii baa. Eyacuiñajji nijje emimijji etii huohui caña'yonaje ojjaña ohua jama acanaje, sohuinano cuaa. ¹² Huohui poña'yonaje.

Sohuinanoja esohui shajja'ajja majje Jodio etii cuana jjachichaquinaje emimimimijji. Majoya sohuinano cuana quea huiso bejjo quia canaje o siajje poani sosejje. ¹³ Jama huohuime acanaje ba'a: —¡Miyaya ojjaña cuana jama huohuime acue ba'a: “Mecajje ecuana ecahuijaajo Jesosa sii ca'yonaje jjanijo jaa, o shajja'ajjajjiya” acue! ¹⁴ Emeshi mese Pinato miquea ehuohui shajja'ajja cajo ecuana onijje mimije, e'e jojo nei, miya ojaya enapa'yojji pojjeama. Pinato quea bei po meeje'yo ecuanaa —Jodio cuana poanaje.

¹⁵ Jamajjeya Jodio etii cuaa sohuinano bejjo quia canaje. Bejjo jjeshe majje sohuinano cuana poquinaje ojjaña huasijje huohui pohua. Jodio etija esohui jayojja jama acanaje. Jamajjeya quea huiso Jodio cuana sohuinanoja esohui shajja'ajja majje e'e jojo nei poani posojo jjashajja'ajjaquinaje. Jjeya jiquio pojjajo cuanaya jamaaya Jodio cuaa huohui cani tii: —¡Jesosa ca jja ca ojaya epjeejjiya quehuadojo ca'yonaje; shequi o'oya ajja! —sohuinano siajje poanaje jayojja jama poani tii, Jodio cuana.

*Jesosa ba canaje o shajja'ajjajji cuaa
(Macoso 16.14-18; Noca 24.36-49; Huani 20.19-23; Hecho 1.6-8)*

¹⁶ Jamajjeya Jesosa shajja'ajjajji cuana 11 huisome poquinaje Janinea meshi yasijje Jesosa baa. Poquinaje eyiyo huasijje ma Jesosa huohui poequi baa. ¹⁷ Poqui majje, Jesosa ba majje bihuia canaje cuaa. Jamatii beca cuana ca ca jama poanaje ba'a: —E'e pojja'a. Edojjoshahua pojja'a coma, Jesosa pojjeama —jjashahuabaquinaje.

¹⁸ Jamajjeya Jesosa o que jjanequichipichipi qui majje jama huohuime acanaje ba'a: — Eyacuiñajjiya eya Emeshi Mese nei epoiji aca'yonaje eyajo, meshijo pea'ai. ¹⁹ Jamajjeya ipoquicue ojjaña dejja cuana huasijje! ¡Ojjaña pea esohui mimiani yasijje ecuea esohui ba meequicue pea'ai! ¡Enijke jjapeequi meequicue! Enijke jjapeequiyajo, ¡ena huasijje besa meecue, eseja Chii nijje epoiji, enijke epoiji, Edojjoshahua Pame nijje pea'ai epoiji! ²⁰ ¡Ojjaña cuana ecue sohui ba meesahuacue oe! ¡Ojjaña oe jjashajja'ajja meequicue quea bame nee nee eba'ejji, mimishi'ama eba'ejji! ¡Bacue oe! Eya e'e jojo nei minijje nequi tiitiije'yo ojjaña pojjajo, jiquio meshi oe epoiji jiquio epoija huisome tii —Jesosa poanaje.

Mahuiso ecuea esohui etehue'yo. Eyaya Mateo bajjaniya tehuejeyonaje. Apoa.

**Eyacuiñajjija Esohui
New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 21 Feb 2024 from source files
dated 29 Jan 2022
88838088-e20d-51ca-8c91-69194f5ae678